

**NINTH MIZORAM LEGISLATIVE ASSEMBLY  
(FOURTH SESSION CUM BUDGET SESSION)**

**LIST OF BUSINESS**

FOR SEVENTH SITTING ON MONDAY, THE 10<sup>th</sup> MARCH, 2025  
(Time 10:30 A.M to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**PRESENTATION OF REPORT**

2. **LT. COL. CLEMENT LALHMINGTHANGA** to present to the House First Report on Actions Taken by the Government against the recommendations contained in the Seventh Report of Committee on Papers Laid on the Table relating to Commerce & Industries Department.

**LEGISLATIVE BUSINESS**

***Bills for introduction, consideration and passing***

3. **PU LALNGHINGLOVA HMAR**, Minister to beg leave of the House to introduce "The Mizoram Liquor (Prohibition) Amendment Bill, 2025."

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

**FINANCIAL BUSINESS**

4. **GENERAL DISCUSSION** on the Budget for the year 2025-2026  
*(to commence)*

VANLALTHANTLINGI  
Commissioner & Secretary

\*\*\*\*\*

**SPEAKER** : “Pathianin hlauhna thlarau min pe lo va, thiltihtheihna leh hmangaihna leh rilru fel tak neihna thlarau min pe zawk si a.”

- II Timothea 1:7

**QUESTIONS & ANSWERS:**

*Starred Question No. 81: DIPRO Office chungchang*

*Zawhna Neitu: Pu Jeje Lalpekhlua, South Tuipui Bialtu.*

**PU JEJE LALPEKHLUA:** Pu Speaker, ka lawm e. Information & Public Relations Department changtu Minister, Dr. Vanlalhlana chhan atan ka zawhna chu -

“District Information & Public Relations Department Office, Hnahthial-a sak tura ruahmanna a awm tawh em?” tih a ni e.

**SPEAKER** : Chhang turin, Information & Public Relations Department changtu Minister, Pu Vanlalhlana ilo sawm ang.

**DR. VANLALHLANA, MINISTER:** Pu Speaker, South Tuipui bialtu zahawm tak Pu Jeje Lalpekhlua zawhna chhanna chu -

Hnahthial District Information & Public Relations Department Office sakna tur hmun kan nei a, a sakna tur concept paper pawh kumhlui lamah khan peih fel niin, fund source kan zawng mek a ni.

**SPEAKER** : Zawhbelhna zawt turin:

1. Pu Jeje Lalpekhlua, (Zawhna neitu),
2. Pu K. Hrahmo,
3. Pu VL Zaithanzama.

**PU JEJE LALPEKHLUA:** Pu Speaker, ka zawhbelhna chu -

- i) Hnahthial DIPRO ah hian hnathawktu engzat nge awm tura tih a nih?
- ii) Post awm tur ang te dahkhah a ni em?
- iii) Dah belh tumna a awm em?

**PU K. HRAHMO** : Pu Speaker, Zawhbelhna - DIPRO Siaha office kum 22 vela upa tawh hi, kan sawrkar thar hian sak that tumna a nei em?

**PU VL ZAITHANZAMA:** Pu Speaker, Zawhbelhna – I&PRO staff indaihlohna hi eng anga sutkian tum nge a nih?

**SPEAKER** : Theih ang anga chhang turin a changtu Minister Dr. Vanlalhlana ilo sawm ang.

**DR. VANLALHLANA, MINISTER:** Pu Speaker, Pu Jeje Lalpekhlua zawhna kha, Hnahthial DIPRO office-a post 6 awmah DIRRO, (District IPRO kan tih) IPR Officer 1 leh IV Grade 1 chauh an awm a. Kan mamawh belh khawp mai a, amaherawhchu, kan indaih ngang si lova. Office tur te kei pawhin a hmunah ngei ka va en a, sak tura hma lak mek a ni a.

Tin Pu K. Hrahmo, zawhna pawh kha ka chhang tel nghal tho in ka hria a. DIPRO Office ho hi a chhe tawh hlawm khawp mai a. Department dang angin scheme hnuaiiah fund source han pawhna tur kan neih loh avangin PMJVK te, SASCI te, khangah khan kan dil mek a. Sak that tumin project kan siam mek a ni.

Tin, Pu VL Zaithanzama, Aizawl West-III bialtu zawh kha, IPRO kan indaihlo khawp mai a. Tunah hian Director 1, Jt. Director 2, Dy. Director 8. Tichuan, IPRO kan tih takah hian post 31 awmah 14 chauh kan nei a. A then an chhuak a, MCS ah te an lut ve leh a. Kan hriatthiam theih nan, tunah hian Aizawl-a VIP ho che vel buaipui tur hian IPRO pakhat chauh kan nei a, chu pawh chu, fully-blind a ni. Chu chuan kan Press Release te a lo buaipui a. Tin, kan Dy. Director te pawh indaihlohna avangin Distirct tinah kan indah vek thei lova, hmun thumah kan indahchhuak a. IPRO angin an va thawkchhuak a ni a. District hmun 8 ah IPRO kan indah bakah, tikhan CM ah te, Governor ah te leh hmun hrang hrangah kan indahchhuah a ngai baw k si a, kan indaihlo takzet a. Kan Dy. Director te an tlawmngai a, tihian an buaipui ngat ngat a. Theih ang angin Press Conference te leh sorkarin tihchhuah duh a neih te, chutiang chuan an buaipui thin a ni a.

Tin, tunah hian MPSC hnuaiiah hian post 3 a inchiah mek a, a thar 3 min pek belh leh turin ruahmanna siam a ni baw k a. Chutiang chuan, IPRO hi 6 neih belh leh turah kan in ngai a, hei pawh hi kan mawmawhna nen chuan a la inhen lo tiin kan dil belh leh a, file a kal leh mek a ni. Ka lawm e.

**SPEAKER** : A lawmawm e.

*Starred Question No. 82: Lengpui Airport chungchang*  
*Zawhna Neitu:* Pu K Laldawngliana, Tuirial Bialtu.

**PU K. LALDAWNGLIANA:** Pu Speaker, General Administration Department changtu kan Chief Minister zahawm tak chhan atan ka zawhna - Starred Question No. 82 chu –

- a) Lengpui Airport hi Indian Airforce (IAF) kuta hlan tumin Sorkarin hma a la zel em?
- b) Eng chen nge hma a lak tawh?
- c) Hemi kawngah hian Sorkarin mipuite biak rawna, an ngaihdan lak a tum em?

**SPEAKER** : Chhang turin General Administration Department changtu, kan Chief Minister Pu Lalduhoma ilo sawm ang.

**PU LALDUHOMA, CHIEF MINISTER:** Pu Speaker, Member zahawm tak Pu K. Laldawngliana zawhna chhanna chu –

- a) Hemi chungchang zir chiang tur hian “Working Committee to Look into the Maintenance and Management of Lengpui Airport” chu Pu TBC Lalvenchhunga, MLA & Adviser to the Chief Minister, Mizoram (Finance & Planning) kaihhruaina hnuaiiah Dt. 18.11.2024 khan din leh a ni a. IAF hnena Lengpui Airport hlan chungchang zir chiang leh Draft Memorandum of Agreement buatsaih turin Sorkarin a din a ni. A copy kan enclosed a.
- b) Draft Memorandum of Agreement hi Working Committee in a buatsaih mek a, peihfel a la ni lova. Cabinet ngaihtuah turin thehluh a la ni lo.

- c) A chung a tarlan tak Working Committee chuan Ni 17.01.2025 khan All NGOs, Lengpui nen PL Restaurant Rest Room, Lengpui-ah sawihona an nei tawh a. Ni 27.01.2025 khan All NGOs, Mizoram nen Planning Department Committee Room-ah sawihona an nei leh bawk. Hemi hnu hian Chief Minister hovin NGO Co-ordination Committee te nen sawiho leh a ni a, 16<sup>th</sup> Finance Commission hnenah Airport tih changtlunna tur nawr ho ni se tih a ni.

**SPEAKER** : Zawhbelhna kan la ang a –

1. Pu K. Laldawngliana (Zawhna neitu),
2. Pi Prova Chakma,
3. Dr. K. Beichhua.

**PU K. LALDAWNGLIANA:** Pu Speaker, ka zawhbelhna chu –

- i) Sorkar hmasain Airport atanga chhiah a lo lak PSF (Passenger Service Fee) te, Parking Fee te, Pre-Paid Counter, Advertisement leh dawr luahman te bak hi tun sorkar hian chhiah thar lak a nei em? A neih loh chuan, engnge a chhan?
- ii) Sorkar hmasa hunlaia Lunglei lam Airport thar tur siam rawtna Ministry of Civil Aviation a thehluk kha bawhzui a ni em? A nih loh chuan, engnge a chhan?
- iii) Kan hriat angin, Aizawl - Kolkata Flight ni khatah vawi 2 awm thin kha, vawikhat a awm ta a, harsatna kan tawk nasa viau mai a. Damlo leh khualzinte tan a rate a sang bawk si a. Hei hi vawi 2 thlawk leh tura hmalak theih a ni em?

**PI PROVA CHAKMA:** Pu Speaker, ka lawm e. GAD Minister zahawm tak chhan tura ka zawhbelhna chu – Ka bial Tlabung-ah hian helicopter service awm tura hmalakna a awm em?

**DR. K. BEICHHUA:** Pu Speaker, ka zawhbelhna chu -

- i) Siaha DC Office hi senior most te zinga mi a ni a. Kum 2021-ah NEDP sum lakh ₹509 hmanga sak tan kha a ni a, 2023 atang khan chhunzawm lohin a awm a. Siaha in DC Office neih hlan kan nghakhlel em em a ni. Tun sorkarah hian hei hi a monitoring emaw, zirchianna emaw neih a ni tawh em?
- ii) Lo nei ni se; sorkar kal tawha sak chhunzawm loh kha, tun sorkarah hian sak chhunzawm tumna a awm em?
- iii) DC Office nei loa kan awm reng hi chu, tun SASCI sum kan hmuh turah hian min telh sak thei ang em? Min telh sak hram tura ngenna ni tel bawk se.

**SPEAKER** : Chhang turin, Chief Minister zahawm tak Pu Lalduhoma, a changtu Minister ilo sawm ang.

**PU LALDUHOMA, CHIEF MINISTER:** Pu Speaker, zawhna neitu zawhbelhna kha -

Airport-ah hian chhiah dang kan lak awm ka hre lo a. Tin, sak that mek te a ni a.

Lunglei lamah Airport awm theihna turin team insiamin tunhma khan lo survey tawh a ni a, a survey report te pawh keipawhin ka chhiar tawh a. Hmun khatah kha chuan ‘a tih theih ang’ an ti deuhin ka hria a; a dang zawng kha chu ‘tihngaihna a awm lo’ ti ang deuh khan an chhuah a ni, tunhma khan. Chu chu thil awmzia a ni.

Tunah hian flight tihlem a nihna chhan chu, passenger an tlem tlat mai a ni. Hei hi anmahni sawi dan a ni a, “Passenger tam leh deuh hunah chuan pahnih kan tih tir leh thei ang a. Tunah chuan a ngaihna a awm rih lo; kan loss nasa em mai’ an ti a ni. Tin, kan Airport runway hi PCN 50 law-law in tih tum hram teh ang kan ti a, tunah hian crore 86 leh eng emaw zat kan dah a. Khawih a ni dawn a, a buaithlak hle mai a. Thlawhna service a ngai si a; zing leh zanah a thlawh loh lai chuh te a ngai, tih kha kha ka sawi tel duh a.

Tin, Pi Prova-i zawhna, Tlabung Helicopter Service chungchang kha, tunah rih hi chuan a indaih lo khawp mai a. Theih ang angin a tulna hmunah chuan tih belh zel kan tum a. Tunah hian Helipad kan tih pangngai hi eng emaw zat kan siam belh dawn a. Tin, Heliport kan tih, re-fueling pawh awm theihna tur hi hmun 11 - District tinah kan ruahman mek bawk a. Chungte chu a puitlin chhoh chuan, kan indaih chho ve ang a Helicopter lamah pawh a tih theih dan ala awm mai turah kan ngai a ni.

Member zahawm tak Pu Beichhua zawhna kha –  
Siaha DC building sak hi a buaithlak khawp mai a. Thil fel lo eng eng emaw kha a lo awm a, a kal chak hlei thei lo a. Chu chu theih ang angin enfel mek a ni a, kan sak chhunzawm zel ang.

Tin, a main building bakah quarters neuh neuh pawh eng emaw zat tunah hian tender mai theihin, Siaha khaw chung hmun 4-5 laiah quarter sak kan ti dawn bawk a ni.

SASCI sum atangin, tih kha, khang kha SASCI sum atanga kan pek a nih leh nih loh ka hre Chiang Chiah lo a; a ni mai thei bawk a, tuna ka han sawi hoa kha. SASCI sum hi ngaihtuah mek zel a ni a. Crore 250 bawr vel tur theh thlak leh kan tum a, vawiin hi a last date anrawn ti a, kan on-board fel tawh a ni. Chung te chu kan hmuh chhoh chuan, heng a pawimawh zualte hi chu kan khung chho thei zel turah kan ngai a ni.

**SPEAKER** : A lawmawm e.

*Starred Question No. 83: Distict Court, Lunglei chungchang.*  
*Zawhna Neitu:* Pu T. Lalhlimpuia.

**PU T. LALHLIMPUA:** Law & Judicial Minister zahawm tak kan CM chhan atana ka zawhna chu –

- a) Lunglei District chungah District Court building sak that tumna a awm em?
- b) A awm chuan, khawilai hmunah nge sak a nih dawn?
- c) Sanction amount engzat nge?
- d) Engtikah nge sak tan a nih ang?

**SPEAKER** : Chhang turin, Law & Judicial Department changtu kan Chief Minister Pu Lalduhoma ilo sawm ang.

**PU LALDUHOMA, CHIEF MINISTER:** Pu Speaker, ka chhanna chu –  
“A hmun hi thlan fel a ni tawh a, sak tura ruahman mek a ni e” tih a ni e.

**SPEAKER** : Zawhbelhna zawt turin, Pu T. Lalhlimpuia, zawhna neitu.

**PU T. LALHLIMPUA:** Pu Speaker, ka zawhbelhna chu – Sorkar-ukil hlawh te hi kum 10 lai ennawn a ni tawh lo a. Hei hi ennawn tumna a awm em?

**SPEAKER** : Zawhbelhna chhang turin, Law & Judicial changtu kan Chief Minister ilo sawm ang.

**PU LALDUHOMA, CHIEF MINISTER:** Pu Speaker, hlawh hi kan ukil te anni emaw, hnathawk dang anni emaw tunah hi chuan ennawn tumna sorkarin a nei rih lo.

**SPEAKER** : A lawmawm e.

*Starred Question No. 84: Hnam-puan leh bungraw dang chungchang.*  
*Zawhna Neitu:* Pu Jeje Lalpekhlua, South Tuipui Bialtu.

**PU JE JE LALPEKHLUA:** Pu Speaker, ka lawm e. Art & Culture Department changtu Minister Pu C. Lalsawivunga chhan atan ka zawhna chu –  
“MUP, MHIP, YMA leh NGO dangte tana hnampuan hrang hrang leh bungrua te man man zawkin a lei theih em?” tih a ni e.

**SPEAKER** : Chhang turin Minister Pu C. Lalsawivunga ilo sawm ang.

**PU C. LALSAWIVUNGA, MINISTER:** Pu Speaker, South Tuipui bialtu member zahawm tak zawhna chhanna chu -

MUP, YMA, MHIP LEH NGO dangte tan hnam puan hrang hrang - Puanchei, Kawrchei, Ngotekherh, Hmaram, Pawndum, Thangchhuah than leh Vakiria leh, bungrua - Darkhuang, Darbu, PA Set leh Acoustic Guitar te chu, a diltute'n 25% tumin an lei thei a ni.

**SPEAKER** : Zawhbelhna -  
1. Pu Rasik Mohan Chakma,  
2. Pi Baryl Vanneihsangi,  
3. Pu Ramthanmawia Papuaia,  
4. Pu Robert Romawia Royte.

**PU RASIK MOHAN CHAKMA:** Pu Speaker, ka zawhbelhna chu - Hnampuan hrang hrang tihah khan, Chakma puan te, Bru puan te tih tel ve a ni em? A tel loh chuan, engvanga tih tel loh nge? Tih tel theih dan a awm ang em?

**PI BARYL VANNEIHSANGI:** Pu Speaker, Falkawn-Zokhua tichangtlung tura hmalakna hi engchen nge kalpui a nih tawh? Tichangtlung tura ruahmanna hian eng engte nge a huam?

**PU RAMTHANMAWIA PAPUIA:** Pu Speaker, Kum 2024-25 khan Darkhuang engzatnge Art & Culture Department hian a pek chhuah? Ka zawhna chhan chu - Nikum khan kan dil a, min pe thei lova. Kha kha an lo nei lo reng nge?

**PU ROBERT ROMAWIA ROYTE:** Pu Speaker, ka zawhbelhna chu -

- i) Mizoram Allocation Business Rules angin, Music hi Art & Culture Department chan a la ni zel em?
- ii) ‘Leitlangpui Music Festival’ kha Art & Culture Department rawt chhuah leh huaihawt niin ka hria a. Mahse, Tourism Department khan an rawn ti ta daih si a; Art & Culture Department kha a nodal-department niawm bawk si laiah khan. Leitlangpui Music Festival kha Art & Culture Department rawnaa neih a ni em? Nge, Tourism Department khan an huang pawn lam deuh rawn daiin Leitlangpui Music Festival kha an organized? Kha kha kan Minister zahawm tak hian min sawifiah sak sela.

**SPEAKER** : Chhang turin, Art & Culture Department enkawltu Minister Pu C. Lalsawivunga ilo sawm ang.

**PU C. LALSAWIVUNGA, MINISTER:** Pu Speaker, Pu RM Chakma khan hnampuan chi hrang hrangah khan Bru leh Chakma puante kha a rawn ti a. Engpawh ni sela, Mizoram-in ram pum huap hnampuan kan neiha hi chu tuna kan han tarlan puan chihrang hrangte kha a ni a. A chi bil anga a hranpa taka mention emaw, a la awm lova, la ngaihtuah theih turah te pawh ngai ila.

Tin, Pi Baryl Vanneihsanghi zawhna kha, Falkawn-Zokhua hi tihchangtlun tumin theihtawp chhuaha hma lak mek a ni. Tuna kan neih Zokhua hi a beitham em em a, awmze nei zawka buatsaiha chei tum mek a ni a. 2025 Chapchar Kut ah pawh khan ni hnih lai Zokhua-ah Kut te pawh kan va hmang a, Kut kan thlen theihna tur leh mikhual thlen theihna tur te bakah kan zo-zia, kan ei leh in thlenga kan pho chhuah theihna tur kawng hawiin Falkawn-Zokhua hi tihchangtluna buatsaih tum a ni a, chuta tan chuan pawisa te pawh dil mek a ni.

Tin, Pu Papuaia, East Tuipui bialtu zahawm tak rawn zawhna kha - Darkhuang hi nikumah engzat chiah nge kan hralh kha, a figure chiah ka hre lova, a duh chuan ziakin kan hralh zat kha kan la pe thei turah ngai ila. Tin, Burma (Myanmar) lam buaina avangin heng Darkhuang, Darbu te hi kan duh angin kan hmu thei lova, a chhan chu - Darkhuang te, Darbu te hi a siamtu bulpui chu Buddhist monk te an ni a. Kan lakluhna ber kha a buai avangin, kan duh ang kan hmu thei lova. Kuminah hian kan pawisa neih atangin Darkhuang 20 dawn vel hi chu kan han chah a, a vai hian a lo thleng thei turah kan beisei a. Nikum lamah a lo chang lo kha a pawi khawp mai; a lo thlen hun chuan i chang tawh ang.

Tin, Pu Robert Romawia, Hachhek bialtu rawn zawhna kha – Music hi Allocation of Business angin Art & Culture hnuaiah a awm a, ‘Fine Arts’ tih hi kan hriat lar dan a ni a. Music zir duhte tan zir theih reng a ni a, zir an awm reng bawk a ni. Tin, Hnam-lam te pawh a ni a, zai leh lam zirna hi kalpui chhoh zel a ni.

Tin, Leitlangpui Music Festival chungchang hi, Tribal Affairs hnuaiah hian tribal-te tana Festival buatsaih theihna chi hrang hrang a awm ve a ni. Chu chu, rem hre takin Tourism Department hian tribal affairs atanga tribal mite festival hmanna tur pawisa an dil chhuak hlauh mai a, chutiang chuan Leitlangpui Music Festival te pawh kha buatsaih a ni a. Kan ramah hian heng hi a theih chuan la uar chhoh zel pawh kan beisei a ni.

**SPEAKER** : A lawmawm e.

*Starred Question No. 85: Chief Minister’s Special Package chungchang.*

*Zawhna Neitu:* Pu K. Laldawngliana, Tuirial Bialtu.

**PU K. LALDAWNGLIANA:** Pu Speaker, General Administration Department changtu kan Chief Minister zahawm tak chhan a tan, Starred Question No. 85 -

- a) Chief Minister's Special package hi beneficiary pakhat cheng engzatnge pek tum a nih?
- b) Engtianga dil tur nge?
- c) A hmu tur thlan dan min hrilh thei em?
- d) Mi engzatin nge dil tawh?
- e) Hmu tura select an awm tawh em?
- f) Eng zat nge select annih?
- g) Chief Minister's Special package atana sum dah zawng zawng zat min hrilh thei em?

**SPEAKER** : Chhang turin General Administration Department changtu, Chief Minister Pu Lalduhoma ilo sawm ang.

**PU LALDUHOMA, CHIEF MINISTER:** Pu Speaker, ka chhanna chu -

- a) Chief Minister Special Package hi beneficiary hi pakhat ₹1.00 lakh aia tam lova pek tum a ni.
- b) Online application download tur a ni a, concerned DC-ah submit tur a ni.
- c) Application submit hi a concerned department-in screening an lo nei ang a, din chhuahpui tur ngeia a hriatte thlan an ni ang.
- d) Mi 29,403.
- e) Tun dinhmunah hian select an la awm lo.
- f) Tun dinhmunah hian hriat a la ni lo.
- g) ₹20 crore a ni e.

**SPEAKER** : Zawhbelhna zawt turin, Pu K Laldawngliana, Zawhna neitu.

**PU K. LALDAWNGLIANA:** Pu Speaker, ka lawm e. Ka zawhbelhna -

- i) CM leh Minister te hian motor engzat theuh nge an kawl tak?
- ii) Chief Minister, Minister, Adviser to CM te hian staff engzat nge an kawla, an mahni enkawl nan kumkhat chhungin sorkarin cheng eng zat nge an sen?

**SPEAKER** : Chhang turin kan GAD Minister ilo sawm ang.

**PU LALDUHOMA, CHIEF MINISTER:** Adviser to the CM te leh kan Minister-te hian motor pakhat leh a spare pakhat theuh kan kawla a ni. Pakhat han tih hian, a spare hi a awm ve a ngai a, a spare awm lo chuan tumahin an kawla ngai lo a ni. Tin, a senso zat hi chuti mai chuan ka sawi thei rih lo.

**SPEAKER** : Next ah kan kal ang a.

*Starred Question No. 86: Uniform Civil Code (UCC)*

*Zawhna Neitu:* Pu Lalchandama Ralte, Opp. Leader.

**PU LALCHHANDAMA RALTE, OPP. LEADER:** Pu Speaker, Starred Question No. 86, GAD Minister min chhan atan -  
Mizoram Sorkar hian Uniform Civil Code (UCC) hman ve tumna a nei em?

**SPEAKER :** Chhang turin, General Administration Department changtu Chief Minister ni bawk Pu Lalduhoma ilo sawm ang.

**PU LALDUHOMA, CHIEF MINISTER:** Pu Speaker, a chhanna chu –  
“Mizoram Sorkar hian UCC hman tumna a nei lo” tih a ni e.

**SPEAKER:** Zawhbelhna zawt turin:  
1. Pu Lalchhandama Ralte, (Zawhna neitu),  
2. Pu Robert Romawia Royte.

**PU LALCHHANDAMA RALTE, OPP. LEADER:** Pu Speaker, hman tumna kan neih loh thu kan dawng a, a lawmawm khawp mai a. Chutih ruala ka zawh belh duh chu –

India ramah state pahnih Goa leh Uttarakhand ten tunah hian hman turin hma an la mek a, an State Assembly ah an pass tawh a. Keini hi nakinah Parliament-in lo pass in min impose tum ta se, Memorandum of Settlement a Article 371(G) kan neih khan hei hi hmang lo turin min chhan thei dawn em? Article 371(G)-ah khan ‘No Act of Parliament applies to Mizoram in the areas of Religion or Social Practice Mizo Customary Law and Procedure and Administration of Law & Criminal Justice’ tih a ni a. Kha khan min a chhan thei dawn em?

Nikum Dec. 2024 khan ‘Protected Area Permitted (PAP)’ kan tih Kum 14 zet hlih ni tawh kha Central Sorkarin Mizoram, Manipur leh Nagaland-ah te hman turin a rawn impose thar leh a. Hemi chungchangah hi Mizoram Sorkar hian engnge a ngaih dan? Kan state thenawmte chuan an react a, an dodal a ni. Mizoram hian dodalna a nei ve tawh em?

‘Free Movement Regime’ kan thenawm, a bik takin Myanmar kan unau te nen kan inkalpawhna, hun rei tak kalphunga kan lo neih thin te India sorkarin rawn tidanglamin, vawinni ah identity proof leh a kal theih chin te pawh an tihtawi takah hian, Mizoram Sorkar hian hemi chungchangah hian engnge a ngaih dan? Central Sorkarah Mizoram Sorkar hian a ngaih dan a thlen tawh em? Kan thenawm Nagaland te chuan All-party meeting te neiin delegation te Union Home Minister hnenah thlena heng thil te hi sawi tura an insiam mek lai hian, Mizoram Sorkar hian hnam himna atan hian engnge ngaihtuahna a neih?

**PU ROBERT ROMAWIA ROYTE:** Pu Speaker, House leader leh kan Chief Minister zahawm tak, GAD Minister ni bawk chhan atana ka zawhbelhna chu - Tun hnai deuhah GAD leh Assam Rifles ten inremna thuthlung Delhi-ah an zia a. Chutih mek lai chuan, Mizoram kalphung leh Mizoram - Allocation of Business Rules-ah chuan Assam Rifles te insuan chungchang hi chiang takin Home Department chan a ni lawi si a. RTI leh zawhna dang atanga kan zawhin, Home Department hian inremna thuthlung an sign kha official-in an hriatpui lo a, vet pawh an vet lo nia sawi a awm a. Eng vangin nge Home Department-in Memorandum of Agreement Assam Rifles te nen pawh lo sawi hoa, an lo inchhan zak zakna MoA tha tak mai kha ngaihpawimawh a nih loh? Home Department chan ni reng si kha, GAD atanga kha agreement kha engtia sign teh daih nge a nih? Hmanhmawh thlak thil te a awm nge nia, Home Department draft tha tak kha nawr tlang zawh loh hlauh vang zawk?

**SPEAKER** : A theih ang ang a chhang turin GAD changtu, kan House Leader Pu Lalduhoma ilo sawm ang.

**PU LALDUHOMA, CHIEF MINISTER:** Pu Speaker, UCC hi an pass dawn pawh khan a dodal nasa bertu kan ni a. Khatih laia kan aiawhtute khan kan duh ang tawka na khan an dodal lo niin kan hria a, han vote pui te pawh kha hlauhawm deuh ni khan kan hria a, kha kha tha lo kan ti em em a. Chuvang chuan, min rawn barhluih an tum pawhin theihtawpin kan tang ang a, 371(G) phenah hian kan him turah pawh kan inngai a. Tin, Sorkar chauh nilo kan za vaiin, kan NGO te nen chutiang thil a lo thleng a nih chuan kan tang ho dawn nia.

Tin, PAP chungchang hi, nikum June - December ah khan Aizawl-ah foreigner mi 2000 dawn lai an lo lut a ni. Chuti khawpa tam si kha, khawlai ah hmuh tur an awm mang hauh si lova. Ramri te kanin khilam Chin Hills-ah training te an han pe nia hriat a ni a. Chung zingah chuan British regular Army, Ukraine indona tel ve te pawh kha a lo haw lam man a ni a, cartridge te a ipteah a lo awm a. Tin, America Ambassador te pawh kha State Sorkar engmah min rawn miah lovin a rawn leh lang phut mai bawk a. Khatiang neuh neuh kha a nih avangin, tunlai kan geo-politics ah hian China te, USA te, India te hian khilai kan ral leh lam khi nasa takin an ngaihven a ni a. Foreigner te kalkawng kan ni ta lutuk leh, helaiah tourist pangngaite chu lo ni se, hmuh tur tamtak an awm ang a. A sang tel meuh, hmuh tur awm mang si lo kha, India Sorkar a ngaih a thalo a ni. Chuvang chuan, keini chauh ni lo, kahtianga buai deuh leh foreigners kalkawng deuh laiah khan PAP impose hi a tul nia an hriat avangin, an impose a ni. Keini chuan tha kan ti lo a, tha kan tih loh thu pawh kan sawi a, India sorkar ngaihah erawh chuan hei hi chu thil tul tak niin an ngai ve a, na tak pawhin kan nawr bik chuang lo a ni.

Tin, FMR chungchang pawh hetiang deuh tho hi a ni a. Tunah hian smuggling te, tualthah te leh eng emaw tam zia te kan hria a. Zalen lutuka kan inkalpawh hian thil tam tak thalo lam hi a lo thleng tel ve a; kan unaute raltitna avanga lo lutte chu kan lo enkawl tur a ni teh meuh mai; mahse, ral lemlamah an khua hmuh theih maiah a awm a, a ralmuang em em a; haw tum tawh chuang lo te pawh mi eng emaw zah an awm a ni. Chutiang chu anih avangin, free lutuka kan inkalpawh hian thil thalo tam tak a ken tel avangin, drugs te, silai te, silaimu te leh chi hrang hrang; helamah soal rawngbawlin tualthahna emaw pawh lo thleng sela, kar lova ral lehlam kai theih mai te a lo ni a. Zalen lutuka an awm hi kan mipui tam tak pawh hian a thalo zawk an ti ve deuhin ka hria. Keini duh danah chuan, kan unaute nen hian zalen takin inkalpawh thei zel kha kan duh rual rualin, Central sorkarin a rawn tih takah chuan, ‘a tulna lai te pawh a awm e; a that zawkna lai te pawh a awm ve e’, te kan ti deuh a ni.

Pu Robert-a zawhna kha, draft agreement hi hun rei tak chhunga lo kal tawh kha a ni a, Home Department-in a lo kengkawh ngar ngar thin a ni. ‘Home Department nena MoA tha tak siam’ han tih erawh kha chu, Home Department nena MoA an lo siam kha keini chuan pawm tlakah kan ngai lo a, a tharin kan siam a ni. Delhi-ah Defence Minister te, Army Chief te, Home Minister te, DIB te kan hmu a, kan sawi kan sawi a; engmah ziakin kan inkarah a awm lo, verbal vekin. Chaw te kan ei hova, kan ti a, kan han draft a, ‘a that tawh hi maw le, i sign mai ang u hmiang’ kan ti phut mai a ni, Delhi-a kan awmlai khan. Delhi-ah khan kan MLA-te, opposition MLA-te pawh an awm a, ‘kan zavai hian i hriatpui ang u’ kan ti a, Mizoram House-ah. Khatia kan duh dan anga sign theih a nih kha chuan,

han tih muangchan leh te kha tha kan ti lo a. Harsatna te a lo piang leh ang tih hlauhthawna te pawh a awm avangin, 'sign vat ila a tha ang e' kan ti a, kan sign vat a.

**PU ROBERT ROMAWIA ROYTE:** Pu Speaker, *point of clarification*. Kan House Leader zahawm tak khan 'MoA Mizoram Home Department-in a lo siam kha pawmtlakah kan ngai lo keini chuan' tih ang kha, a chhiar lo em maw aw ka ti a. Tuna GAD-in khulaia chawpchilh taka an han sign rum rum kha, chhimitir leh sazuk khaikhin ang vel a ni, dik tak chuan; Mizoram sorkar tan a inthat hleih lutuk a. Mahse, Mizoram sorkar - Home Department-in duh thala a siam kha Assam Rifles khan a pawm mai lo zawk kha a ni a. Khami pawm tir tum khan kan sorkar a tang ta lova, a awlsam zawng, a pawmpui zawngin an chhuak dawn a lawm le; an chhuak mek tawh a lawm le...

**PU LALDUHOMA, CHIEF MINISTER:** Member zahawm tak Pu Robert-a sawi kha ka pawm a. A inthat hleih zia kha, in that hleih tak a ni. MoA hmasaah kha chuan quarters guard leh a chung tlang zawng zawngte pawh hi la retain tur a ni vek a, chu chu keini chuan kan chhuahtir vek a ni.

Chuvang chuan, a hmasa kha keini chuan pawmtlakah kan ngai lova, sorkar hmasa pawh khan a pawm kan ti chuang lova. Inbiakna kha a kal mek a, an final theilo kha a ni mai a. A thara tih a ngai a, kan sorkar hma khan sorkar hmasa khan department ram zawng zawng, sorkar ram kan tih bik hi GAD kutah a lo dah tawh a ni. Tunah chuan centralised a ni a, department-in an luah a ni mai a, neitu leh a kawltu chu GAD a ni tawh a. Assam Rifles ram chhuahsan tur pawh hi GAD kuta awm tur a ni a, hei hi sorkar hmasa hmalakna kan chhunzawmna a ni mai.

**SPEAKER** : A lawmawm e.

*Starred Question No. 87: Lai Autonomous District Council chungchang.*

*Zawhna Neitu:* Pu C. Ngunlianchunga.

**PU C. NGUNLIANCHUNGA:** Pu Speaker, ka lawm e. Starred Question No. 87 chu:

- a) Lai Autonomous District Council (LADC) ah ZPM sorkar dinna tur atan kan Chief Minister hian members (MDC) te hnenah commitment (thutiam) a nei em?
- b) Commitment a neih chuan, kimchang takin min hrilh thei em?

**SPEAKER** : Kan House Leader a rim tlah tlah hle mai a. Chhang turin, GAD changtu kan Chief Minister zahawm tak ilo sawm ang.

**PU LALDUHOMA, CHIEF MINISTER:** Pu Speaker, a chhanna chu –  
'Nei lo' tih a ni e.

**SPEAKER** : Zawhbelhna:  
1. Pu C. Ngunlianchunga, (Zawhna Neitu),  
2. Pu Lalmuanpuia Punte,  
3. Pu Rasik Mohan Chakma.

**PU C. NGUNLIANCHUNGA:** Pu Speaker, MNYF & Lai DYCC, Lawngtlai, Ni 27 February thla statement hi Pu Speaker, i phalnain ka han chhiar chhuak teh ang.

“Vawiin Ni 27 February, 2025 chanchinbu mite kaltlanga Zoram-mipui hmaa LADC-sorkar dinglai United Legislature Party (ULP) namthlua, ZPM sorkar din theihna tura awm leh mawi pawh thlu lova Mizoram ZPM sorkarin rorelna chang tura a-thim, a-var pawh thlu lova sorkar thuneihna hmang leh, an thutiam bawhchhiaa an chet dan te Mizoram mipui hriatah puanchhuah a tul tlat mai a. Thudik puanchhuah hi kan sorkara kan tehfung pawimawha kan hman a that kan ring a. Thudik puang chhuak tur chuan a diklo lai tarlan a tul miau avangin, mimal inhuatna/inselna emaw, a pawng a puia party inchirhthelna a ni ngawt lo, tih ka sawi duh baw k a.

Pu Speaker, Mizoram Assembly session-ah khan kan Leader of Opposition, Pu Lalchandama Ralte leh Congress MLA, Pu C. Ngunlianchunga te khan tuna LADC sorkar inthlak chungchang an sawiah khan kan Chief Minister, Pu Lalduhoma khan chiang taka sawiin, “LADC-a sorkar siam tur hian eng pressure mah kan siam lo. Kan party-ah lo luh an duh a, keini chuan lawm takin kan lo dawngsawng mai a ni” a ti a nih kha. Hetiang taka kan CM dawt sawi thei kan nei hi a vanduaithlak hle a ni. Thudik chu hetiang hi a ni:

September, Ni 13, 2024-ah khan CM ngei hian amah Pu V. Zirsanga phone-a biain, a office-ah a ko chho a, “Pu Zir, i hova LADC-a sorkar siam ka duh a ni” tiin a lo sawm daih tawh a ni. Sorkarna siam a nih chuan, a personal thil tih hi kan hriat theuh angin, tunah hian thubuai nei a ni a..... (**Speaker:** I zawhna kha zawt ta mai la a tha ang a, thildang sawikual lo khan. Hun i paih baw k sia.) Pu Speaker phalnain ka’n chhiar a ni.

Tichuan, hmanna ka zawh khan ‘document engmah a awm lo’ in tih avang khan, hei, a document ka rawn keng a ni. House property atan leh i copy tur pawh rawn pek che ka duh a. Ka zawh duh lai chu, Ni 13.9.2024-ah khan Chief Minister Office-ah inkawm a ni a. Chu thu chu Wildlife sanctuary te leh..... (Interruption)

**SPEAKER** : Hmanni khan ka han sawi zawk chu, material evidence a awm lo ka ti a. Party pakhat thuchhuah kha evidence a tling lova, hmanna i sawi kha chu. ‘Kan Chief Minister-in a tiam em; a tiam lo maw, chutiang khatiang chuan; a be lo maw’ i ti a, kha kha matarial evidence a awm si lova. ‘Khatiang kha chu House chhungah chuan a tha lo ang a, member leh member inpuhna ang chi, inchirhthelna ang chi kha chu a fel lo ve’, ka ti kha a ni a. Party pakhat thuchhuak a ni a, kha kha chu evidence a tling chiah lo a ni; evidence ah kan ngai lo a ni.

**PU C. NGUNLIANCHUNGA:** Pu Speaker, khawngaihin, ka han sawi zo lawk ang e. Pu V. Zirsanga hian Ni 10.2.2025-ah tuna MNF-MDC 10 te a ina an len laiin a sawi a ni. He press statement hi Ni 27.3.2025 a chhuak a ni a, a diklo a nih chuan, ‘hei hi a diklo a ni’, tia sawiselna a awm lo a. Pu Speaker, hmanna ka zawh khan, ‘engmah document a awm lo ve’, in tih avang khan, hei hi vawiinah House property atan ka rawn keng a ni. Press release No.1 of 2024, Ni 7.2.2024-a chhuakah khan chiang takin a rawn inziak a. Pu Speaker, kha press release kha i phalna dilin ka chhiar a ni.

Pu Speaker, ka zawhna chu - Ni 24.9.2024 khan an lo inhmu ngei em? Tichuan, he thu hi Ni 10.2.2025 zanah MNF VC 10 te hnenah Pu V. Zirsanga hian a sawichhuak ta si a. Tunah hian kan House Leader zahawm tak khan, “engmah intiamna a awm lo”, a tih kha, Ngengpui-Wildlife Sanctuary te, Phawngpui-National Park te leh officer post 20 tuna la fill-up loh te permission pek turin a lo sawipui reng em? Kha kha a document a awm avangin

karawn tarlang a, heng hi karawn zawt nghal a ni e. House property atan pawh ka pe bawk e. Pu Speaker, a naka zen chuan a thip deuh sak chu a nih hmel hle mai. Ka lawm e.

**SPEAKER** : Ni e, a tha a, kan member kha senior a ni a. Party pakhat thuchhuah ang chi te hi chu House ah hi chuan chhiarchhuak fo lo ila, tunah khan a zawhna tinghettu leh tichiangtu atan a refer mai ni ah ka ngai deuh a. Mahse, a ngial-ngan khan a chhiar chhuak ta a, kan inkhap ta lo kha a ni a. Khatiang kha chu avoid hram hram ila. Party hrang hranga awm kan ni a, thlirna chi hrang hrang atanga thlir kan ni a. Amaherawh chu, mipui tana rorel kan ni a, kan sawi leh kan thil inzawh te hi a pawimawh em em vek a ni, tih kha kan hailo tlang ang a.

Hmanni khan, ‘document a awmlo’ ka ti lova, ‘evidence a awm lo’ ka ti a ni. An inbia anih chuan, voice record emaw te awm tur a ni, video te emaw. A document kha ka sawi lova; document i rawn tih hi, MNYF te thu chhuah a la ni leh ta zel a. Engpawh nise, kha lai kha chu ka sawi lo ang a, i zawhna a Chiang a. Chutiang chu sawi a awm em, awm lo em, tih kha chu a changtu Minister in a rawn sawifiah turah ngai ila.

Tunah chuan, Zawhbelhna zawt turin, Pu Lalmuanpuia Punte ilo sawm ang.

**PU LALMUANPUIA PUNTE:** Pu Speaker, LADC Chief Executive Member thar Pu V. Zirsanga hian eng eng case te nge a neih?

**PU RASIK MOHAN CHAKMA:** Pu Speaker, LADC ang tho khan CADC-ah pawh sorkar thlak in a awm a. No confidence Motion-ah ZPM-MDC te sawi dan chuan, ‘ZPM an sorkar phawt chuan, Council-a hnathawkte hlawh thla 4 lai daih lo kha, tuna sorkarna siamtute’n pek min tiam a ni’ an ti a. Chu chu a dik em? An tiam reng em? ZPM a sorkar loh avang em ni, additional-ah khan engmah min pek loh? Sorkarin an hlawh indaihlo a hriat chuan, engvangin nge kumin hian cheng khat mah a pek loh? Hei hi ZPM an sorkar loh hrim hrim vang a ni em?

**SPEAKER** : Aw le; a theih ang anga chhang turin GAD changtu Minister, Chief Minister ni bawk Pu Lalduhoma ilo sawm ang.

**PU LALDUHOMA, CHIEF MINISTER:** Pu Speaker, a hnunung ber kha ka han chhang hmasa ber ang a -

Sawlai saw a buaithlak khawp mai a, chawhma lam leh chawhnu lam te hi a danglam thei em em mai a. Kan Governor pawh khan “order kan peih hmam in danglam leh mai lovang maw?”, a lo ti nghe nghe a. Ti sawn an insiksawi an insiksawi a, an inbiakna eng thu thu te nge, an lamtang siam nan engnge an hman keini lam chuan kan hriatpui lo. Hlawh chungchangah chuan salary leh non-salary a hrana a awm tak loh hnu hian CADC sawn remchangah an la nasa em em a, hlawh ringawtah an budget pumpui atanga 95% vel an hmang tawh a, tihngaihna a awmlo a ni. Kum khata an budget neih zat an hria a, revise-ah tlema zawng kan pek belh thin tih pawh an hria. Sawti reng renga an kal chuan, hlawh an la dawnlo a ni mai a ni. Hlawh la lovin an awm thuap ang; tihngaihna kan hre bik lo. A chhan chu, thildanga mi tur an hmang zel a, sorkar hnathawk an lak belh reng bawk si a. Sawtiang administration saw chu tihngaihna a awm lova, insiam tha ve se kan duh ngawih

ngawih a ni. An sum an hman dik loh avanga hlawh la thei lova an lo awm a nih pawhin, anmahni mawh phurhna a ni ang.

Tin, ka statement hmasa, “Mi tupawh kan hnena lo kal chu lawm takin kan pawm; tumah kan tilui dawn lo”, tih kha kan dinna a la ni reng a. Miin an lo awmna thin pawl policy an lo aupui thin te tuipui tawh lova, piantharna rilru nen ‘kalphung-thar pawlah hian ka han awm ve teh ang’ an tih chuan, Pu Speaker, i veilama mi zawng zawng pawh hi kan pawm vek a ni.

Tin, ‘Pu V. Zirsanga nen phone-in an inbia’ tih kha, Pu V. Zirsanga kher lo MDC dangte pawhin min rawn hmuha min biak chuan, kan be ve lo thei lo va. Miin kan pawla awm an duh chuan, ‘in pawla awm kan duh ve e’ te an rawn ti ang chu; min rawn hmu ang chu; min rawn bia ang chu, engnge soal awm? Tin, ‘Pu Zirsanga’n MDC 10 hnenah a sawi’ tih ang te kha chu, a sawi leh sawi loh kha keini hriat phak a ni tawh lo; tunge mi 10-te pawh chu kan hre lo. Khalai mi pakhat thusawi helaia inzawh kha chu, anmahni zawhfiah theih an ni bawh si lo va.

**PU C. NGUNLIANCHUNGA:** Pu Speaker, khawngaihtakin, kan Chief Minister hian September Ni 13, 2024 ah khan helaia ka han sawi, “Nangmah nena District Council-a sorkar siam ka duh; I lo kal theih chuan heng - provincialise te, i personal case te, Phawngpui Tlang te, Ngengpui te, officer post 20 te...” tih thu Pu Zirsanga’n MDC 10-te hnena a sawi kha, kan Chief Minister hian Pu Zirsanga hnenah khan a lo sawi reng em, tih kha a ni ka zawhna chu.

**SPEAKER** : Khawngaihni, Zawhna leh Chhanna hun a zo va, kan chhan zawh tir law law dawn em ni ang?  
(*House-in chhan zawh tir a remti a..*)

**PU LALDUHOMA, CHIEF MINISTER:** Saw lama hotute ruling an ni emaw, opposition an ni emaw kan CEM te pawhin (tuna Pu Nguna sawi ang kha chu) ka bulah hian an sawi theuh; Pu Zirsanga khan a sawi fal bik a ni lo. Kan CEM te pawhin min hmuh apianga an rawn sawi chu - Mizoram-sorkar hnuaiyah zirtirtu an awm a, District Council hnuaiyah an awm bawh a, Pu hrang hrang an neih a buaithlakzia an sawi thin a. Chu mi siamrem tul an tih thu an sawi vek.

Tin, Wildlife pawh ‘kan kutah a pumhlumin dah rawh u’ an ti a, kan remti a ni, hei hi. Chu chu kan CEM te pawhin an rawn sawi thin a ni a. Wildlife te saw an kutah lut vek se kan duh a. Amaherawh chu, thil tihfel ngai tlem a la awm avangin, a tih zung-zung theih loh a. Tin, Zirtirtute pawh an kutah awm vek law law sela, sawtah engkim an control-na hnuaiyah. Helai Mizoram-sorkar hnuaiyah thawkte nen an awm a; hlawh inang lo, ACR ziaktu inang bawh si lo, action la theitu inang bawh si lova kalte pawh hi a tha lo viau mai, kan ti a. Heng hi chu a thuphung pawhin tha kan tihpui a. Kan CEM te leh kan member dangte pawhin an rawn sawi fo a ni.

Tin, ‘Press Release’ tih te kha chu - kan hriat angin Press Release hmang hian kan indeng tawn vak vak reng a. Henga kan inbeihna ang te, khawlchhut a nih vang mai khan a dik vek lo tih kha hriat tur a ni a. Khang kha helaiah leklam taka rawn neih chi a nih pawh ka ring lem lo.

**PU C. NGUNLIANCHUNGA:** Pu Speaker, Point of Order - Khalai kha a diklo a nih chuan, Press Release veka chhan ve mai awm tak a ni a; a chhang ve tawh bawk si lo a. Tin, kan hotute'n District Council provincialise chungchang kha, 'a dik lo a ni' an tih kha, an sawi kha a dik a; kha kha sawlai Council te an harsatna pawh a ni. School pakhtah Mizoram Sorkar leh District Council staff-te thawh dunna, dual-function a awm a ni' tih kha, sorkar hmasa pawh theihtawpin kan lo sawipui a, chu chu tu pawhin an sawi ang. Amaherawhchu, tuna ka zawhna tak zawk erawh chu, 'ZPM Sorkar min siampui ka duh a ni; min siampui chuan hengte pawh hi kan tihsak ang che u' tih kha, - A lo ti reng em, Pu Speaker?

**PU LALDUHOMA, CHIEF MINISTER:** Pu Speaker, tuna min rawn zawm tharte'n ZPM-sorkar an siam tur hi ZPM zingah pawh duh lo tam tak an awm a ni. Amaherawh chu, mi kan pawla an lo luh chuan, kan pawm tur a ni. Kalphung-thar hnuaiah chuan 'tumah kan thalo vak tawh lo ang' tih kan rin avangin, kan pawm a ni mai a. Sorkar siam theina na-na siam loh tlat thu kha a awm lo va, chu chu a ni mai a.

Tin, PR kan chhan leh chhan loh tur thu te kha chu, keimahni thuneihnaah min dah sak ve se maw le. Kan duh leh kan chhang ang a, kan duh loh leh kan chhang lo ang a. PR zawng zawng chhan vek tlak pawh a nilo, chhan vek sen pawh a nilo. Media lam (keini lam nilo) hian an rawn chhang let nasa thei em em a, a tawk viau a ni kha kha.

Tin, Member zahawm tak, Pu Muanpuia'n – 'Pu Zirsanga'n eng case te nge a neih?' a tih kha - Pu Zirsanga hian case 2 a nei a, pakhtah chuan, Court hniam zawkin a convict tawh a, chu chu High Court-ah a appeal mek a ni. Appeal lai anih avangin tunah hian convict kan ti thei lo va, mi-zalen a ni rih a. Chu lo case dang pakhat a neiha a main-accused chu, Pu Speaker, zawhna neitu, Pu Ngunlianchunga case hi a ni a. Chu chu, 'Pu C. Ngunlianchunga and 14 others' tih a ni. He mi chungchangah hian charge-sheet peih thawkhat a ni tawh a, prosecution sanction dil mek a ni bawk a. Chuvang chuan, anticipatory-bail lo lak te pawh a that ka ring. (**Pu C. Ngunlianchunga:** Pu Speaker, vawiin thleng hian case ka neih ka hre lo.) A nih chuan, ka lo chhiarchhuak ang e. (**Pu C. Ngunlianchunga:** Aw, han chhiarchhuak rawh.)

**PU LALCHHANDAMA RALTE, OPP. LEADER:** Pu Speaker, Member zahawm tak Hrangturzo Bialtu khan 'eng case nge' a ti a, tuna CEM-a kan pawm tak hi corruption-case a ni em? ZPM thalaite thuchhuahah khan, 'Corruption case V. Zirsanga, MNF hun laia awm kha kan duh lo' an tiha kha, amah kha mi hran nge, amah hi a ngai reng? Kha an duh loh thin kha, an duh thut em?

**PU ROBERT ROMAWIA ROYTE:** Pu Speaker. Kan House Leader sawi ang khan, prosecution order kha an ngaihtuah mek em aw? Chutiang tura submit ni ang deuh khan a sawiin ka hria a, ka hre sual a ni mai thei a. Prosecution order la awmlo, case register pawh la awmlo kha, 'case nei' tih anga inpuh kha a chi dawn em ni?

**PU LALDUHOMA, CHIEF MINISTER:** Pu Speaker, i vei lama mite hian thil hi an hre sual thei khawp mai a. Case nei lo tan prosecution-sanction an dil ngai reng reng em maw ni le, khawvelah hian le? Chuvang chuan, Pu Zirsanga chu kan Member zahawm tak Pu Nguna case-a inhnawih mi 14 te zingah hian a tel ve a ni. Chuvang chuan, an case chu a inang reng a. A case chu - 'ACB PS Case No.4/2022 dt.26.5.2022 under Section 409/120 B/34 IPC read with 11/13(a)(1)(b) &13-2 PC Act 1988' a ni a, (A mihring hmingte hi chu

chhiarchhuak vek lo ila), hei hi tunah hian charge-sheet peih a ni tawh a, prosecution-sanction dil mek a ni. Pu Speaker, ka thawhpuite pawh hi ni se, case an neiha prosecution sanction an rawn dil chuan, ka pe dawn; tumah hum ka tum lo. Tun hma lam khan prosecution-sanction dil inhum te a lo awm tawh thin a, kan Sorkar hian hum kan tum ve lo.

**PU C. NGUNLIANCHUNGA:** Pu Speaker, a case kha, eng case nge han sawi chiang sela; a case number ringawt chuan ka hrethiam lo. Vawiin thleng hian ACB case ka neih ka hre lo. Tunah Pu Zirsanga hi, enquiry te pawh a lo kal a, Lawngtlai by-pass road chungchangah. CEM ka nih laiin Central-ah project kan siam a, 11 crore a lo chhuak a, chutih hun lai chu MLA ka inpek dawn hnaih kha a ni a. 4.70 crore a lo chhuak a, naia khat pawh ka khawih lo, Pathian khawngaihna zarah. ACB an lo kal pawhin, ‘he case ah hian telna pakhatmah ka neilo’ ka lo ti a ni. Chu chu ka hnena lo kalte an ni a. Chuvang chuan, case ka neih ka hrelo. Case nei chu ni ila chuan, ka hre ve ang chu maw le. Chuvang chuan, Pu Speaker, thu dik hi sawi thin ila a thain ka hria a. Keimahah chuan prosecution-sanction kha chu dil a ngaih pawh ka ringlo.

**PU LALDUHOMA, CHIEF MINISTER:** Pu Speaker, hmanah pawh khan case neih inhre tlat lo kha kan nei tawh a, a buaithlak khawp mai. Member zahawm tak Pu Nguna hian case a nei teh meuh a. Chuvangin, anticipatory bail lo la turin ka advice duh a ni.

**PU C. NGUNLIANCHUNGA:** Pu Speaker, ka nei bawk lo va, ka la bawk lo ang. Khatiang case ka neih ka hre lo. Khatiang case ka neih ka hrelo; vawiinni thlengin case ka neih ka hrelo tlat. Preliminary inquiry te chu an lo kal teh meuh mai; chutah pawh ka lo sawi chu – ‘he thilah hian ka signature emaw telna pakhatmah ka neilo. Pathian leh mipui zarah vawiinni thlenga ka kalna ah hian, ka hlawh lo hi cheng khat mah ka la ngailo bawk. Chu chu a ni, Pu Speaker.

**PU LALDUHOMA, CHIEF MINISTER:** A case chungchang - ‘eng case nge a niha, engnge a tihsual’ tih te kha chu sawi kher a ngai lo a, ka nei vek a. Pu Speaker, ‘Pu Zirsanga’n eng case nge a neih’ tih zawh a ni a, ka chhang a ni. Zirsanga’n case a neihah hian a main-accuse chu Pu Nguna anih thu ka sawi a, ‘Pu Nguna and fourteen others’ tih zingah hian a tel ve thu ka sawi mai a ni. Chu chu a case no. nen lam ka sawi tawh a.

**PU C. NGUNLIANCHUNGA:** Pu Speaker, Pu Zirsanga an convict-na kha, khatah khan ka tel lo. Kha kha Provincialised chungchanga pawisa ACB-in an man avanga case kha nei a niin ka hria. Hetah pawh hian a lang chiang a; hei hi ZPM Press Release a ni a.

Tichuan, Pu Speaker, tuna a sawi kha Lawngtlai by-pass Road a ni. Ka chhuah hnuah ka hunlaia mi kha vawiinni thlengin an ti pamhmai a, kha project kha an tihlawhchham thak reng a ni. Ka hunlaia an sawi pawhin, “Nang chu la CM la chu he kawng hi a tlang tawh ang maw le” an ti ve a ni. Pathian khawngaihna zarah kha thilah khan, Pathian hmingin vawiinniah hian ka sawi duh - telna naia phelah pawh ka nei lo; thuneihna hmansual kawngah pawh pakhat mah telna ka nei lo.

**PU LALCHHANDAMA RALTE, OPP. LEADER:** Kan House Leader-in direct tak maia kan senior member hnenah, ‘case i nei a, anticipatory bail la rawh’ han tih tawng te

kha chu, he House zahawmna atan hian a mawilo ka ti a. Chuvangin, he Zawhna leh Chhanna hi tihawp tawh a thalo maw?

**PU LALDUHOMA, CHIEF MINISTER:** Pu Speaker, a zawhna ka chhang a ni a, ka chhanna kha lo ngaithla ve sela. ‘Pu V. Zirsanga’ n eng case-te nge a neih’ tih min zawt a, case pakhat a neih thu ka sawi a, chu chu appeal mek a ni ka ti a. Chutah chuan kan member zahawm tak hi a tel ka ti lo. Case dang pakhat a neih (tuna kan member zahawm tak case) erawh hi chu, accuse zingah Pu Zirsanga hi a ni ve a; min zawh avangin chu chu ka chhang lo theilo a ni. Chuvang chuan, case reng reng chu an investigate-a thu a tlin loh chuan, final report an pe a, a tawp mai thin. Thu a tlina, ‘hei hi thilsual vang a ni e’ an tih chuan, charge-sheet an theh lut a. Sorkar-hnathawk emaw, MLA-te emaw, MDC-te emaw an lo nih chuan, prosecution sanction an dil thin a, chu chu ‘dil mek a ni’ tih kha ka sawi mai a ni.

**PU C. NGUNLIANCHUNGA:** Pu Speaker, khawngaih takin ka han sawifiah lawk ang, kha case kha.

Pu Zirsanga kha ka a dawt chiaha CEM a ni a, khata a CEM khan a project-a kha an tipangma ta a ni. Tichuan, prosecution order emaw, sanction a tul a nih pawhin, kan Chief Minister khan ka chungchangah chuan lo pe rawh se. Tichuan, ka dikna emaw, ka diklohna emaw an hmu loa tang tur ka nih pawhin, ka tang mai ang, Pu Speaker. He case hi sorkar hmasa ah khan CBI-ah pek an tum a, mahse, an pe leh ta lova, CBI ho pawh lo kal se ka ti a lawm; Pathian khawngaihna zarah Pu Speaker, khatah khan chutiang vaka hlauthawn tur ka neilo e.

**SPEAKER** : Aw le, a tawk tawh e. Kha kha chu a ti turin an lo ti ang a, court lamah; a lo fel loh tak leh an lo chhang fihlim mai dawn a lawm.

### **PRESENTATION OF REPORT**

Tunah chuan, Presentation of Reports-ah kan kal ang a. Lt. Col. Clement Lalhmingthanga, Chairman of Committee on Paper Laid on the Table to present – ‘*The First Report on Actions Taken by the Government against the recommendations contained in the Seventh Report of Committee on Papers Laid on the Table relating to Commerce & Industries Department*’ on the Table of this House.

**LT. COL. CLEMENT LALHMINGTHANGA:** Pu Speaker, ka lawm e. Pu Speaker, i phalnain – ‘*The First Report on Actions Taken by the Government against the recommendations contained in the Seventh Report of Committee on Papers Laid on the Table relating to Commerce & Industries Department*’ hi rule No. 229 of Rules of Procedure and Conduct of Business in Mizoram Legislative Assembly-in alo phal angin, Speaker zahawm tak hnenah present a lo ni tawh a. Chu chu vawiiin 10<sup>th</sup> March 2025 hian Pu Speaker, i phalna leh he House zahawm tak remtihain he House zahawm takah hian karawn present e. Ka lawm e.

(A copy sem a ni a.)

### **LEGISLATIVE BUSINESS:**

**SPEAKER** : A lawmawm e. Tunah chuan *Legislative Business*-ah kan kal ang a. Government Bill sawiho tur pakhat kan nei a. Bill copy hi member-te hnenah kan sem lawk vek tawh a – ‘The Mizoram Liquor (Prohibition) Amendment Bill, 2025’ tih hi,

a bill neitu Pu Lalnghinglova Hmar, Minister zahawm takin he House-ah introduce phalna rawn dil turin ilo sawm ang u.

**PU LALNGHINGLOVA HMAR, MINISTER:** Pu Speaker, i phalna leh he House remtihain, ‘The Mizoram Liquor (Prohibition) Amendment Bill, 2025’ hi introduce phalna ka rawn dil a. Tin, sawiho phalna ka rawn dil nghal baw k e.

**SPEAKER** : Le, Bill neitu Minister zahawm takin House-ah introduce phalna a rawn dil a. Kan phal sak em? (House-in a phal sak a.) Kan phalsak chuan, tunah introduce sela, sawiho turin rawn move nghal baw k sela.

**PU LALNGHINGLOVA HMAR, MINISTER:** Pu Speaker, ‘The Mizoram Liquor (Prohibition) Amendment Bill, 2025’ hi (i phalnain) wawiinah hian min sawiho sak turin House member-te ka sawm a.

Pu Speaker, kan sawiho hmain, he bill hi kan beisei loh ang deuh ni dawnin ka hria a. Kha, hman deuh (Faktea hunlai ti mai ang), khatih lai khan inlarna an hmu sup sup mai a, a veng te chu ka sawi lo ang a. Chutah chuan, school pakhtah hian vantirhkoh inlar an hmu a, ‘vantirhkoh an hmu e’ an ti a, an tlankhawm a. Mobile phone leh facebook te awm hma kha a ni a, inhrilh hriat zela tlankhawm kha an ni a. A sang dawn an pungkhawm tawh a ni.

Chutah chuan, kan thianpa pakhat hian, ‘ka han thleng ve a..’ a tia lawm. A hmun ka han thleng chu, mipui tam tak karah khan inlarna kha an hmu a, a then kha an rak deuh thawt thawt tawh a. Ka va hawi phei chu, kan veng mi-ang mang lo hian, ‘he lai hi a thla a ni a, he lai hi a lu a ni a’, a lo ti a; ‘a tira kan rin ang leh a tak kha a lo inang lo khawp mai’ a ti a. Chutiang deuh chu ani mai thei a, tuna kan MLP Amendment bill-a pawh hi. A chhan chu, mi tam takin ‘bonded-warehouse ka duh ve a nia aw; wine-shop phalna kha ka duh a nia aw’ a rawn ti a, message te kan han dawng a. A thenin min hau a, a thenin min fuih a, a thenin min tawngtaipui a, a thenin ‘huaisen takin kal zel rawh u’ te min ti baw k a. He MLP Amendment bill a chhung taka hi hria se chuan, kang zawng zawng thu te kha Pu Speaker, sawi a ngailo turah kan ngai a.

A nihna tak kan han sawi hnua, i veilama mite anni emaw, i dinglama mite kan ni emaw Zoram-mipui hian eng bill nge kan putluh tih an hriat hunah chuan, min pawmpui ngei pawh kan beisei tlat a ni. Tichuan, ‘MLP Amendment Bill chu engvangin nge in putluh tak mai’ tih zawhna a awm thei a. ‘Sum hmuhna tur em ni?’ tih kha zawhna hmasa a ni a. Sorkar ve riang-ruang tan chuan he bill-a kan pass tur atang hian han it tham sum a awm lem lo a. Chuvang chuan, sum chu lut taw k awm mahse, sum hmuhna tur lian ang kha a ni lo a ni.

Kan hria a, MLTP Act, 2014-a wine-shop (a senchi kan ti mai ang chu) zu zawrh phalsaka, sum tam tak chhiah atanga lakluh ang chi kha a ni dawn lova. Tin, a senchi leh pawnlam atanga beer lakluha kan hralh ang chi kha a ni dawn lo phawt a. A nih leh, vote in hmuh belhna tur em ni; in party hlawkpuina tur em ni, tih zawhna a awm thei a. Pu Speaker, chu lam pawh chu a la ni ta chuang lo a, han hmingthat belh viauna tur pawh tun dinhmunah chuan a awm lo mai thei a, nakinah erawh chuan a awm kan beisei tlat a. Amaerawhchu, Pu Speaker, kan rawn putluh chhan chu hei hi – Kut-hnathawktute lamtang bill a ni. Mizoram-a kut-hnathawktute an saltanna atanga an zalenna tur dar vuakna tur bill a ni.

Chu chu kan rawn putlulh chhan a ni. Zu phalrain a bill a ni lo a, ‘Zu khap-burna a ngheh leh zual zawkna tur bill a ni’ tih pawh Pu Speaker, kan sawi chho ang a, kan hre dawn a ni.

Politics-ah chuan thil hriatchian tawk loh vang te, tan lam inan loh vang tein han beih chiam te pawh a tawk a ni mai thei a. Vanduai thlak takin kan bill hi a lo leak-out leh nghal a, a hun hmian. Chuvang te pawh chu a ni ang, khel leh chai a hlawh hle a ni. Amaherawhchu, Pu Speaker, kan tana tha zawk turin a inher remah te pawh kan ngai ve bawh a. He bill hi kut-hnathawktute lam tang bill a ni. Chutih rual chuan, Excise & Narcotics Deptt-a ka thawhpui mi taima tak takte tan erawh chuan an hah belhna tur bill a ni a. Tin, Excise pawh an sawiselna tur bill te pawh a ni pah mai thei a. A puluttute pawh tun atangin eng emaw hrechiang lo chuan beih an han tawk tawh a ni a. Amaherawhchu, anmahni, Excise department-a ka thawhpui ka thiante ka fuihna chu - kan hah sawt dawn a nih pawhin, kut-hnathawktute’n an hlawkpui dawn. Chuvang chuan, tuarna pawh hlawkna-ah kan ngai a, Agriculture leh Horticulture Deptt. lam tana malsawmna kan nih theihna tur bill ni ah Pu Speaker, keini chuan kan ngai a ni.

Tuna kan Dan, ‘The Mizoram Liquor Prohibition Bill’, a hnua Rules an siam leh kha kan en chuan, tun dinhmunah hian Champhai leh Hnahlan te chiah grapes winery siam phalsak an ni a, a bak zawng chu dan bawh chhian a ni, Pu Speaker. Kawng kama kan zawrh zawng zawng - dragon-fruits atanga kan siam te, lakhuihthei atanga kan siam te, balhla atanga kan siam te hi, tunah chuan dan bawhchhian vek a ni. Grapes chiah a ni tunah chuan phalsak a nih. Grape chingtute kan duhsak rualin Pu Speaker, Mizoram-a kut-hnathawktute - balhla, lakhuihthei, dragon-fruits, kiwi, sunhlu, kawlhthei etc. chutiang chingtute pawh Pu Speaker, kan hmangaih ve tho a, kan duhsak ve tho a ni. Hengho hian an product, an thei thar chhuah atang hian wine siam ve se kan duh a, chumi duhsakna chu a ni he bill kan put luha hi, Pu Speaker. Chuvang chuan, buana hmaa kherha, ‘Zu an thlah zalen dawn; Zu bill a ni’ tia an han dema pawh hi, an hriatchian tawk loh vang a ni a. A tira ka sawi tawh ang khan, a taka han sawi chuan, ‘A va ho leh si ve’ ti tawk an awm ang a, ‘a lo nih reng hi maw le’ ti tawk an awm ang a, ‘chuti a nih chuan, ka tan ta hle mai; ka duh hle mai’ tiin, he Bill lam tang hi kan nih deuh vek kan ring tlat a ni Pu Speaker.

Tichuan, Pu Speaker, han sawi chian hret ngai a awm a; a puan te pawh kan inpuang ang a. He Act hi ‘amend a tul’ tih hi department lam hian he sorkar vawfung kan chelh ve atang hian min hrilh a ni. ‘Kan Rules neihte hi bihchian ngai a ni’ an ti a, kha lai kha chu a history nakinah kan sawi ang a. A dan a kimchan lohna te, rules kan neih that tawk loh dan te; a Act a pawh hi hmanhmawh a siam a nih avangin, a Act-in a a ken tel thenkhat hi chu Pu Speaker, siam rema tha zawk thei thil tam tak a awm avangin, ‘hei hi chu siam rem a tha khawp mai’ tih te min hrilh ve thin a.

Tichuan, Pu Speaker, tun Assembly Budget Session ah hian pharh hman ngei tumin theihtawpin tan kan la a. Hei tuna ka bula thu kan Horticulture Minister te pawh hian min hrilh ve bawh thin a, anmahniin pressure an dawn dan te pawh. Tichuan, Pu Speaker, chu dan thar turte pawh chu kan han duang ta a. Amaherawhchu, nichina ka sawi ang khan, kan Dan chu a leak-out ta tlat mai a ni. A thlen lohna tur zawng zawng a thleng a, kil tinah hmuh turin a lo awm ta a. Chutih lai chuan, Kohhran hruihute pawhin an lo hmu ve ngei a, chutah chuan inleng te pawh kan nei a. Kan Dan thar put luh tura Section 45E ami, zupui, zutuitling leh zupang siam phalna tura kan duan tela chu Kohhran lam chuan, ‘E khai! hei hi chu la telh lo teh u’ tiin inleng kan nei ta a. Tichuan, ‘kan ngaihtuah nawn leh thei dawn em;

khawngaih, hei chu telh loh a tha e' min ti a. Tin, thil dangah te pawh zawhna min zawt a ni; kan Dan duan mek lo leak-out kha an lo hmuh ve bawkw avangin. 'Hengte chu telh thar a ni lova, MLTP Act, 1995 a lo awm tawh sa kha a ni e. Kohhran pawhin kum sawmpasarih chhung khan in ngaimawh lo a ni e' kan ti a, 'E, a ni maw' an ti ve mai a.

Amaherawhchu, ngaimawh an nei ta a ni. Chu chu – 'zupui, zutuitling, zufang siam phalna hi chu...' an ti a ni. Tichuan, March Ni 1-a ni a Pu Speaker, ZPM Legislature Party-te rawn ve a ngai e kan ti a. Kan rawn ang a, 'Kohhran-ina in duhlo a nih chuan, zupui leh zutuitling chi chu kan paih leh theih kan ring. Amaherawhchu, Legislature party kan lo inrawn ang e', tiin, March Ni 1 (chawhnu dar 3)-ah Legislature Party chu kan thukhawm ta a. Chutah chuan, Pu Speaker, 'zupui leh zutuitling te chu, chutia Kohhran hruaituten an duh lo a nih chuan, keini pawhin kan duh tur a ni lo ang; an rawtna chu a zahawm alawm', tiin paih leh zai kan rel ta a. Zufang hi chu zu tak chiah pawh a ni lo, zufang kha a ni mai a, a hmingah te pawh kan han ti deuh nanging, Kohhran pawh sawi chu a tha lo e. Tin, 'mi-thenkhatin a hminga zu a awm hrim hrim hian an ngaimawh ang; i paih vek law law ang' kan ti a.

Tichuan, Pu Speaker ZPM Legislature party meeting-in chhawp chhuah tura kan tih chinah chuan wine siam, chutah pawh grape-wine an siam ang chiah hian lakhuihthei atangin emaw, dragon-fruit atang a ni emaw, kiwi leh thil dang atangin a ni emaw, Mizoram-a an thar chhuah thei leh thlai atanga wine siam phalna a ni, Pu Speaker kan rawn put luh tuma hi. Chutah chuan, tunah hian kan Dan ding lai mek MLP Act hnuaiia kan rules-in a a phalsak, (political party hming te pawh sawi ta ila), MNF sorkar hunlaia an phalsak a ni a. August 30<sup>th</sup>, 2022-ah khan wine siam hi phal a ni a, chutah chuan alcohol percent pawh '10% minus (-) and plus (+) 2%' tih a ni. Chu bak chu Pu Speaker, he Dan-ah hian telh kan tum lo, grapes an phalsak ang bak kha telh kan tum lo; alcohol 10% chung lamah kan kal dawn lo a ni. Chuvang chuan Pu Speaker, grapes chingtute kan hmangaih ang bawkw hian lakhuihthei chingtute, balhla chingtute, sunhlu leh kawlhthei etc. chingtute pawh kan hmangaih a. Chu mite pawhin a an phalsak theihna tura kha he Dan ah hian kan han dah tel ta a ni a. Tichuan, Pu Speaker, kan han sawihona ah pawh kan fimkhur khawp mai; ZPM Legislature party chuan, 'hei hi hi chu paih ngei tur a lawm' tiin kan paih ta a.

Tin, Pu Speaker, a Dan kha Inrinni tlai ah siam that kan han rawt ta a. A tuk Pathianni a nih tlat avangin, office kha kan kai thei ta lo a. Han siam that vat vata, a document February 21<sup>st</sup> a kan theh luh tawh, a bill a draft pawh MLA-tena kan dawn vek a kha thlak a ngai ta a, 45E kha paih a ngai ta a ni. Tin, 'beer' tiha kha, 'zupui' emaw, 'zufang' tih emaw a tel tak lohah chuan local fruit beer tihin kan thlak ta bawkw si a. Tin, bill-ah hian ram pawn atanga beer lakluh reng reng phal a ni lova. Amaherawhchu, Mizoram-a kan thlai tharchhuah atang hian local-fruit beer siam phalna i dil ang kan ti ta a. Beer-te chu Pu Speaker, i hriat angin 4-5%, alcohol te lek lek a ni a, wine ai pawhin a alcohol content hi a tlem zawkw dawn ta a ni.

Tichuan, dan siam thatna dilna chu Excise Department atangin kan han initiate a, kan han nawr chiam a. Amaherawhchu, Thawhtanni a ni a, a kal tlang ngai a lo tam khawp mai. Cabinet approval a ngai a, Law & Judiciary-ah vet te a ngai a, dan ang thlapa kal a ngaih avangin, Thawhtan zanah kan hman ta lova, Thawhlehni ah kan han inpeih a. Thawhlehni zanah Assembly paper dang pawimawhte an sem rualin kan dawng ta chauh mai a. Tichuan, a tuk Nilaini-a sawi ho mai tur kha nih tak avangin hotu, lam pawh an inpeih ta lova. Tichuan, Pu Speaker, eptu party-a an hruaitu theuhte'n an hmu che a, sawihona hun

hi sawn an dil ta che a, vawiinni hi kan lo thleng ta a. Kan House Leader pawhin ‘a tha lawm’ tiin, chutianga dilna a awm avangin bill sawihona hun hi kan tawlh ta hret a. Pu Speaker, hemi chungchanga thiamlo an awm a nih chuan, Excise Department Minister hi ka thiam lo a ni ang a. A hunah tak kan sem chhuah loh avangin, a hun hi tawlh a ngai ta a. Eptu lam leh helai ka thawhpui ZPM Legislature Party te pawh an hriatthiamna ka han dil a. Theihtawp chhuahin kan han ti a, amaherawh chu dan pal tlang ngai a tam deuh avangin a hunah kan peih thei ta lova, kan hnufual ta hret a ni.

Tichuan, Pu Speaker, he bill hi ram pum huap Zu-khapna Bill a ni ta a ni. ‘Zu an zuar dawn; zu an phalrai dawn’ an ti a, a hma aiin a khauh zawk a ni, Pu Speaker. A hma chuan Mizoram pumpui hi zu khapna dan khan a huam lo a ni. Kan MLP Act, 2019 tuna kan hman mekah hian Autonomous District Council pathum - Chakma, Lai leh Mara-te chu a huam reng reng lo mai a. Amaherawhchu, tun tumah hi chuan Pu Speaker, he Bill kan duanah hi chuan Mizoram pumah zu khap a ni tawh dawn a. IMLF, (‘a senchi’ ti ila kan sawi thiam ber awm e) ‘sap-zu’ kan tih te leh rakzu te chu khap a ni tawh dawn a ni. Pu Speaker, he Sixth schedule of the Constitution of India, 12(b)-ah hian ADC huam chhunga zu chungchanga thu an neihna chu, non-distilled country liquor-ah chiah a lo ni a. Chu chu zupui, zufang, zutuitling ah te a ni a. Mara hnam te, Lai hnam te leh Chakma hnam te anmahni zu angah kha chuan, ‘anmahniin Dan an insiam thei ang’ tih a ni. A bak zawngah chuan Dan a lo awm loh avangin, State pum huapin Dan kan lo siam thei a, Pu Speaker. An mahni chhungah non-distilled country liquor an tih ve dawn chuan, anmahniin an insiam thei reng a, chungte pawh chu khap theih se kan duh a. Amaherawhchu, kha chu kan thuneihna piah lam Sixth Schedule in Autonomous District Council lam a hung bikna ni a, va inrawlh pawh kan tum lova. A sen chi leh rakzu erawh chu heng huam chhungah pawh hian khap a ni tawh dawn a ni.

Pu Speaker, a history hi tawi tein ka’n sawi ang a. Mizoram Excise Act, 1973 kan thlir chuan Zu chungchang a inziak a, a khuahkhirhna lam kha a lo awm lem lo a. ‘A zawrh ve theih hunah chuan’ tih te leh Revenue lam hawi khan khatah khan thil a inziak a. MLTP Act, 1995 kan han hmang a, 20<sup>th</sup> February 1997 atangin enforced a ni a, a kal zel ta a. MLPC Act, 2014 ah kan hriat angin Congress hun lai a ni a. Tizawng hian ka sawi ang a, (mi pawisawi ka hlau viau mai a.) A senchi zawrh phalna Mizoram Excise Act, 1973 an han siam leh takah khan, a saving kha dah tel a ni a, kha bill/Act ah khan. Amaherawhchu, Act MLP Act, 2019 tuna kan hman mek an rawn siam takah khan a saving dah a nih tak loh avangin, Mizoram Excise Act, 1973 kha hman a ni bawk si lo, MLP Act, 2019 hian Autonomous District Council a huam bawk si lo; ADC-ah hian Zu-khapna dan pakhatmah a awm lova, zawrhna dan pawh a awm chuang lova. Zu chungchanga Dan pakhatmah a lo awm reng reng lo a ni. Chu chu kan han en Chiang a, mithiamte kan rawn a, department chhunga mite sorkar-mi leh law practice mek mithiam zawkte kan han rawnin, ‘Dan hi siam theih a ni e’, tiin. Tuna kan amendment-ah hi chuan Chakma, Lai leh Mara Autonomous District Council hnuaiah hian Zu-khapna Dan hi kan kengkawh ve tawh dawn a ni.

Pu Speaker, House kal tlang hian YLA leh MTP-te chungah lawmthu ka sawi duh a ni. An huamchhungah Dan a awm lo chungin theihtawpin zu an lo khap a, an lo bei hram hram a ni. Tunah chuan Dan angin kan kalpui thei tawh dawn a. Engpawh nise, khalai kha zawhna a awm theih avangin ka’n sawi Chiang nise. Mi thenkhatin, ‘Zu-zalenna Dan an pulut dawn e, ZPM chuan’ an tih laiin Pu Speaker, tunhma la awm ngai lo angin Mizoram puma Zu-

khapna Dan zawk a ni kan put luh hi ni. Chuvangin, kan chan loh khanah a chhuak mai thei a, (a tira ka sawi ang khan) ‘kan rin ang lo zawk a ni a takah chuan’ an ti mai thei a ni.

Pu Speaker, a dawl leha chuan, ‘Zu-khap nat sawtna bill a ni’ tih ka’n sawi chiang leh duh bawk a. MLTP Act, 2019 kha hmanhmawh taka duan a ni a, kan hria a. Kum 2018 ah sorkar thar a lo piang a, Zu zawrh laia kha tih tawp an duh avangin hmanhmawh takin siam a ni a. Chutah chuan a rules lam kha a lo awm lem lo a, ‘Wine Rules, 2008’ kan tih mai duan a nih hma kha chuan, Act ve si khan Rules pakhatmah a lo nei lo a ni. A buaithlak lai chu, minimum punishment pawh kha ziah a ni lova. Zu an man pawhin ‘engzat nge a nih; engnge a nih; small quantity nge, intermediate quantity nge, commercial quantity nge’ tih pawh dah a ni lova. A hrem theih dan minimum punishment pawh dah a nih loh avang khan, ho lam taka chhuah an ni fo a. Tun tumah chuan chungte chu han bilh tel a ni a. Pu Speaker, section 6 (sub-section 1)-ah te thla 3 - 5 tan tih te, cheng 10000 – 1 lakh tih te; tin, section 7 ah Zu man sak - small quantity tih te, intermediate quantity tih te, commercial quantity tih te, a zat chu notification-a umzui tur tih a nih kha. Chungte chu tun tunah hian kan bilh tel a ni.

Tichuan Pu Speaker, Mizoram mipuite hian grape-wine zinkawng hi kan hriat chian tlan hi a thain ka hria. Kum 2000 chho vel (MNF sorkar lai) khan Champhai leh Hnahlan, Champhai District-ah sorkarin grape a chin tir a, a tha duh ngiang a. Amaherawhchu, a rawn thang lian a, a tuiah an han siam dawn a, MLTP Act, 1995 hman mek khan a lo khap reng si a, Grape-wine chu siam theih a ni ta lo a ni. Tichuan Pu Speaker, Grape-wine siam phalna hmasa ber hi kum 2008-a put luh kha ni a, chutih lai chuan MNF hi sorkarna changtu an ni. MLTP Act siam thain, a hmingah pawh “The Mizoram Excise & Narcotics Wine Rules, 2008” tih a ni a, winery license pek a ni. Kum 2010-ah wine chu siamin, an zuar chhuak tan ta a. A kal zel a, sorkarna an inthlak a. Kum 2018-ah MNF bawk an sorkar leh ta a, a senchi zawrh meka kha tih tawp an duh avangin, tuna kan hman mek MLP Act a hi hmanhmawh takin Budget Session March, 2019-ah put luh a ni. Amaherawh chu, thil hrang hrang vanga a hman mai theih loh avangin, 28<sup>th</sup> May, 2019 he MLP Act hi hman tan a lo ni leh ta a ni. Tichuan, Pu Speaker, Grape-wine chu phal a ni lo phawt a ni.

Tichuan, grape chingtute’n, ‘engtin nge kan awm dawn tur; tunah hian a Dan hian min phalsak si lova’ an ti a. Amaherawhchu, grape-wine chu an siam chhuak reng a, an hralh reng tho a, sorkar pawhin a hre lo der a, mit a siai ve a ni, khatih lai khan. Amaherawhchu, a danah reng reng chuan grape-wine siam phalna a awm si lova. Tichuan, grape chingtute chuan an thar chhuah atanga wine siam phalna chu an duh em em laiin, 24<sup>th</sup> January thla ah Dy. Chief Minister kaihhruai study group-in, Mizoram Liquor Prohibition Rules drafting - study committee-in 24<sup>th</sup> January, 2022-a Dan an duan ah khan grape chu a tel ta lo a ni. Chumi awmzia chu, Hnahlan leh Champhai wine chu dan pawna hnawl a lo ni ta a, phal a ni ta lova, January, 2022 ah khan.

Tichuan, 25<sup>th</sup> March ah, Rules awm lova hun rei tak Zu-khapna dan lo kalpui tawh, a rules, ‘Mizoram Liquor Prohibition Rules, 2022’ chu a lo chhuak ta a, grape-wine chu a tel ta lo ngei a ni. Hei hi hriain Champhai leh Hnahlan mipuite an lungngawi ta lova, social media leh hmun hrang hrang atangin mipuiin an vuipui a, political party thenkhatin an vuipui bawk a. Pu Speaker, March a ni a, hei hi; eng thil nge thleng, kan tih chuan, 22<sup>nd</sup> July, 2022-ah Congress party phei chuan Aizawl Tennis Court-ah ‘Mipuite thlavang hauhna inkhawm’ an tih ah khan Resolution-an pass-te zingah (a) Healthcare Bill crore 67 ba pe

turin sorkar an nawr a, khatih lai khan crore 67 lai kha healthcare bill bat a lo ni a. (b) Grape-wine man sak chhungte zangna dawmna cheng nuai 100 pe turin sorkar an phut a; Pu Speaker, ka'n quote ang e - "MLP Act, 2019 leh MLP Rules a pawmdan ah thutlukna Chiang taka puang zar vat turin sorkar kan phut" tih a ni a.

Tichuan, pressure hrang hrang awm karah Mizoram sorkar chuan a ngaihtuah nawn leh ta a; chu chu MNF hun lai a ni. Ni 30<sup>th</sup> August, 2022-ah Mizoram sorkar - Council of Ministers thukhawm chuan Pu Speaker i phalnain, Mizoram Sorkar press-release hi ka'n chhiar ang e - Aizawl 30<sup>th</sup> August, 2022 - "Vawiin khan Chief Minister Pu Zoramthanga hovin Council of Ministers chuan Mizoram Department thenkhat atanga sorkar inrelbawlna tur atana thu pawimawh an thlen chu ngaihtuahin Chief Minister Conference Hall-ah an thukhawm a. Vawiin meeting chuan The Mizoram Prohibition Draft Rules, 2022 chu ngaihtuahin, Zu-zawrh khapna Dan chu khawng taka kalpui a nih zel tur thu leh, chutih rual chuan Mizoram chhunga kut-hnathawktute grape thar atanga Dan hnuai wine siam leh hralh erawh a phalsak a ni" tih a ni.

Pu Speaker, political party hrang hrang kan lawm a, Mizo National Front General Hqrs. pawhin a lawmthu press release-in a tuk 31<sup>st</sup> August, ah chhunzawm nghal a ni. A vai chuan ka chhiar lo mai ang a; i phalnain tawite - "Chief Minister Pu Zoramthanga sorkar kaihhruai hi mipui hmakhaw ngai tak a nih zia a lang zel a. Mizoram tana tha tur an ngaihtuah kawngah hian Council of Ministers chuan chhuanawm kan ti hle. The Mizoram Liquor Prohibition Draft Rules, 2022 ngaihtuah that a ni a, Mizoram chhunga kut-hnathawktute grape thar atanga Dan hnuai wine siam leh hralh phal a ni tur hi lawmawm kan ti. A bikin Champhai leh Hnahlan lama grape chingtute'n Dan hnuai ngei ngaihngam taka an thawhrim rah an seng tur hi thinlung takin kan lawmpui a, Mizoram economy siamthatu an nih ngei kan beisei a ni" tiin, MNF-in grapes chingtute an lo lawmpui tawh a ni. Pu Speaker, grapes chu tunah hian zauh kan duh a ni. Ngaihngam takin dragon-fruits te, lakhuihthei te, kawlhthei te, sunhlu te, kiwi leh thei dangte te; heng atang hian wine siamchhuak ve tawh se kan duh a. Pu Speaker, chu chu kan rawn put luh hi a ni mai. Vawiinah hian kan duh a inang vek a ni, Pu Speaker.

Tichuan, October 22-ah, Grape-wine Rules kha, khatih laia kan Excise Minister (tuna BJP lama awm ta Dr. K. Beichhua) ho hian an han lawm kha a ni a. An thusawi te pawh hetah hian a ziakin ka nei a ni. Commerce & Industrial Board lama Vice Chairman Pu K. Laldawngliana te nen khan an han chho a, an han lawm hle a nih kha. Chu chu grape-ah a ni a, a dangah pawh hian a theih ve a ni. Mizoram puma kuthnathawktute hian he bill hi hlawkpui se kan duh a. Pu Speaker, a tir atanga ka sawi ang khan, kut-hnathawktute lam tang bill a ni, tuna kan rawn put luh hi. Chuvang chuan, Pu Speaker, he bill hi sawiho te chu a tha ang a, amaherawhchu, chaiho lutuk loa a kal theih mai hi kan ringin, kan beisei tlat a ni. A chhan chu, Pu Speaker, hamthatna hi a lo keng tel hnem em alawm!

Entirnan: Champhai Winery hi tunah hian Ministry of Food Processing hnuai SAMPADA puih mek a ni a. Kum 2019, MNF sorkar lai khan sanction hmuh a ni. Hnahlan Winery hi Tribal Affairs Ministry hnuai TRIFED kaltlangin Van Dhan scheme hnuai enkawl mek a ni a. Tin, FOCUS market excess fund atangin sum a puih a ni mek bawk. Kan sorkar hma thil vek a nih chu, Pu Speaker. Tin, World Foods India, September 2024-a Delhi a neihah khan DoNER Ministry chuan North East-a Winery-te tan platform a lo siamsak daih tawh a. Department of Foods Technology, Mizoram University leh Hnahlan

Grape-Growers and Processing Cooperative Society te chuan MoU neiin, thawhhona an lo nei mek a. Pu Speaker, chu chiah chu kan MLA, tuna awmho zawng zawngte hian kan biala dragon-fruits chingtute, balhla chingtute leh kan sawi tak thei hrang hrang chingtute tan wine-ah kan siam a nih chuan hamthatna hi a putluh ve theih dawn a ni. Chu chu Pu Speaker, kan nghakhlel em em a, ZPM chu kuthnathawktute lamtang kan nih angin chu lam chu kan hawi a ni.

Pu Speaker, ka inbuatsaih tha e chu ka ti lo a, ka inbuatsaih rei ve khawp mai a. Hetah hian phek eng emaw zat ka la nei a, ka ti vek lo ang a. Pu Speaker, a amendment laiah hian han lut ta mai ila. Tuna kan bill putluh ah hian section 70 a awm a. Tin, Dan kan hman mek MLP Act, 2019 atanga amendment siam hi section 13 awmin, chung zinga section 6-te chu a Dan hming thlak a ni mai a. CrPC kan tih thin kha BNSS a lo nih tak avanga amend ngai a ni a. The Draft Amendment Bill, 2025-ah hian amendment bakah insertion section 7 a awm a ni. Tichuan, kan Dan hman mekin a huam ve loh Autonomous District Council pathum kan huam tel tir ang a. Tichuan, kan draft MLP Amendment Bill-ah hian sorkar policy khawih section 4 a awm a. Chungte chu: -

Chapter 4A hnuai section 45 A, 45 B, 45 D leh 45 E;

Section 45A-ah khan Mizorama mikhual pawimawh leh khualzin te an lo kala dignitaries bakah domestic leh foreign tourist-te tana zu an rawn kenluh phalsakna kha a ni a. Pu Speaker, hei hi Zu-khap burna Dan kum 17 chhung kan hman tawh MLTP Act, 1995 a mi bawh kan lakluh a ni a. Tin, medical prescription hmanga tih theih dan section 45B pawh khata mi tho kan lakluh kha a ni a.

Tin, a lian ber chu nichina kan sawi tak section 45D kha a ni a. Local fruits beer siam theihna te, local wine siam theihna te, Mizoram chhung ngeia thar a nih chuan heng thei chi hrang hrang - balhla, dragon-fruits, sapthei, lakhuihthei, sunhlu, kawltthei leh a dangte. An han sawi tak tak chu, hmazil leh dawnfawh atang te pawhin an lo siam thin a ni a, 'local fruits beer' tih a ni, Pu Speaker. Pawnlam atanga lo lutte hi a huam tel lo a ni. Chungte chu man pawh kan tum.

Pu Speaker, tunah hi chuan zep thu a cheng lo; Aizawl khawpui leh hmun dangah te pawh a ni; restaurant eng emaw zatah hian zu, a bikin beer hi an chhawp tel thin a, zalen taka lei theih te pawh a lo ni. Amaherawhchu, dan anga kan tih hunah chuan license neiin Mizo-beer chiah a zuar thei dawn a, a bak zawng chu kan man dawn a ni. Pawn lam atanga lo lut tur titawpin, Mizoram atanga lut tur, sorkar tan chuan chhiah leh thildangah hnemhnanna tur tak tak a awm dawn lo. Kut-hnathawktute tan erawh chuan hnemhnanna tur tam tak a awm dawn. Chu chu tun tuna he bill-in a ken tel hi a ni a.

Chuvang chuan, permit nei ten restaurant leh hotel-a an chhawp theihna tur a ni a, license kha an rawn dil ve thlap dawn a ni. Tuna license nei lova zawrh te hi Pu Speaker, keini luh ve hma, Legislative Assembly session hmasa zawkah te pawh he House-ah hian sawichhuah a nih kha; 'Kil tinah an zuar a ni lawm ni' ti te pawh an awm a nih kha.

Section 45E-ah hian tunah chuan Champhai leh Hanhlan winery atanga siamchhuah chiah phal a ni a, a bak zawng chu dan pawna mi vek a ni. Pu Speaker, (zep thu a cheng lo), 'SARAS Fair' kan tih te leh Self Help Group-in hetiang chi – MzSRLM leh NLUM hnuai

mite bakah Entrepreneurship Fair leh thil dangah pawh wine a ni emaw, beer a ni emaw alcoholic content nei hrim hrim an zawrh ho zawng zawng kawng sira kan hmuh hi tunah hian Pu Speaker, man theih vek a ni. Kan dan chuan grape-wine pawh a phal chuang lo, Hnahlan leh Champhai Winery a mi lo chu a phal lo fai vek mai a ni. Chuvang chuan, hengte tan hian zalenna dar vaw tawh ila.

Amaherawhchu, duh duha siam theih a ni lo ang, Pu Speaker. Phalna nei, a siamtu bik an awm dawn a. Chu mite hnenah chuan license an rawn dil ang. Tuna a siam mekte pawh hi dan anga en an ni dawn a, dan tlinglo chu phalsak an ni dawn chuang lo a, mankhawm a ni dawn tho a ni. Chumi hnuah chuan chung a siamte chuan an hralh zung zung theihna turin, a siamna hmunah an lakhawm ang a, an hralh tawh ang. Pu Speaker, chungte chu kan han putlul chhan a ni a.

Kut-hnathawktute hian peak season-ah chuan an lo thar tam ve tawh hle mai a. Chu chu an kalpui thin danah chuan, peak season-ah an han lakhawm a, winery, brewery leh refinery angah te an han kalpui a; chutah chuan a tui lo sawr chhuakin tangkai zawkin 'value addition' kan tih kha an han nei ta a. Tichuan, a peak season-a an dahkhawm chu dry-season - off-season kan tih bawkah khan hralh leh ang a, kumtluanin income an neiin, agriculture business bultanna a lo ni a. Chu chu Pu Speaker, keini hian kan nghakhlel em em a. Heng 'fermented juice' kan tih ang te hi distilled a ni lo a, 'Zu' kan tih, distilled kaltlang nilovin, hengte hi chu ruih bur bur tur ni loin, thlai thar chhuah preservation chi khat atanga wine leh beer siam phalna hi he Dan-in a ken tel chu a ni ta a ni. Tuna hman phal mek, kohhran thenkhat chuan sacrament atan pawh an hmang a, '10% alcohol content hi pelh kan tum lo' tih hi Pu Speaker, ka sawi Chiang leh duh a. Chu chu mipuite leh helai House-a mi zawng zawngte hriatah pawh kan sawi nawn leh duh a ni.

Indian Food Safety Act-in a phut angin, kan fermented juice-in a ken tel nutritional value te chhut teline tha taka kalpui theih kan inbeisei a, chutiang tur chuan hma lak kan tum a ni. India hmarchhakah hian Meghalaya-ah September, 2023 khan an Chief Minister Pu Conrad Sangma chuan Fruit-wine Incubation Centre hawngin, anni phei chuan Fruit-wine Capital of India nih kan tum e, an ti a. Pu Speaker, kan hmalthir chu local consumption mai a ni lo; state dang leh rampawnah kan hralh chhuah theih kan ring a, chu chu kan hmabakah hian a awm a ni. Thil thenkhatah chuan industry lian pui-pui leh sum tak tak sen ngai a ni. He thilah hi chuan industry lian pui-pui lo pawhin a tih ve theih tlat avangin kan ban phak tawh a ni ang a, a thar rang bawh si a. Mizote hriatthiam chi a ni a, keimahni tan a that kan ring tlat a ni.

Pu Speaker, kan ram hian thei hi a lo tharchhuak nual mai a. Horticulture Department in a chhinchhiah danah chuan, grapes hi hectare 2381-ah chin a niin, metric tonne 17227 a thar a ni. Chuta tanga chhungkua in an hlawkpui dan kan hria a. Balhla te phei chu hectare 11678 a zau ah metric tonne 140502 thar chhuah thin a lo ni daih tawh. Lakhuihthei hi hectare 5187-a zauah chin niin metric tonne 29183 an thar chhuak a. Chuvang chuan, heng zawng zawngte han thlir hian Pu Speaker, tangkai zawkah hmang ila, 'value addition' an ti a, a hlutna belhchhah ila. A hma chuan an thar tam lai chuan a tawih nghek nghuk a, a thenah chuan thingtlang khua ah te chuan a market a lo tha lova, an insem tel tel a. Tunah erawh chuan, phur khawmin, a siamtu tur sorkarin a license a pekte, a siam thiamte hnenah an pe ang a, awmze neia an thar chhuah theihna tur lam hawi bill a ni a, Pu Speaker.

Pu Speaker, kan state thenawm ten an lo hlawkpui tawh dan pawh sawi tur hi ka ngah mai a, ka inbuatsaihnaah chuan. Amaherawhchu, ka sawi thui lutuk deuh ang a. Arunachal hmeichhe pakhat Tage Rita-i chu India ram a hmeichhia chawimawina sang, Ministry of Women & Child Development atanga India ramin Hmeichhe Civil Award - chawimawina sang Naari Shakti Puraskar chu 2022 khan pek a ni a. Engvang nge, kan tih chuan, Kiwi atanga wine a siam chhuah vang a ni. Zero hmun, Arunachal ah a ni. He nu hian chawimawina sang eng emaw zat a dawng a, Women Transforming India Award United Nations in a pek pawh kha a dawng nghe nghe a ni, Mizo hmeichhia te hian an thei ve ang. An thawkrim a an thiam ve em em; amaherawhchu kan Danin a hung tlat si a, a phalsak si lova. Tunah chuan, hei hi phelh kan duh a ni. Pu Speaker, Tage Rita-i hi NERIST chhuak kha a ni nghe nghe a. Kan Mamit MLA Pu H. Lalziriana pawh hi NERIST chhuak a niin ka hria a. Chuvang chuan, anni pawhin an tih theih hi Mamit-Nu ho pawh in an ti ve thei ang a. Pu Speaker, chuvang chuan, heti zawng hian i han tang tlang teh ang u, kan ti a.

Tin, Naga hmeichhe pakhat Lucy Nguillie hlawhtlinna chanchin hi kan hriain ka ring a; Dreams Dragon-fruit Farm neitu-nu kha a ni a, Dimapur atanga km 15 vel ah. Tichuan dragon fruit atangin wine a siam ta a, Internet ah a dah a, 'internet sensation a ni e' an tih hial kha a ni a; bottle khat ₹1,000/- chuang te'n a hralh a ni. Chu chu Nagaland a ni Pu Speaker; Sap ram kan sawi lo, Maharastra-a Nasik wine hmunpui te kan sawi lo, Nagaland leh Arunachal a ni kan sawi, Pu Speaker. Kan thei ve ang. Chuvang chuan, he kan bill put luh hi, a tira in hriat chian loh, politics-a inpuhna kal mup mup ang kha nilo se. Mizoram-a kut-hnathawktute tan, kan bial theuha kut-hnathawk tute tan khan a ni kan au ni, Pu Speaker.

Chuvangin, hawh u, kan zavaiin tang tlang ila. Mizoram product chiah kan sawi; a pawnlama mi chu a hma aia khauhin khap kan tum. Kan tlin tawk chu engpawh nise, Excise Department strength leh kan theihna pawh kan hria, kan theih loh thil ropui tak tak tih kan tum lem lo. Amaherawhchu, kan tang sawt ang; a tan pawh kan tang sawt a ni, kan sorkar hnu hian. Pu Speaker, Politician hian mahni chanchin sawi kan ching a. Rorelna hmaa sawi tur hi mahni chanchin hi kan sawi khalh deuh zung zung mai a. Amaherawhchu sawi chakawm te pawh a awm a, kan hmalakna te pawh hi. A tul chuan demand ah te pawh kan la sawi ang a.

Engpawh nise Pu Speaker, Kut-hnathawktute lam tang Bill kan rawn put luh (Pu Speaker, I phalnain k'an chhiar leh ang a) "The Mizoram Liquor (Prohibition) Amendment Bill, 2025" hi min sawiho puia, kan zavaia tang tlanga, Mizoram-a kan kut-hnathawktute tan a ni tih hriaa min pass pui turin Member zawng zawngte ka sawm e. Ka lawm e.

**SPEAKER** : Aw le, Minister zahawm takin a bill chungchanga sawi turte a sawi a, a bill put luh chhan te min hrilh ta a; tunah kan sawi ho ang a. Member pakhatin engtia rei nge kan sawi ang? (House-in minute 10 a ti a.) Aw le, Minute 9 ah bell ka lo hmet ang a, minute 10 ah chuan tawp ngei tum ila. A chhan chu, member dangte khan sawi an duh ve ang a. Chance kan inpe anga, kan inhrethiam tlang dawn nia. A hun chhungah khan chen hram hram tum ila. Tunge sawi hmasa ang? Aw le, member zahawm tak Pu H. Ginzalala ilo sawm ang.

**PU H. GINZALALA:** Pu Speaker, vawiinniah bill tha tak mai, The Mizoram Liquor (Prohibition) Amendment Bill, 2025 kan sawiho dawn a ni a. Kan ram tana pawimawh tak a ni a, a phurawm pawh ka ti a. Pathian thu lam atanga kan hmuh danah chuan, Kana khua

inneihna ah kan Lal Isua'n tuisik wine ah a chantir a ni tih kan hria a. Vawiinniah hian kan rama revival Speaker hian, tuisik chiah chu a ni lo ang a, theitui wine ah a chantir ve dawn a ni a, a lawmawm khawp mai a. Hei hi kan ram economy leh a foundation tobul a nih dawn avangin, a phurawm ka ti khawp mai a.

Agriculture sector ah hian tunah hian transformation a thleng dawn mekin ka hria a. Nichin khan, Arunachal enterpreneur pakhat kha NERIST chhuak a ni tih te, Mamit bialtu MLA zahawm tak te pawh kha a ni tih te pawh kha a rawn sawi a. Ani pawh NERIST chhuak a nih chuan, keini pawh kan ni ve hle turah ka ngai a. Chuvangin, sawi a chakawm khawp mai a.

Kiwi han sawi takah chuan, ka bialah hma kan la ve nasa a ni. Nikum khan kiwi chi kan zuk ngaihven a, motor-in kan zuk phur a. Khuangphah tlangdungah hian Kiwi hi introduce ila, kan ti a, an lo ching tawh tho nain; a chi tha ngei hi lak ni sela kan ti a. Kan theih ang angin fund te pawh kan raise ve a ni. Kan zuk kal a, Arunachal ah a chi tha chi kan zuk la chhuak a. Vawiinah hian kan bial tan phei chuan malsawmna niin ka hria a. Khatih lai khan he bill hi a lo chhuak ang tih kan ring pha miah lo a ni, amaherawhchu, 'rinnain kan kal ang' kan ti a, theih tawp kan chhuah a, kan hmalakna hian awmzia a nei chho dawn niin ka hria a. Vawiinniah hian kan entrepreneur-te tan Zalenna-dar an vaw dawn niin ka hria a, a lawmawm ka ti khawp mai.

Ka ngaihtuahna kal zelah phei chuan, Bethesda dil kama kum 30 chuang damlo kan Lal Isuan a tih dam te pawh kha ka hre chhuak a, Lal Isuan damlo a tihdam ni kha Sabbath Ni a ni nghe nghein ka hria; chu chu a ni a. Keini pawh hian vawiinni a he bill kan pass ni hi kan Sabbath Ni a ni mai dawn lo em ni, te kan ti deuh hial a ni. 'Kan damna Ni' kan ti thei ang a; Kan zalen ni hi kan tan chuan kan Sabbath Ni ni ve mai turah kan ngai a. A lawmawm hle mai a, vawiinah hian kan pass ngei pawh ka ring a.

Zu chungchang kan sawi kan ti a, mahse vawiinniah hian zu chung chang ni lovin, wine kan sawi a ni; fruit-beer te kan sawi a ni. Vawiinniah hian zu chungchanga ka ngaihdan tawi te ka'n sawi ang a.

Kan ramah hian ngaihdan chihnih - Zu-zawrh tha ti pawl leh, thalo ti pawl an awm a. A bik tak in intellectual lam atang chuan, 'Zu te hi chu zuar pawp mai ila, a indan kan thiam ve mai ang' ti pawl an awm a ni. Kohhran lam atang chuan, 'kan zawrh, chuan kan tlin lovang' an ti ve bawk a. He ngaihdan pahnih kal hi a insual reng a, tumah kan in convince dawn chuang lo. Amaherawhchu, vawiina ka ngaihdan dik takah chuan Zu tak tak 'a-senchi' kan tih ang hi chu zawrh a tha ka la ti lo a ni; a chhan a awm a. Pakhatnaah ah chuan, tribal society kan nih angin, kan la mature lo a ni. A la hun lo; a hun tur, a darkar, a ni leh thla te chu ka sawi thei chiah lo. Amaherawhchu, tun atan chuan 'a la hun lo hle a ni', tih hi kan intellectual lamte pawh hian an hriat atan, he House kaltlang hian ka sawi duh a ni.

Tin, Zu hi zawrh hi a hun tak tak a awm dawn lo, amaherawhchu, lo zuar dawn ta pawh ni ila, a zawrh hun awm ang vel nia ka hriat chu - kan economy a that ve phawt a ngai; kan society te pawh mature phawt rawh se; kan tribalism hi a la nasa lutuk. Chuvangin, tun hunah hi chuan Zu zawrh hi an tlin tak tak lo. Chu chu a nih avangin, keini pawh hian kan tlin ka ring chuanglo a. Chuvangin, zu-senchi zawrh kan tih tak taka hi chu multi-factor - social economic factor a ni. Kan social economy hian hma a sawn hunah chuan zu-zawrh

tak tak ang chi chu kan sawi theih ka ring a, ‘tun atan chuan kan remti lo a ni’ tih hi sorkar ang pawhin kan sawiah ngai ila.

Vawiinah hian kan sawi leh duh chu - kan entrepreneurs te hi an advance a ni, bazar kawngsir ami pawh nise. Hmanni lawkah pawh Champhai lamah Hnahsin Kut te kan hmanah te pawh chuan, kawngsirah te pawh kan zuar lawp lawp a ni. Kan entrepreneurs te hian hma an sawn chak em em mai a, lakhuihthei atang te, leh kawltthei atang te, sunhlu atang te pawh hian wine an lo siam tawh a ni. Chu chu anih avangin, Dan hmanga kan legalize a ngai a ni. Kan umzui vat a ngai ta a nih chu. Chuvangin, helaia lo kalkhawm member zahawm tak takte hian kan entrepreneurs te hi dan hmanga kan chhanchhuah a ngai tak zet a ni. Chuvangin, Dan hi kan siam vat a ngai a ni, tih hi sorkar ngaihndan a ni.

A dawt leha ka sawi duh chu - nichin khan kan hon. Minister pawh khan a sawi tawh a, ‘mipui-sorkar’ kan ti a ni keini chuan. Inclusive government hi mizo tawngin ‘mipui-sorkar’ kan ti mai a; ‘mi zawng zawng huap zo; sector tin huapzo sorkar din tur a ni’ tih kha kan au hla a ni. Chu chu anih avangin, tunah hian Hnahlan grapes chauh kan phalsak hi, a exclusive a ni; a inclusive lo kan ti a ni. Chuvangin, kut-hnathawktute tumah thliar bik nei lovin lakhuihthei a ni emaw, balhla a ni emaw, kawltthei a ni emaw, sunhlu a ni emaw, kiwi a ni emaw, heng chingtute zawng zawng tana dan-huapzo kan siam hi a ngai ta a ni kan ti a, chu chu he Dan lo chhuahna chhan pawh a ni.

Chuvangin Pu Speaker, he Dan hi tha kan ti em em mai a. Tunlai khawvelah ‘Made in India’ tih te kan lo sawi thin a, kan ramah ngei pawh hian ‘Made in Mizoram’ tih hi kan thupui a ni lo thei lo a ni. Made in Mizoram – ‘Mizoram ah siam rawh’ te pawh kan ti thei ang chu; chu chu kan policy a ni a. Kan entrepreneurs te tan chuan eizawna tam tak generate tur anih avangin, hei hi thu pawimawh takah kan ngai a. Chuvangin, hei hi kan kalphung tur a ni.

Pu Speaker, ka sawi leh duh chu, kan bialah Hnahlan-grapes winery kan nei a, kumin phei chu kan production a nasa lutuk a ni; a khawl hian tunah hian a tlin tawh lo reng reng a, kan production zawng zawng hi a um zo tawh lo a ni. Chu chu anih avangin, kan sorkar hotute pawh hian min lo hriatpui sela, tunah hian scheme hrang hrangah rawtna te pawh kan siam a, kan Hnahlan-winery hi tihlen anih theihna turin hma nasa takin kan rawn la a ni, tih hi kan hotute hian min hriatpui sela. PMGK ah te pawh rawtna kan rawn siam a, tunah hian priority list-ah hian a tel niin ka hria a, a lawmawm em em mai a. Vawiinah hian kut-hnathawktute tan he bill hi kan pass dawn bawh a, a lawmnan Hnahlan winery hi chu min approve sak sela ka duh khawp mai, Pu Speaker. He House-ah hian kan request a ni chu, kan hotute hi.

Tichuan, tuna kan production hi a um seng tawh si lova, a rang thei ang bera Hnahlanah kut-hnathawktute kan ngaihtuah hi a ngai a ni. Chutiang bawh chuan, kiwi te pawh kan ti chho dawn a ni a, nakum atangin kiwi-wine hi kan siam theih ka ring tawh a. Kuminah pawh kan siam thei reng a, mahse, a khawl tur kan nei lo a ni. Chu chu anih avangin, Hnahlan-winery Expansion scheme kan rawn tiha hi khawngaihin kan hotute’n min lo hriatsak turin ka ngen a ni.

Tichuan, Pu Speaker, he kan bill - “The Mizoram Liquor (Prohibition) Amendment Bill, 2025” hi ka thlawp a ni. Pu Speaker, ka lawm e.

**SPEAKER** : A lawmawm e. Member zahawm tak Pu K. Hrahmo sawm ila.

**PU K. HRAHMO** : Pu Speaker, hei, rin loh deuhvin zu-zawrh phalna bill he House a lo lut tlat mai hi mak ka ti a. A bik takin Autonomous District-a hman ve tura bill lo lut ta mai hi lehlamah chuan, a vanduaithlak ka ti a ni.

A move tu, concerned Minister zahawm takina a sawi, amendment section 1(sub-section 2) extension ah khan chi hnih – distilled alcoholic liquor leh non-distilled alcoholic liquor tih tea thenin, “It shall extend to the Autonomous District Councils of Mizoram ....” tih a ni a. He dan hi ZPM sorkar hnua siam a ni lo a, January Ni 26, 1950 ah khan a piang daih tawh a ni. Chuvang chuan, sorkar hmasa Congress sorkar te, MNF sorkar te khan he provision hi an hmu lo a ni lo; an hmu reng. Mahse, Autonomus District Councils-ah khan tih a ni lo. Kan Dan hmasa hnuaia permit te an pek lai khan sawlamah chuan pek a ni lova, khap pawh a ni lova, tikhan a awm ve tawp a; mahse, sawlamah zu pakhatmah hmuh tur a awm lo; sawlam atangin zu pakhatmah a lo lut bawk lo ang. Helama in ven hneh lo kha, sawlamah a rawn chhuak zawk a ni, tih kha, he House hian hria se ka duh a.

Entirnan – ‘a phal alawm’ tia permit lo pek kha a that viau laiin, problem awm thei a; a defective thei a ni. Para 10, sub-para 2 (clause b) ah chuan a saptawngin ti hian a inziak a, “That no person resident in the district shall carry on anything whether a whole sale or retail except under the licence issue in that behalf by District Council” tih a ni a, District Council area-ah wholesale a ni emaw, retail a ni emaw, District Council emaw atanga permit - trade license an neih phawt loh chuan, tumahin dawr an hawng thei lo tih a ni. Damdawi zawrhna permit hi in thuneihna a ni a, in rawn pek avang khan dawr an hawng thei ngawt lo. District Council-ah an apply ve phawt a ngai. Dawr hawn phalna an rawn apply a, thil tha anih chuan a hawn phalna chu an pe mai. Chuvang chuan, Zu kher hi chu District Council thu ni sela; NGO leh kohhran ten an duh tlat loh chuan, District Council pawh trade license an pek ngam ka ring lo.

A pahnihnaah chuan, Section III sub-section 1, clause (j) hi District Council-ina Laws (Dan) kan siam ve theihna, ahranpa ngata district council mipuite min humhalhna bik a ni a. Clause (j) J-ah chuan, social custom and practice-ah dan siam kha a hman theih loh; tunah hian Lai leh Mara te chu kristian kan ni tawh; Zu bilh, in, thlawr tih vel hi kan social custom a ni tawh lo. CADC erawh kristian an ni ve lo; kan hre vek a, Buddhist an ni a, zu-bilh, zu-in, zu-thlawr tih vel hi tun thlengin an social custom leh practice a la ni. In tinin zu an bilh a, an thlawr a, an sem a; chu chu an custom leh practice-a bet a ni.

Chuvang chuan, he kan Dan siam hi District Councils te tan a tha lova, council hmusitna pawha ni a. Engpawh nise, kan Minister hian a windup hunah he proposal awm hi min hrilfiah thei se, a ngai (2019 Act) ang khan min dah sak leh se tiin, he House hi ka ngen a ni.

Tin, wawiina kan sawiho mekah hian, beer te, grape te hi ‘zu a ni’ tih leh, ‘zu a nilo’ ti tein thu kan inchuh a ni deuh ber a. Ka theih ang tawkin ka zir ve a, chuta ka rilrua lo awm chu – ‘Zu’ tih hi mizo tawng atangin paih ila, tichuan tuna hon. Minister-in a bill a rawn put luh pawh hi 100% dikah kan pawm theih ka ring a ni. Amaherawhchu, mizo tawnga ‘zu’ tih a awm chhung hi chuan, wine leh beer pawh hi ‘zu’ a la ni reng dawn a ni, tih hi ka sawi duh a ni.

Pu Speaker, he House chhung leh pawn pawh ni se, kan Chief Minister te, kan Minister-te ina an sawi ber chu – “He sorkar thar hi Pathian-a inngat-sorkar a ni a. Chuvangin, ‘Chakna ni lovin, thiltihtheihna ni hek lovin, ka thlarau zawkin le’ tih thu ah kan inngat a ni, tih kha a ni thin a. Ka lo rin ve em em, ‘a nih dawn hi le’ ka lo ti thin sorkar hian vawiinah zu bill an lo pulut ta tlat mai si a. Heta tang hi chuan, ‘he sorkar inngahna hi Pathian-ah ni tawh lovin, Mizo-mipui ah ni tawh hek lovin, Zu ah kan inngat tawh a nih hi’ tih ngaihdan ka nei tawh a ni. Kan Excise Minister zahawm tak hi kan zinga zu awmzia hre lo ber tura ka ngaih a ni a, beer pawh a la tem chhin ka ring lo. Mahse, Excise Minister a ni a, zu-zawrh phalna a rawn dil tlat mai hian ka rilru ah ngaihtuahna thui tak min neih tir a. Sadraka te, Mesaka te Abednegoa te thian dun khan, “rawhtuina meipui ah chuan min paih pawh ni ula, Pathianin min chhanchhuak dawn tho tho” an tih ang khan, ‘Zoram-mipui hi Pathianin min hruai dawn tho tho’ tiin, Pathianah rinna nghet tak ngatin, zu-zawrh phalna bill hi chu i pass lo hram mai ang u. Hnahlan grapes chingtute harsatna chu kan hria, anni tan chuan a tih dan chu a awm; tunah pawh an kalpui reng. Chuvang chuan, he bill hi chu pass lo ang u.

A bik takin Autonomous District area represents ka nihna angin, sawlam phei chu tun hma Congress sorkar pawh khan zu chungchangah chuan, ‘anmahni awmin awm rawh se’ an lo tih tawh, MNF pawhin an lo ti tawh, ZPM a lo nih ve leha hetia an rawn ti hi chu, kan mipuite thinlung a na viauin ka ring. Tin, MADC ah BJP an sorkar a, CADC ah BJP an sorkar a; chuvanga BJP min duh lo a nih pawhin, min lo huat viau pawhin, LADC ah kha hmanni lawk khan ZPM in sorkar ve tawh tho a, in lakah beiseina sang tak an neih lai taka an thuneihna va chuhpui mai kha chu a tha ber dawn em maw ni le? Chuvang chuan, kan House Leader leh a concern minister te ka ngen che u; engpawh ni se, chapter 1 amend tura proposal lo kal hi chu withdraw hram turin leh, zu bill, zu-zawrh phalna bill a nih hrim hrim vang hian i pass lo hram ang u. In tan pawh a tha lo ve; Pathianah inngat zawk rawh u. Ka lawm e.

**SPEAKER** : A lawmawm e. Tunah sawi turin member zahawm tak Pu Lalrinsanga Ralte ilo sawm ang. A phar hmasa tlat mai a, nichin khan. Sawina hun kan nei vek turah i ngai ang.

**PU LALRINSANGA RALTE:** Aw Pu Speaker, Ka lawm e. He lam i rawn melh phei deuh thin a, a lawmawm hle mai.

Hei wawiinniah “The Mizoram Liquor Prohibition Amendment Bill, 2025” kan han sawiho a ni a, a phurawm lo hlein ka hria a. Tin, a rawn puluttu kan Minister Pu Tetea hi kan bialtu MLA a ni a, keini veng lam chanchin hi a la hre chiang lo nge, Dinthar Veng te, Tuikual te chu tun hma atanga zu-tihbuai leh harsatna hrang hrang lo tawk tawh tute kan ni a. Khawtlang tangrualin harsa tak leh mi huat nasa takin khawtlang hruaitu ten an tuar a. Chutianga waviin nia fihlim chho thei ta kan ni a. Kan Bialtu MLA ngei maiin zu bill a rawn pu lut hi, a ma mimal duhtusam a nih ka ring lova. ZPM hian, ‘sorkarin chhiah la lut tam ila, zu bill kan pass hnu ah zu chhiah atangin pawisa kan hmu tam thei dah lawm maw’ tiin, a duh lo chung an put luh tir a nih kan ring deuh a. Ama duh thu ngeia ti a nih erawh chuan bial chhung mipuite kan rilru a na hlein kan ring a ni.

Tin, hei motivation-speaker nia kan ngaih a ni a, thalaite kawng dik zawh tura fuihtu berina zu thlah zalenna tur bill a rawn pu lut hi a fuh lo hlein ka hria a. A paw ka ti a ni. A kal

chhoh leh zelna turah pawh MLA hi kan la ni reng dawn em; kan ni reng dawn lo, Pu Speaker. He House ah hian kan awm ang a, kan la chhuak leh ang; chumi hunah pawh chuan nikum hmasa lawka a thusawite, vawiinnia an bill rawn put luh atang hian kan han ennawn ang a. Thu han sawi leh tur, thalaite kawng dik zawh turin theihtawp chhuaha, thahnem ngai taka a beih thinna te kha a fail phah dawn niin ka hria a, pawl ka ti takzet a; ka khawngaih takzet a ni.

Tin, Pu Speaker hei, ‘a sen chi’ kan tih mai thlah zalenna tur bill a niin ka hria a, chumi khuh bona tur chuan wine leh local fruits beer hi a presentation ah langsar takin a rawn sawi a. A phena awm zu thlah zalenna tur laia hi a pawl hlein ka hria a ni. Kan thlai thar hrang hrang atanga siam wine leh local fruits beer hi kei tha ka ti a, ka pawmpui takzet tho. Kan kut-hnathawktute’n an thawh rah an senga, hlawk zawka an thlatharte an hralh chhuah theihna tur bill erawh hi chu kei, a tha ka ti a. Amaherawhchu, chu chu helaila a rawn present ah lian taka rawn sawi siin, he bill laimu ber - insertion of new chapter 5A laia hi a sawi tam lo hlein ka hria a. Chu lai zawk a chu rawn sawi ka duh a ni a, Pu Speaker.

Kan kut-hnathawktu ten Mizoram-a thlai hrang hrang kan thar chhuahte atanga wine emaw, local fruits beer tha tak mai siam chhuaha, kan kut-hnathawktute’n an an kut hnathawh ah hlawh tha zawk an lakna tur erawh chu ka lawmpui takzet a. Pu Speaker, I phalnain insertion of new chapter 5A lai hi tawite han chhiar ka duh a. “Grant of special permit to dignitaries of foreign and domestic tourists’ tih a ni a. Hemi chungah hian India ram hmun khawi atang pawha rawn kal hnam dang ho khuan zu zalen takin an rawn keng lut thei dawn tihna a ni. Tin, foreign atang a rawn kalte pawhin zu zalen takin an rawn keng lut thei dawn a ni. He ti laia hi a pawl hlein ka hria a. Hei hi kan Chief Minister zahawm takin, ‘kan kohhran hote kan rawn a, kan sawipui tawh’ a tih khan, he chapter hi an enpuiin, kha kohhran, Chief Minister-in a rawn hote, ‘kan sawipui a, an remti e’ a tihah khan, he chapter hi an remtihpui reng em, tih zawh ka duh a. Tin, kan Chief Minister zahawm takin ‘kan kohhran hote kan rawn; kan sawipui’ a tih kha, eng kohhran nge, tutenge an nih, tih kha vawiinah hian sawi chiang law law se a thain kan hria a ni.

Tin, Pu Speaker, zu atanga chhiah lam kan it loh thu kha kan minister khan an sawi viaw nanga, he bill in a tum bulpui ber chu zu – ‘Mizoram sorkar hian zu atang hian chhiah la lut ila, eng emaw zat kan sorkar inenkawlna tur hian’ tih hi a lang chiang hlein ka hria a. Chuvang chuan, tlan chhe chungah he bill hi rawn lut a niin ka hria a, pass pui tlakah ka ngai lo a ni, Pu Speaker. Kan ngam a nih rau rau chuan, dan angin mi tin ina zu tha an in theih tur ang te chu zuar law law zawk turah ka ngai che u a, he bill in rawn put luh hian. Zu-zawrh kan duh rau rau a nih chuan, engatinge huaisen taka kan tih mai loh? Vawiinni ah hian permit kan pe leh dawn a, hei. Tin, ‘zu kan zuar dawn lo’ an ti a, Pu Speaker I vei lama mite’n; ‘ZPM-sorkar hian zu kan zuar dawn lo’ an ti a. Amaherawhchu, chiang takin helai - insertion of new chapter 5A ah hian a lang a. ‘Excise and Narcotics Department hian zu a zuar dawn’ tih a inziak a ni. Excise and Narcotics Department hian zu a kawng ang a, a zuar dawn. He sorkar hi zu-zuar sorkar in ni dawn. Local fruit beer leh wine ringawt hi chu ka sawisêl lo; mahse, ‘zu’ hi. Pu Speaker, I veilama ZPM Sorkar hian zu a zuar tlat dawn; helai ah hian a inziak tlat. I ding lama mite’n; Pu Chhantea lam ni lovin. Pu Speaker, hei hi a pawl hlein ka hria a.

Chuvang chuan Zu atanga chhiah kan ita, zu-zawrh kan duh rau rau a nih chuan, huaisen takin engatinge in rawn tih mai loh? Engatinge hlau leh khur chung leh tlanche chungin

zu aṭanga chhiah la duh ve siin, zu-zawrh tum siin a phenah, ‘Zu’ in zawrh tur thu lian taka ziak siin; a wine leh local fruit beer ringawt hi inrawn sawi lar tak mai, tih hi vawiinnia ka zawhna che u a ni.

Chuvâng chuan, Pu Speaker, hetiang in ti rau raua in ngam anih rau rau chuan, huaisen takin zuar mai ta che u. Vawiinah kha, kan member zahawm tak Pu Laltea pawhin “Zu kan zuar dâwn lo”, arawn ti a. Pu Speaker, i ding lama mite pawhin zu zawrh leh zawrh loh chungchangah hian hei, kan bill hi an en Chiang lo hlein ka hria. Vawiinniah hian Excise Department-in zu a kawl dâwn a, hetah hian a lei theih dâwn a; tin, permit kan pe leh dâwn a ni. He permit peka pawh hi kei, ka ngaihdânah chuan Pu Speaker, mi thiltitheite tan a ni. “Mi zawng zawngin zu man tlâwm zâwk, zu ṭha zawk kan in ang”, tiin, ṭhalai tam tak pawh hian he bill an hmuh hian anrawn sawi maithei. Ni e; mi kan inang lova. Amaherawhchu, vawiinniah hian zu in thei tur bik permit kan inpe leh dâwn a ni a. Pu Speaker, heng a in theite hian Excise Department-ah ngei zu an lei thei dâwn a ni. Chuvâng chuan, ‘he sorkar hi zu zuar tur ngei kan ni e’ tiin inpawm ngam ila a ṭhain ka hria a ni.

Tin, Pu Speaker, zu in phalna permit, a hmingah pawh ‘red card’ kan ti a. Vawiinni hian he sorkar hi red-card kan inpe chhonzawm ta niin ka hria. 2028-ah chuan kohhran leh khawtlâng, NGO-te duh loh a rûkarawn phum ru siin, mipui-vântlâng hmuh lan mawi tumin local fruit beer leh wine zuar angin ropui taka kut hnathawktute hmangaih anga lang siin, a chhunga hlawm leh pawimawh tak thlah zalên si, thlah zalên lo ang bawksia tlanche chungah he bill inrawn put luh hi, red-card in inpe ngeiin ka ring a ni.

Chuvâng chuan, Pu Speaker, he zu-zawrhna bill anrawn putluh hi kei chuan ṭha ka ti lova, pawm pui tlâkah ka ngai lo a ni, tih ka sawi duh a ni e. Ka lawm e.

*(Speech not corrected.)*

**SPEAKER** : Member zahawm tak, Pu Lalrintluanga Sailo ilo sâwm ang.

**PU LALRINTLUANGA SAILO:** Pu Speaker, ka lawm e. Taksa chak lo chung chungin, he Bill hi kan ram tana thil ṭhalo a nih avângin, vawiinah House karawn present hram a, a vanduaithlâk ka ti hle a. A changtu minister khan thiam takin ama irâwm chhuak chiah ni lo te kha, a tuhtu awm avânga sawi ni ah ka ngai a.

Chumi hma chuan, Pu Speaker, kan Lal Isua khan a sawi loh te Chapchâr Kût nia sawi chawp tir te kha a buaithlâk hle mai a. Tirhkoh Paula thu sawi te Isua sawi anga mittui tla per pura kan sawi duh te kha; ‘ram kan kaihhruainah hi chuan kan Chianglo awm mang e’, tih te ka ngaihtuah a. Pu Speaker, vawiina kan Bill ngaihtuah tur, “The Mizoram Liquor (Prohibition) Amendment Bill, 2025” hi dawihzep tak chungah he Sorkarin a siamṭhat leh tak, ṭha chuang si lo kan han sawiho tur hi a vanduaithlâk hlein ka hria a ni.

Pu Speaker, kan Bible ṭawngkam te pawh tute emaw anga dik lo taka quote chhuak lovin, a dik tak ka’n quote chhuak duh a. Luka 24:21-a Israel faten, “Keinin Israel-te tlantu tur kha a nih kan beisei tehlu nen”, an tih ang deuh khan, Mizoram Sorkar lo awm tawha Chief Minister kohhran-Upa kan neih hmasak ber kaihhruaina hnuaiah 2019-a Zu khâpna Dân kan lo siam khawng tak kha bawhchhiaa, chu Mizoram Chief Minister kohhran-Upa neih hmasak ber hoa Zu-zawrh duhna bill sawiho a lo ngai ta hi ka mumang emaw ka ti hial a ni, Pu Speaker.

Hetianga kan ram kohhrante leh tlawmngai pâwl hrang hrangte duh hauh loh, fakna hla siamtu pawhin, “Sual tinrêng bul a ni”, a lo tih ang chi te; tin, kan thalaite nunna tam tak kan hloh tawhna ni bawk si zu zawrh tuma kan Sorkar hotu lu ber ina hma a’n laa, “wine hi ‘zu’ a ni lo; beer pawh ‘zu’ a ni bawk hek lo,” a han ti te kha, kei ka kristianna conviction-ah hian ka pawm lo hrim hrim a ni. A chhan chu Sap ramah te, khawchhakah te pawh kan kal ve a; ram hrang hrangah kan zin ve a ni. Tin, Vairêngte check gate kan pel a, wine-shop ah hian puanthan an zuar lo; ‘zu’ a ni an zawrh ni. Tin, beer hi thingpui dâwrah pakhatmah ka hmu lo; zu dâwr ah chauh a ni a awm ni. ‘Zu’ a ni, he thil hi. Chu chu tumahin thil dangin an hrilhfiyah theiin ka ring lo.

*\*(Expunged as per the direction of the Hon. Speaker.)*

**SPEAKER** : Ngawi rawh, ngawi rawh; khawngaihin. Member zahawm tak kha hmannah, ‘member-te a mimal taka in charge tur a ni lo’ tih kha kan sawi tawh a. Tin, hmanni ah (**Pu Lalrintluanga Sailo**: Pu Speaker...) ka’n sawi lawk ang khawngaih takin. (Member zahawm tak kha), Lammual ah State Day of Prayer kan nei a, chutah chuan politician-te pawimawhna kan sawi a ni. Kan member zahawm tak Pu C. Ngunlianchnunga phei chuan, “Kan ram rorêna ah...” ti mai lovin, “Politician tinah te hian...”, a ti a; duhthusam a ni. Khati khawp khan ngaihtuahna kan hmang a, Pathian kan au a ni. Chuvângin, fiamthu thawh nân emaw, mimal inbeih nan emaw kha chuan kha kha chu hmang lo ila.

Chuvângin, Rule No. 336-ina thuneihna min pêk angin, khatiang tawngkam kha chu khawngaih takin hmang lo ila; kan expunge ang.

**PU LALRINTLUANGA SAILO**: Pu Speaker, an thusawi ka sawi chhawng mai a ni a. Tin, an sawia kha, ram mipui tâna an sawi a ni a, record a awm vek a. Chuvâng chuan, vawiinni hian Pu Speaker, keini kohhranah pawh dinhmun sâng chelh ve pha lo zâwkte hian Bible châng, Hebrai 12:4-a kan hmuh, “Sual dovin thisen chhuak khawp hialin in la tâng si lo”, a tih thu zâwma, thisen chhuak khawp hiala tâng turin i veilama mite inbuatsaih a ngai te hi, a vanduaithlâk hlein ka hria a ni.

Chuvângin, Pu Speaker, vawiinniah hian he House-a thute hi Mizo mipuite aiawha thu leh ram rorêna ah a tha ber rêl chhuak tura thlan chhuah te kan ni theuh a. Chu chu kan hriat thar leh pawh thain ka hria.

Kan Pathianthu, Rom 12:8-ah “Rorêltuten taima takin rêl rawh se” tih kan hmuh angin, Pathian leh kohhran, tlawmngai pawl hrang hrang leh ram-mipuite tana rorêla thuten zu zuar tura ro kan rêl ta mai hi a vanduaithlâk ka ti a. Hei hi a kristian lova, a kohhran lo bawk a ni. Keini vei lama mite hi chuan kan ram mipuite’n kohhran leh tlâwmngai pawlte duh dân lo zâwnga rorêna kalpui hi tha kan ti theiin ka ring lo a ni.

Chuvângin, Pu Speaker, vawiinnia kan Bill sawiho Chapter 5(A), nichina kan member zahawm takin a sawi tâkah te khan ...

**SPEAKER** : Khawngaih takin. Hei, thingpui in chawlh hun a lo ni ta a. Kan member hi kan sawi zawh tir law law em ni ang? (House-in sawi zawh tir a remti a.) Aw le, sawi chhonzawm rawh le.

**PU LALRINTLUANGA SAILO:** Pu Speaker, foreigners leh domestic tourist-te kan ramah zu ken luh kan phal sak dâwn ta a ni a. Tin, chu an zu ken luh chu an kham khawp loh pawhin ‘Excise Department ah an lei belh thei ang’ tih te kha a lo lang ta a. Tin, Section 45 (b) ah ‘Medical avanga zu mamawh tan Red Card siam sak an ni ang a, Excise hnenah an lei thei ang’ tih te. Tin 45 (c) ah ‘Canteen ah foreign zu zawrh phal’ tihah pawh sap-zu ‘foreign liquor’ a ti a ni. Tin, ‘Conditions and Regulations Relating Wine Storage and Sale’ tiha, ‘retail price-a zu zuar tur tan permission hranpa a ngai lo ang’ tih lo lang te hi a vanduaithlak hlein ka hria. Chuvang chuan, he kan bill hi kan ram tan a thatloh zia sawi theia Pathian-in hun tha min buatsaih sak hi ka lawm khawp mai. Pu Speaker, he bill sorkarin a draft lai hian hian zu-zawrh hi an phur lutuk a an theihngihl palh nge, ka hre lova. He Dan a sawiah hian alcoholic content pakhatmah sawi a awm lova, legal drinking age a sawi a awm lo bawk a ni. Hengte pawh hi a famkim loh zia tilangtu a ni a.

Tin Pu Speaker, chu zawng zawng aia mak zawk chu - he ZPM sorkar lo pian phat atang hian zu-zawrh leh siamah hian chak taka hma an la a ni tih hi a langin ka hria a. A chhan chu, pineapple atang siam alcohol content sang tak kan nei te, ‘Chepa’ an tih, vodka type deuha siam te; vawiinah hian Pu Speaker, hei ka rawn keng nghe nghe a. Hei hi Chepa chu a ni a, alcoholic content hi engzat nge ‘Chepa’ tiha hi? A siamtu hi Biakrinawma s/o Denghlira, ZPM Worker, New Chalrang a ni. Chutiang bawkin, hei hi ‘Fiara’ tih a ni a, chupa siam bawk chu a ni. Pu Speaker, ka rawn vawm phei dawn nge? Hei hi House-property ah ka hlan duh a. Alcohol content a hi ka hre duh a ni. Kha kha tun Chapchar Kut ah pawh an leklam hle a ni. A fim zawk kha 350 ml a ni a, a man kha 800/-; a te zawka kha 250 ml a ni a, 250/-in an zuar a ni. A to dana kha a rapthlak lutuk a. Tin, a ziakah khan ‘Pineapple atanga siam’ tih a awm a, pineapple rim a nam miah lo a ni. Chuvang chuan, vawiin niah hian kan ZPM Worker, Biakrinawma s/o Denghlira, New Chalrang an pek ang hian inlo inpe teuh tawh em? Chumi nemngheh nan chuan he Dan hi kan siam mai a ni lo maw?

Pu Speaker, a manganthlak hlein ka hria a. Kei leh vawiin nia he bill puluttu hi zu chungchang hrelo ber pawl kan nih ka ring. Zu hi a la tem lovin ka hria a, keipawhin ka la tem lo a ni. Chuvang chuan, he bill hi kan ram, Kristian ramah hian introduce tlakah ka ngai lova. Entiman – Champhai leh Hnahlan te ah chuan grapes ching an tam em em a, tihngaihna a awm lo a ni. Chuvang chuan, sorkar kal tawh ten khatianga siamna an lo bun kha chu a tha e; vawiinah hian a dang (other items) hi buaipui tham khawp farmers te hian kan la thar lovin ka hria. Chutiang chu ka ngaihnan a ni, Pu Speaker.

A tawp bera ka sawi duh chu - Kan sorkar kal tawh Pu Lal Thanhawla sorkar khan sum harsatna avangin huaisen takin zu a zuar mai a, chutiang chu vawiin niah hian he sorkar kal mek pawh hian zu-zawrh hi tha a tih zia a lang reng a. Amaherawhchu, mahnia hma la ngam si lovin midang kutah ben per an tum a, ‘kohhran hruaitute nen an remtih chinah kan kal dawn’ te an han ti a. Hei hi eng kohhran nge ka hre duh a ni; kohhran hian beer siam a awih ka ring lo. Chuvang chuan, Pu Speaker, keni erawh hi chuan zu hi hrilhfhah teh chiam ngaiin kan hre lova, ‘wine hi zu a nilo’ emaw, ‘beer hi zu a nilo’ emaw pawh tih kan tum ve lo. Kan hriatchian em em chu – ‘wine-shop ah zu an zuar thin’ tih a ni; thildang an zuar lo. ‘Beer’ pawh zu a nih avangin, khawi thingpui dawrah emaw, khawi dawrkai reng rengah emaw an zuar ngai lo, zu dawrah chauh a awm a ni. Chuvangin, Pu Speaker, Habakuka 2:15-ah “A thenawm hnena zu in tur petu chu a chung a pik e,” kan Bible-in a tih avang te leh, kan ram hian zu zawrh kan la tlin loh avanga zu-zawrh tha kan tih loh avangin, he bill hi ka pawm lova, pass tlakah ka ngai lo a ni. Ka lawm e.

**SPEAKER** : A lawmawm e. Tunah chuan thingpui in turin kan chawl ang a, dar 2:00 PM ah kan lut khawm leh dawn nia.

*(Recess at 1:05 PM)*

**2:00 PM:**

**SPEAKER** : Le, “The Mizoram Liquor (Prohibition) Amendment Bill, 2025” kan sawi mek kha a ni a. LoB a kan lo hmuh tawh ang khan, business dang - General Discussion of Budget kan la nei leh dawn a ni tih kha member ten hre ta ila. Aw le, tunge han sawi leh ang? Aw Pu Ramthanmawia ilo sawm ang.

**PU RAMTHANMAWIA:** Pu Speaker, ka lawm e. Vawiinah kan Minister zahawm takin “The Mizoram Liquor (Prohibition) Amendment Bill, 2025” a rawn put luh hetia sawiho a ngai ta mai hi a lungchhiatthlak ka ti a. Zu khuahkhirhna leh zua kan buai dan hun kal tawhah kan hria a. Mizoram in kan thalai te, kan pa-valaite nunna a suat nasat zia leh hmeithai, fahrah kan ramah zu avanga an tam zia kan hria a ni. Tunah hian Zu-khap burna Dan 2019-a pass a nih tak hnu khan, khang zu avanga harsatna kan tawh tam tak chu sutkianin a awm a, thihna leh hrisel lohna tam tak tunah hian kan pumpelth mek a ni a. Chutih laia zu sawi mawia, ‘beer leh wine hi ‘zu’ a ni lo’ te kan han ti a. Helai hi khawi atangin nge ‘zu a ni lo’ tih hi kei, hriatthiam har ka ti a. Chuvangin, wine leh beer hi zu a nih dan tlem han sawi ila, Pu Speaker.

1. The Mizoram Excise Act, 1973, section 2, Sub-Section 21 in ‘zu’ a hrilhfiyah dan chu – “Mi tirui thei - zu, rakzu leh eng tuiah pawh alcohol a awm phawt chuan zu a ni” tih a ni.

2. Tin, Mizoram Liquor Total Prohibition Act, 1995 Section 2, sub-section clause 1 in ‘zu’ a hrilhfiyah dan chu – “Mi tirui thei zu in a huamte chu - zu, rakzu, tinzu, zupui leh eng tuiah pawh alcohol a awm phawt chuan ‘zu’ a ni”, tih a ni.

3. Mizoram Liquor Prohibition Act, 2019, Section 2, clause (r) ah chuan – “Mi tirui thei emaw, ti luhai thei zu in a huamte chu - eng tui pawh, alcohol awm tawh phawt na chu ‘zu’ a ni vek”, tih a ni.

4. Mizoram Liquor Prohibition (Amendment) Bill, 2025 hian zu sawifiyah dan dang a nei lo a, a Principal Act - Mizoram Liquor Prohibition Act, 2019 ami ang hi a ring nghal a ni. Sorkarin ‘zu’ a lo sawifiyah dan leh a sawifiyah mek dan chu, “eng tuiah emaw, eng thilah emaw pawh alcohol a awm phawt chuan, ‘zu’ a ni” tih a ni.

A danga sawifiyahna Pu Speaker, a awm chuang lo a ni. Wine pawh hi ‘zu’ a ni. Khawvel universal standard wine-a alcohol awm zat chu 10 - 16% a ni. Beer hi ‘zu’ a ni em? ‘Zu’ ni e. Sorkarin ‘zu’ a hrilhfiyah dan chuan, beer hi ‘zu’ a ni; mipui ngaihndanah pawh beer hi ‘zu’ a ni. License nei lo tan zawrh mai theih pawh a ni lo. Khawvel universal standard beer-ah chuan 4 - 8% alcohol a awm a ni. Sorkarin a dan siam te hmangin tui (liquid) engah pawh alcohol a awm phawt chuan, ‘zu’ a ni” a ti a ni. Chuti a nih si chuan, ‘zu-zawrh kan tum lo; wine leh beer zawrh kan tum mai a ni’ tih kha chu, ‘zu kan zuar dawn’ tihna a ni mai lawm ni, Pu Speaker?

Wine leh beer hi ‘zu a ni lo’ kan ti a nih si chuan, a duh duhin wine leh beer chu zuar mai awm; Dan hmanga phalna license pek hranpa a ngai em ni? Entirman – Coca Cola te, Fanta te, Futui te ang bawh hian a duh duhin zuar ve mai awm; Engatinge license pek a ngaih? ‘Zu’ a nih avangin license pek a ngai a ni. ‘Mizoram Liquor Prohibition (Amendment) Bill, 2025’ New Chapter 45(a) -ah hian, “Grant of Special Permit to Dignitaries of Foreign and Domestic and Tourist” tih a awm a ni. Pu Speaker, hei taka hi kan Minister zahawm tak, a puluttu khan a sawina-in a sawi na lo khawp mai; a sawi tha duh lo, ti ila, thildang khan hliahkhuh a tum niin ka hria a, hei hi a pawimawh lai ber chu a ni. Hemi hnuah hian Foreign leh India ramchhunga mi lokalte mai bakah tourist zawng zawngte’n zu an rawn keng lut thei dawn a ni; hei hi a pawimawh em em a ni. Hei hi 2019 Act-ah khan a awm lo reng reng; sorkar hmasaah khan hei hi paih vek a ni. Tin, Excise & Narcotic atangin a lei theih dawn bawh a. Hetia Excise & Narcotic atanga a lei theih dawn chuan, sorkarin zu kan zuar dawn a ni mai lo em ni? Hei hi pehhelna tur dang a awm lo; sawimawh theih pawh a ni lo, Pu Speaker. Chu mai ni lovin, online te pawhin special permit hi a la dil theih dawn an ti leh nghal a.

Pu Speaker, Mizote hi zu-ah hian kan buai em em a ni, hman atangin. A chhan chu, kan hnam hian zu hi kan ngaisang a, kan ngaihlu a, kan ngai ropui a. Hnam dangte’n engahmah an ngaih loh kawngsira zu zawrhna a awm ter tuar pawhin an buaipui ve vak lo. Keini chu kan missionary lo chhuak hmasate khan kan hnam ziarang te, kan dinhmun te, kan mizia te min hrechiang a, a tir atangin zu kha an rawn khap a ni; zu in kha an rawn khap nghal a ni. Pi leh pute khan zu hi engkimah hmanruaah an nei thin a, Mizo hnam te hian zu kan chhiatpui dawn tih hriain kan missionary te khan kohhran mite chu zu in lo turin an lo inkhap daih tawh a ni. Chu chu tuna kal zelah hian Pu Speaker, kan kohhran te, khawtlang te, nu leh pa leh kan NGO te pawh hian chu chu zawmin, ‘zu hi phalrai chi a ni lo; zu zawrh hi phalrai chi a ni lo; kan chhiatpui zel dawn a ni’ tih hriain, zu zawrh an duh lo a ni.

Chuvang chuan, kan hnamin he zu hi kan la zo lo a. Eng emaw ti chhunga zu zawrhna hun kan neih pawh khan kan thalaite, kan pa-valaite zu avangin nasa takin harsatna an tawh a, nunna tam tak kan chan a ni. Vawiinah hian chutianga zu khuahkhirh hna department leh khawtlang te pawhin nasa taka an bei a, kan khuahlhirh hneh lo a ni tih chu phat rual a ni lo. Amaherawhchu, theihtawp kan chhuah chung pawhin harsatna tawh kan la awm ta cheu a. Tuna kan bill hi kan pass a nih ngat chuan, zu hi nasa takin a rawn thang dawn a, a rawn pung dawn a, a rawn huangtau dawn a, in ngai lo pawhin an in dawn tawh a ni. Beer te hi kan tleirawl te-te pawh hian in an chak em em a, an tan chuan a lawmawm khawp ang. Beer an tih atangin ‘a senchi’ kan tihah hian an chho ngei ngei thin a ni. Chu chu kan hmabak a nih avangin, beer te pawh hi sawi mawi chi vak a ni lo. Beer an in ang a, an rui ang a, an khawpkham lo ang a, a sen chi-ah an lut chho thin.

Chuvang chuan, vawiina kan bill rawn puluttuin kan kut-hnathawktute chanpual leh duhsakna a rawn sawi kha, a lawmawm viau laiin, engatinge heng kan fruits leh kan thlaitharte hi beer ah te siamtir kan tum tlat, tih hi ka zawrhna a ni; foods processing lamah te hian kan kal thei zawk lo em ni, industry atangin? Kan thlaithar te pawh hi sum deh chhuahna tur, sum chang thei tura process tur hian zu-a siam kher a ngai lo ve, Pu Speaker; beer-a siam kher a ngai lo. Pu Speaker tuna grapes kan thar tam takah pawh wine ah an siam lo thei lova, wine ah an siam ta a, a tangkai em em a ni.

Amaherawhchu, thlaithar dang zawng zawng beer-a siam kher kan tum hi chu a buaithlak a ni, Pu Speaker. Kan hmangaih a nih chuan engatinge anmahni thlaithar te hi; tunlaih pawh

processing te, packing te an ti a, an ti ro va, khatiang zawnga ngaihtuahna chang kan hre lo nge, zu-a siam mai kan tum hi. Pu Speaker, i dinglama mite pawh hi ban phar lovin vote thlak tir dawn ta ila chuan, he bill hi pass duh lo kan awm nual ka ring a ni. A chhan chu, kohhrana rawngbawltute, kohhrana mi tangkai tak takte vek kan ni. He bill hi chu a pawi a, sawimam chi a ni lova, sawimawi chi pawh a ni lova; chuvang chuan, hnuk dawkh leh mai sela, kohhran pawhin tha an ti lova, khawtlang pawhin. Pu Speaker, ram dang atanga lo lut reng rengin zu an rawn keng lut thei dawn a, helaiah an rawn dil thei dawn bawkh a, red-card nei, permit neiin an lei thei dawn bawkh a, Excise-in canteen-ah zu an zuar dawn a, chu chu an lei thei dawn a ni. Chu lo liama zu zuar; zu zawrh kan tum tih hi a chiangin ka hria a ni, Pu Speaker.

Chuvangin, tun hun atan chuan he bill hi pass lo ila, hun lo kal zelah la ngaihtuah tha ila ti kha ka ngaihdan a ni a. A puluttu pawhin ip tak chungin a rawn pulut a niin ka hria a. Amah hi thalaite hmakhua ngai tak a ni a, ruihhlo lama an tlan te a hlau em emin ka ring a. Chuvangin, Pu Speaker, vawiina kan bill hi tha deuh angin lang mahse, a phenah thil hlauhawm tak a awm tlat avangin, ‘pass lo ang u’ tiin ka rawn sawi a ni e. Ka lawm e.

**SPEAKER** : Aw le, member zahawm tak Pu VL Zaithanzama ilo sawm ang.

**PU VL ZAITHANZAMA:** Pu Speaker, “The Mizoram Liquor (Prohibition) Amendment Bill, 2025” hi ‘ka thlawp a ni’ tih, a hmasain ka sawi duh a.

Pu Speaker, tun tum kan Assembly Session chu i dinglama leh i vei lama thute hi bill kan sawihonaah kan thu a rual tlangpui zel a. Tuna kan sawi lai mek pawh hi lungrual taka kan pawm tlan leh theih ka beisei rualin, pawm tlan zel ringawt chu dikin an hre lo a ni ang a, hnialna tur an rawn zawng ve tan niin ka hria a; han tih awm tak pawh niin ka hre nghe nghe a ni.

Kut-hnathawktute tinzawna an hamthatna tura Dan siam hi a hlu a, hei hian kan ram hmasawna tak tak a thlen ngei ka ring a ni. Zu zawrhna dan kan buaipui lova, tunah hian Zu khapna dan awmsa kha amendment kan buaipui chauh a ni a. Ka hmaa thu rawnsawitu member zahawm tak khan wine hi ‘zu’ emaw an ti tlat a, mak ka ti. Tuna Grape wine phalna hi kum 2008, Pu Speaker, i veilama thute phalna pek kha a ni a. Zu zawrh phalna petu chu anmahnni kha an ni mai lo em ni? Chu chu, wine atan chauh ni lovin, kan thlai dangte atang pawh hian siam ve ila’ tiin amendment kan rawn chhawp chhuak mai a ni a. Chuvang chuan, wine hi ‘zu’ a nih chuan, a phalna petu chu MNF party kha an ni ngei a ni, tih kha ka sawi tel duh a ni. Beer hi wine aiin alcohol content ala tlem zawkh leh nghal a. Chuvangin, wine leh beer te chuti taka kan han buaipui thar leh ta hi sawi sel tur zawng hrim hrim an ang a.

Kut-hnathawktute tana tangkai tur a nih avangin, he bill hi rawn put luh a ni a, farmers te tanpuitu tur a ni. Man man taka an tharchhuahte hralh thei turin hei hian a pui dawn a ni. Tin, ram pawna hralhchhuahna tur he bill hian a keng tel hi a tihlu zualtu a ni. Pu Speaker, tun hmaa zu zawrh phalna kan neih lai khan, State pawn atanga zu siam te ual au takin kan zuar a, mahni siam ve kan phal lova khan ka rilru a tina thin. Mi siam phur taka zuara, mahni siam ve awih loh kha thil mak tak a ni a. Mizote hi mahni thil siam chhuah ni lova hmasawn duhna rilru hi kan paih vat a tha awm e. Keimahni siam chhuah ngei hi ram pawnah te hralh chhuak ve ila, chu chuan kan economy hi a chawikang dawn a ni. Kan

Minister, hetiang dan ngaihtuah chhuaktu hi a fakawm ka ti a, hetiang bill a rawn pulut hi lawmawm ka ti takzet a ni. Ram pawnah kan tharchhuah te a tam thei ang ber thawn chhuaha, a tlem thei ang ber lak luh hi kan ram tan a pawimawh em em a ni.

Grapes mai ni lo, lakhuihthei leh thil dang dang atangin wine te kan siam ve ang a, tih ngaihtuahna kan nei a. Lakhuihthei hi cheng 10/kg an hralh thin a, fruit beer-a siam chuan 100/- aia tam te a chhuak thei a ni. Kut-hnathawktute'n hei hi an hlawkpui em em dawn a ni tih hriain he Amendment Bill hi rawn put luh a ni a. Lakhuihthei chin uarna khua Sialhawk (hei hi ka pianna khua a ni a) ah ka'n zawt kual a, self-help group tha tak an awm a, beer emaw, wine emaw siam dan training an nei vek tawh a, phalna an neih theihna atan he bill hi an lo nghakhlel em em a ni, tih te ka han hre leh zel a.

Bill danga kan inthural viau lain, he bill, kut-hnathawka eizawngte leh thangthar tena an nghahhlel, mipui nawlpuiin tha an tih hi, i vei lama mite hian sawiselna an han zawng ve leh hi min tibuai hle mai. Sawiselna tur zawng tute'n an sawiselna lai chu, Dan awm lai hi a ni. Amend tura kan rawn chhawp chhuah lai hi chu wine leh beer lai hi a ni a, wine te pawh hi phalna lo pek sa vek tawh a ni. Dan awmsa, anmahni ina an siama phalna an pek tawh kha tunah hian an rawn sawisel lai tak chu niin ka hria a ni, Pu Speaker.

Zu kan duh lo; zu duh lo kan ni, ZPM hi. Chuvang chuan, Rangvamual hnawk nuaih nuaih te kha kan Minister zahawm tak theihtawp chhuahnain a lo fai ta deuh kuar a, a sen chi lane te pawh hmuh tur a awm ta lo. Aizawl khawpui hrim hrim hi ruihhlo ngaite duh tawka an talna thin nia kan ngaih kha, a lo fai ta duak a. Tuna kan buaina ber hi zu a ni lo; veilama mite rawn sawi tam tak kha chu, 'tur' a ni deuh ber. Kan thlaitharte wine leh beer-a kan siam hi food-processing chu a ni. Wine leh beer a siam loa, food processing buaipui tur khan min han beisei a, wine leh beer hi food-processing kan tih theihna kawng hnai ber chu a ni. Sawiselna tur zawngtute'n an sawisel lai tak chu, Dan awm lai hi a ni. Amend tura kan rawn chhawp chhuah lai hi chu, wine leh beer lai hi a ni mai a. Hei pawh grape-wine awm sa tho a ni a, beer lai hi an duh loh lai ber chu a ni mai awm e.

Pu Speaker, he Amendment Bill hi ka thlawp a, a tlang ngei theihna tura theihtawp min chhuahpui turin Memberte ka sawm e. Ka lawm e.

**SPEAKER** : Tunah, Member zahawm tak Pu R. Rohmingliana ilo sawm ang.

**PU R. ROHMINGLIANA:** Pu Speaker, ka lawm e. Khawvel hi famkim lohna ram a ni a. Thil sawi reng rengah hian a thatna lam leh that lohna lam sawi tur a awm vek a. He Bill-ah erawh chuan, Pu Speaker, thatna pakhat chiah ka hmu a. MLA kan nih tan tirha Bible Society in a Bible min pek hi ka chhiar nasat phah khawp mai, zu chungchang sawina. Chu chu keimahah chuan a thatna ka hmuh chhun a ni.

Pu Speaker, he lehkhabu hi 'Nghinglova' ni ta se, a move tupa khan 'Nghinga' tia rawn ko niin ka hre deuh tlat a ni. Chuvang chuan, a letling deuhin kan ko tlat mai. A chhung thu hi kan hriatchian a ngai a, a ni lo zawngin kan sawi ta mah mahin ka hria a, a paw ka ti. Tlawm ngam te, thiltha ti ngam te hi 'mi-huaisen' kan tih te chu anni. Chumi rual chuan, thil tha a nilo tih hre renga tilui tlat te hi 'mi-huaisen' kan ti ve tho em? Kha kha chu kan rilru-ah inzawt ta ila.

Pu Speaker, he bill a rawn chhuah hian a mak khawp mai; ‘a leak out e,’ tih te a awm a. He bill chungchangah hian engatinge; bill dangah sawi a awm lo; FIR te thehluh niin ka hria; Pu Speaker, ka hriatsual loh chuan. MLA te property a nih tawh chuan public property a ni dawn lawm ni, MLA te min pek tawh chuan? Ka hriatsual loh chuan, state dangah te chuan hetiang an pek hi mipui nawlpuiin an lo discuss thin a ni, a chhuah hnu hian; chuta tang chuan rorelna dik a chhuah theihna turin. Engatinge hei hi zep ruk tet teta House-a pharh a nih? Hriatthiam har ka ti a ni. Chu mai pawh ni lovin, an la siam tha leh a, a hunah kan sawi thei lo a; kan sawn leh a. Vawiin te hi budget general discussion ni a ni a, a uiawm ka ti.

Pu Speaker, he bill chungchangah hian, “kan kohhrante nen kan sawiho tawh a, kohhran remtih chinah kan regulate dawn a ni” tiin kan House leader khan a sawi a, hei hi a tawngkam dik tak a ni. Pu Speaker, eng kohhran nge an rawna, eng kohhrante nge hemi a pawmpuitu ang deuha a sawi te hi ka hre chak khawp mai. Hei hi chu min hrilh ngei teh se.

Tin, Pu Speaker, ka sawi duh chu, zu zawrh te, zu in te hi Mizoram-a kohhran leh kan NGO hruiute’n an phal lova. Kei pawh NGO-ah te, kohhranah te member ka ni a. Tin, MLA ka nih theihna tura official candidate min petu chu MNF party a ni. MNF party chuan kan stand chu - zu zawrh loh, zu in loh te a ni. Chuvang chuan, kei chuan he bill pass hi ka remti lo a ni.

Pu Speaker, he bill rawn move tu Minister zahawm takin a rawn sawi lan thil pakhat rawn sawi chian duh ka nei a, ‘kohhran thenkhatte’n grape-wine sacrament-ah an hmang’ tih kha, sawi chian thain ka hria. Nichinah Bible ka rawn lek chhuak tawh a, Thuthlung Hlui-ah hian (ka hmuh ve dan chuan) zu an sawina – wine (yayin), tirosh, sekhar, khamiz, sobe, khomez tih te a ni a, heta ‘tirosh’ bik a hi grape atanga siam a ni a, grapewine a ni. Ruih theih tura an siam hmaa grapewine-a kha ‘tiros’ ti hian a rawn sawi a ni. Chuvang chuan, sacrament lamah an siam, Baptist lam chuan sacrament a kan hman dawn chuan hei hi ruihtheih thil a nih hmain Baptist hotuten a an duh dana an han order a ni. Baptist zu anga inpuh deuthaw kha tha ka ti lo. He bill hi kohhran chona a ni em aw ka ti, a tul lo ka ti khawp mai.

Tin vawiinah hian pass ta ila, a pass tu te hian Biak inah thu kan sawi leh ngam ang em? Keimahni theuh in en teh ang u. Tin, he Bill rawt chhuaktu hi tunge maw ni reng reng le? Pu Speaker, i dinglama MLA te hian an hre vek em, he bill rawt chhuah lai hian? Tax la lut tak tak si lo, a move tuin Pu Speaker, ‘Tax a lut dawn lo,’ a ti a. Chutiang ni bawk si engnge he bill hi pass a tulna? In ngaih pawimawh zawng chu hmunphiah te, hmarchate te, aieng te a ni a; aieng-beer te, hmarcha-beer te, hmunphiah-beer te kan siam dawn em ni? A ni bawk si lo. Pineapple te kan ti a, MIFCO in Chhingchhip ah a nei a ni lawm ni? Khatah khan juice zawngin engatinge an tih mai loh, man man zawka an tih duh si chuan?

Tin, ‘MNF in, grape-wine in rawn ti fo mai a’ tih te kha, a dik a lawm; grape-wine chu a ni a lawm. Bible chhungah hian ‘grape-wine’ tih hi a chhe zawnga sawina a awm mang meuh lo a ni. Ka rawn hrilh ang che u a chang te kha; he tiang hi in dawn ve vek kha, lo chhiar ve rawh u. Tin, Pu Speaker, grape-wine kan tih chuan, pineapple-wine te pawh rawn ti ve mai sela, kha mi bik angah khan; kut-hnathawktute an hmangaih tak tak a nih chuan. Chuvang chuan, pineapple wine te, papaya wine te rawn siam ve mai rawh se, Pu Speaker.

Helaia a rawn tih lan loh ka chhiar chhuak duh a, Pu Speaker, i phalnain; helai hi mizotawng paw’n ka let duh a. Tin, he bill hi mipuiin hmu se ka duh bawk. Pu Speaker,

an amend-na section 29(b) ah hian ‘local fruit beer,’ an ti a ni. ‘Local fruit beer means alcoholic beverage made by fermentation of fruit, stem or grain produced within Mizoram fermented naturally from itself or with yeast or other substances used for fermentation,’ a ti a ni hetah hian. Chumi a nih chuan, hetah hian fruit a tel, stem a tel, grain (buhfai ang chi) hi a tel. Chutiang ni si, engatinge fruit chauhah min kalpui? Grain hi engnge a nih? Buh a ni; yeast hi dawidim a ni a, dawidim hman phal a ni; hetah ‘other substances’ a la ti zui, a tawih theihna tur; zu-a a insiam theihna tur khan. Tunlaihah ‘bi-i’ te an ti, ka la hmu miah lo; bi-i te kharawn tawlh ta sela, a fermentate nan, a phal vek hetah hian. Chuvangin, ‘local fruit beer’ ti lo hian, pineapple an ti duh anih chuan ‘pineapple beer’ ti ve mai sela, ‘grape-wine’ kan tih ang hian, ‘pineapple-wine’ te pawh ti ve mai sela, kut-hnathawktute an hmangaih tak tak anih chuan.

Pu Speaker, helaiah hian ka sawi leh duh chu - a hluia awm miah lo chapter 5 (a) an rawn insert tawp a ni. Chapter 5 (a)-ah hian engnge a sawi uluk deuhin kan chhiar a ngai. Pu Speaker, hetah hian license te, permit te, price control leh accounts chungchang te a sawi a. Pu Speaker, i phalnain helai tawite hi chu ka’n chhiar leh teh ang - Pakhatnaah chuan, “The commissioner or competent authority duly authorised by the Government in this behalf may grant permit to dignitaries of foreign and domestic and tourists to allow them to bring liquor into Mizoram or purchase liquor from Excise & Narcotics during their stay in Mizoram” tih a ni. Pu Speaker, hei hi a move-tu khan a rawn sawi pial daih; pakhatmah a rawn sawi lang lo. Chuvangin, ‘Nghinglova’ ni nana na, ‘Nghinga’ tiin a rawn ko tlat a ni, he bill hi. Pu Speaker, kan Excise Department-ten an zuar dawn; ‘tourists’ tih definition hi en teh ang u. Vai-mistiri pawh an lo kala ‘tourist ka ni’ an tih chuan, an rawn keng lut thei tihna a ni dawn lawm ni? Keini pawh Lunglei ah kal ta ila, tourist ka ni dawn lawm ni? Ka bialah te va kalin darkar 24 va cheng ta ila, a definition kha enchiang teh ang u. Heng hi zu zawrhna te, zu in phalna te leh zu ken phalna te a ni lawm ni?

Pu Speaker, a dang sawi tur a tam viau, point tawi te tein kan sawi a ni. Mak ka ti; nichinah Bible chang ka sawi laiin in nui dur dur mai, engati nge Bible hi in nuih zat em ni? Pu Speaker, a duh tana chhiar theih turin heng Bible chang tlemte hi ka’n tarlang ve teh ang - Genesis 9:21, bung 19:31, II Samuela 13:23-29, Deuteronomy 21:20, Leviticus 10:9, Thufingte 23:20&21, bung 29:29-35, Ephesi 5:18, Rom 13:13, Hosea 4:11, Isaia 28:1 atang te khan lo chhiar ve teh u, hei hi kan dawn vek kha. Pu Speaker, kei chuan ka hmuh vena - Bible en te, kan kohhran hruaitute leh NGO ngaihndan te, min sponsor-tu kan party ngaihndan te atang chuan, he bill hi pass ka remti lo a ni. Pu Speaker, ka lawm e.

**SPEAKER** : Tunah chuan, Pu Lalramliana Papua ilo sawm ang.

**PU LALRAMLIANA PAPUIA:** Pu Speaker, ka lawm e. Wawiina kan bill sawi hi sawi a manhla hle mai a, a tu lam lam atang pawhin. Tun term-ah he House zahawm takah member niin ka’n thu ve a, member lo ni hlui tawhte in chezia te, in nihphung te, kan hotu-hmasate kan thlir lo thei lo che u a. Kan sawi angin, bill ka luhkhung hmaa ka sawi duh chu - member senior inti zawk tawhte pawh House-a entawntlak loh deuha kan khawsak chang te pawh a awm em aw, ka ti a. Hemi kawngah hian he House zahawm lehzuul nan hian kan tawngkam hman te, mimal taka kan intih duh dan te pawh hi kan fimkhur lehzuul a tha mang e, ka ti a. Member senior tak tak tawhte hi chuan an ching lo zawk a, la senior vak lo, inti-senior ve si, lo tling nawn vawikhatna tih bawr velah hian kan ching deuhin ka hria a. Zahawm lehzuul zawka he House kan vawn theih nan, savawm kah hliam tawh hnuin a kap

hliamtu a bei zui ta ngar ngar ang deuh hleka, din chhuah phat atanga kan inbitum ngar ngar te hi a fuh lo ka ti a. Hemi kawngah hian member senior zawkte keini naupang leh junior zawkten kan entawn theih tur hian he House-ah hian min kalpui thei hram hram zel ula kan duh hle mai tih hi, kei junior represent-in kan sawi ve hmasa lawk a ni e.

Vawiina kan sawiho ‘The Mizoram Liquor (Prohibition) Amendment Bill, 2025’ hi kan ngaihthlak ang khan, lo rawt thar pawh a ni lo a, dan awmsa tih danglam hlekna tur a ni a. Hemi chungchangah hian kan Minister hian ngaihtuahna fim tak a seng a, kan dinhmun leh nihphung, sukthlek zawng zawng ngaihtuah tel chungin zan tam tak ngaihtuahna a sen hnuah, chunglam pawh rawnin he bill hi a rawn pulut niin ka ngai a. Khawvel thilah leh rinna kawngah pawh mi pangngai leh vantlang chungka ka ngaih kan Minister hian kohhran leh khawtlang tana pawh tur hi, tu nawrhluhna vang mah hian House-ah bill a rawn putlulh ka ring lo a. A bill copy kan dawn te ngun takin ka’n chhiar a, ka rin hi a dikin ka hria a. Ka zir phak tawh atanga ka hmuh danin, he dan famkim lo lai tam tak te thuam famkimin, vantlangin kan tawrh theihna tur thilte khauh leh khirh lehzuala inthununna dan kan hmu thar nual reng a ni.

Tuna kan sawiho ah pawh hian, i veilam amite’n i dinglama mite zu zawrh tir an tum niin ka hria. Dinglama mite hian zu zawrh duh lovin, a khapna tih khauh lehzual tumin an bei bawh a. Duh dan inang kha, sawi dan inanglovin kan inbei mai mai niin ka hria a, airport case hmanna private resolution kan sawi ang deuh kha niin ka hria. Resolution lo puluttuin sorkarin airport hralh tum angin a rawn charge a, sorkar lamin hralh kha an lo duh reng reng bawh si lo a. A hralh lam ni lovin, an tum dan kha a lo danglam daih. Khatiang deuh khan, tuna kan sawiho pawh hi zu zawrh tum reng reng lo, khuahkhirhna khauh lehzual siam tumtu kha zu zawrh tuma ngin leh lampangin a charge tlat a, duh lo inang kha inhnial lek lekin kan kal ta mai ni te pawhin ka hria a. Kan Session lo ngaithla mek zoram-mipuite pawh hian thil hi an hrethiam lo ang tih ka hlau a.

Kan duhna tak zawk chu - Zu khuakhirha, zu khuahkhirhna dan khauh lehzual zawka siam hi a ni. Chu chu kan duh dan a ni a, he bill pawhin a tum a ni tih hi ngun taka a bill zuk zir chianga, a dan te te zuk keu chhuaka, sawiho tum mang si lo, a kawm keu mang loa ‘a chhungah zu zawrhna dan a awm e’ tia in sawi thaih ringawt hi thil fello a niin ka hria. Hemi kawngah hian zoram-mipui pawhin ngun taka bill pawh hi min chhuizui sak a tha hlein ka hria a ni. A khauh zawka zu khuahkhirhna dan sawi tur na na na, a lungchhiatthlak ti tlat zawk si kha chu; a lungchhiatthlak ka ti hle a. ‘A lungchhiatthlak’ tih kha he bill sawi tura kan tawngkau chheh kha a ni ve deuhin ka hria. Zu khuahkhirhna dan kan sawi dawna lungchhe tlat kan nih kha chuan a dik bik lovang. Wine ngaimawh hle sia a siam phalsakna dan kan lo siam bawh si kha chuan, kan ngaimawh dan pawh kha a chang hi chuan ka ngaihtuah thin a, kan sawiho lai te pawh khan, chungleng leh hnuaileng indo laia bak dinhmun mai te kha kan chan a ni em aw, ka ti a ni. Chungleng an chak tumin, ‘chungleng ka ni e; hei, kei chu thla ka nei’ a ti a, hnuaileng an chak tumin, ‘kei chu hnuaileng ka ni e, ha te pawh ka nei’ a ti a, kan rilru ngaihtuahna te leh he Prohibition Act leh Bill chungchanga kan ngaihtuahna te pawh hi, chungleng chak tumin kan ngaihdan a dang a, hnuaileng chak tumin kan ngaihdan a dang leh mai mai a ni lo maw? Chuvang chuan, uluk takin kan ram tana tha tur leh ‘he Bill hian engnge a tum tak tak zawk’ tih ngaihtuahin. Bill hi hnam thenkhatah chuan an moral issue a ni a, hnam thenkhatah chuan an political issue a ni a, an religious issue te pawh a ni ang a. Keini hian politics khelh nan kan hmang niin ka hria; hei hi tha ka ti lo. Politics-ah advantage lak nan hman kan tum a,

mipui nawlpui thil zir Chiang lo leh ngaihdan Siam thiam lo, politician-te tawngkama inngat deuh ho hi, tute emaw zat ‘an ngaihdan kan hneh theih takin’ tiin, kan rilru puthmang nilo deuh te pawh hi auchhuahpui kan ching ve niin ka hria a, heng te pawh hi a thalo ka ti. Mimal anga kan ngaihdan kan sawiin a dang, a pawl anga kan ngaihdan kha a lo ni leh lo a. Heng mai mai ah pawh hian Mizo te kan rilru put hmang hi kan inenlet a tul hlein ka hria a ni.

He Dan hi kan en chuan, kawng tam takah khapna - dry day puan dan mumal tak kan dan hmasaa langlo te pawh hemi chungchangah hian ziahlan a lo ni ta a. Tin, kan ngaihlthlakah khan, dan bawhchhiate chawitir chungchangah te pawh a hma chuan ‘a tam thei ang berah kum 5 lungin tan tir leh cheng nuai 1 chawitir theih a ni ang’, tih ringawtin a inziak a, a hremna nep lam a inziah si loh avang khan, chawhma chauh tantir pawh kha danah khan a leng vek a ni. Mahse, tun Dan tharah hi chuan a dana hremna nep theihna ber kha ziahlan a nih miau avangin, nep lutuka inhrem theih loh in he dan hian ruahmanna a Siam ta hi a famkim ta hlein ka hria a. Chutiang kawngah te pawh chuan a famkimna tam tak he danah hian kan hmu a.

Tin, thenkhatin kan ngaimawh Chapter 5(a) lo awm te kha he Dan ti changtlungtu leh he dan-in a mamawh em em a ni a. Hemi hnuaiah hian ka chhuan ber - kut-hnathawktute tana hamthatna awm thei chi hrang hrangte pawh zeh tel a ni a. Tin, thenkhatin kan sawinaa kan ngaimawh nia lang - foreign and domestic tourist, dignitaries leh tourist te tana special permit chungchang pawh tarlan a ni a. Khami chungchangah khan sawi belh ve hlek ka duh chu, mipui a hrethiam lote hi a hlulang zawng hian hrilh kan tum thin niin ka hria a, hei hi a thalo ka ti hle a. Vai-mistiri te foreign tourist leh domestic tourist anga an luh han hlauh tlat mai te kha thil diklo a ni. An ID hmangin permit kan pe dawn a ni a. Vai-mistiri kha tourist permit kan hotute hian an pe dawn lo tih hi hriat mai tur a ni a, dignitaries permit pawh kan hotute hian an pe dawn lo hrim hrim mai a. Khangah te pawh khan, ni awm taka lang siin, a lo ngaithla tute tibuai tawk leka thu sawi hi a awm ang tih ka hlau a.

Chuvang chuan, he Dan-ina fimkhur taka min kalpui a tum dan hi hlauthawng lovin, he Dan puluttu kan Minister pawh a ti der te pawhin kan ti der a ni ang, a ti der lo tute pawhin fakawm kan ti; rinna kawngah leh mihring mihrinnaah pawh hian. Chuvang chuan, ring ngam ila, mipuiin he dan kan mamawh tawh zia hi a langin ka hria a. Tin, a hrefiah lo leh Chiang lo te lakah a kawm pawnlam atanga zu zuar tur anga insawi tlat tumna hi awm lo sela; he khapna Dan hi fiah taka chik tirin, zirtir i tum zawk teh ang u.

Tuna kan dinhmunah hi chuan a buaithlak ka ti a, tuna dan kan neih lai, la amend loh, Dan chhunga a rin luh loh thilte pawh, politics tawngkam taka thenkhatin, ‘kan mit kan siai khum’ an tih ang, dan chhunga awm silo danin a khap tho si tual leng em em thilte pawh kan hmu leh lawi a, hengte pawh hi a tha lo ka ti. Mitdel inbihruksiak ang deuhin, lang kukin an biru a, an inhmulo der mai mai a. Tuna kan duh loh leh thalo kan tih em em te hi kan ngaimawh lem loh leh langsar taka kan hmuh theih an ni lawi si a, hmu duh lova kan enliam mai maite an ni tlat si a ni. Chung chu he Dan tharin theituaia Siam phal chin awma a ngaih hnuaiah thununa regulate a tum a ni. Hei hi khawtlanga rilru pangngai pu chin chuan a Dan hi ngun takin chhiar sela; kan Minister-in nichina he dan a rawn move tan tirha a thusawi zawng zawngte pawh kha, tuna youtube atanga lo en mek mipuite pawh khan han ngaithla let leh ula, fiah fel takin he dan thatna leh kan mamawh dan te Chiang takin hmuh theihin a awm a ni.

Vawiinah hian Pu Speaker, kan ramah hian kan duh loh thil nia kan ngaih min chenchilh tlattu hi eng emaw chen chu a awm dawn; ruk ruk pawh a tawp thei lova, sex hmansual pawh a reh tak tak theilo a nih hi. Amaherawchu, keini ho hi chu fihlim i tum teh ang u, ringtu kan nihna ang zawn atang pawhin. Eden huana thei rah ei thiango ang te pawh hi lakbo sak kan ni ngai dawn lo. Kan tih loh tur thilte hi chu kan ban phak maiah a awm anih pawhin, keini ringtu leh Pathian fate hi chu kan inthiarfihlim zel tur a ni. Kan bula awma, chung laka inthiarfihlim zel tur pawh chuan min duh pawh a ni mahna. Sual hian tun thleng pawhin kan banphak maiah tam tak a awm a, chung laka kan inthiarfihlim zel pawh a tul tak meuh a ni.

Tichuan, he kan Dan amendment “The Mizoram Liquor (Prohibition) Amendment Bill, 2025” kan Minister-in a rawn putlul hi pass-pui ngei turin ka thlawp thu ka rawn sawi a ni e. Ka lawm e.

**SPEAKER** : Tunah chuan, kan Member zahawm tak Pu RM Chakma ilo sawm ang.

**PU RASIK MOHAN CHAKMA:** Pu Speaker, vawiina “The Mizoram Liquor (Prohibition) Amendment Bill, 2025” Zu-zawrh theihna Dan dik tak kan sawiho hi a vanduaithlak ka ti. Wine leh beer te hi ‘zu’ a ngah ngai lo ila chuan, he bill hming put dan hi a dang daih ang. The Mizoram Beer and Wine and Marketing Regulation emaw a ni daih ang. Mahse, a hmingah pawh “The Mizoram Liquor (Prohibition) Amendment Bill, 2025” tih a ni ta a ni. Chuvangin, hei hi zu-zawrh theihna prohibition thlah dulna tur Dan dik tak a ni.

Tin, Pu Speaker, tuna kan sorkar hrawn meka vanduai thlak ka tih chu - Hyprocracy hi a tam lutuk mah mah em aw, ka ti. Mahni nihna dik tak lantir lova, pawnlama lan thatna tum hi; kha kha unparliamentary term a ni em lo ang a, anih palh chuan ngaihdam dil chungin ka sawi a ni e. A chhan chu, beer leh wine hi ‘zu’ a ni lo kan ti a, khatah ringawt pawh khan lemchan tumna hi a lang a ni.

Tin, Pu Speaker, kut-hnathawktute chu kan khawngaih vek, Mizoram economy tih hmasawn kan duh theuh. Mahse, mak deuh chu, kan rilru diktak hi lang chhuak lo a ni. I dinglama thute hian ‘zu’ hi an ngaisang; lar se an duh. A in atan mai ni lo, a siamchhuah thleng an duh. An rilrua a lang Chiang hle a, corruption thlengin an ngaihtuah ang tih a hlauhawm a ni. Kut-hnathawktute din khawchhuahna tur hian hei lo hi kawng dang tamtak a awma lawm. Food processing lam te ti ta zawk ila, centrally-sponsored scheme lamah te hian tanpuina pawh a tam zawk daih. Hetianga zu siam ngawt ai chuan, khatiang lam hawi khan kalpui ang hmiang. Hei hi chu kut-hnathawktute kan khawngaih vang ni loviin, tihderna mai maiah ka ngai a ni. Thil tha ni sela chuan saw lamah an ti ve nang. Kan hnam mipuite hian chhiatna tawk sela, kan moral chawpin khawlo vek se an duh vang a ni mai lo maw ka ti a ni. A pawl lutuk.

Chuvangin, khawngaih takin mipuite hmangaihtu kan inti a nih chuan, beer leh wine siam lam ni lovin, fruits processing lam - fruit juice te, slice te, dry fruits leh a powder te pawhin a siam theih a, global market pawh a tha zawk a. Helai beer leh wine lo siam te chu; pawn lama an siam a changkang zawk daih. Chuvangin, fruits processting lamah kal zawk ila, a market pawh a zau zawk a, hralh pawh a awlsam zawk dawn a ni.

Chuvangin, a thupna kha sawitlang law law sela; hypocrisy awm lo sela. Tun hmaah khan sorkar pawhin a hralh thin alawm; ‘zuar law law ang, huaisen takin’ an ti a, an zuar mai a ni. A thenin, ‘kan duh lo, total prohibition kan ti ang’ an ti a, totally in an prohibit mai a ni. Chutiang ni lovin, zu zuar duh si, duh lo anga lan phet tum hi a pawl lutuk a ni; morally very wrong a ni ringawt; kan ngaihtuahna pawh a sual lamah a kal mah mah a ni. Pu Speaker, chuvangin, kan mipuite hruai kan duhnaah chuan hruai law law ang u. Lem chang lovin huaisen takin ti law law ila, mipui thlantlinte hian kawng engkimah keimahni hi min entawn si a. Kan behaviour hian kan society ah hian thil dik lo tam tak a tuh thei a, a pawl lutuk. Chuvangin, he bill hi pawm tlak a ni lo.

A hma lama memberte khan an sawi a, hei hi zu zawrhna tur Dan a ni tih a chiang lutuk chung hian, ‘kan zuar dawn lo’ an ti hi a mak ka ti a ni. Chawp leh chilhin thudik lo tak an sawi duh mai kha a mak a ni. Mizoram mipuiin live in kan thlir thup chung pawhin chawp leh chilhin thudik tak ni lo an sawi ngam kha a khawngaihthlak ka ti. Chuvangin, ‘he bill hi i pass lo hram ang u’ tih hi ka ngaihdan a ni e. Ka lawm e.

**SPEAKER** : Tunah, Minister zahawm tak Prof. Lalnilawma ilo sawm ang.

**PROF. LALNILAWMA, MINISTER:** Pu Speaker, ka lawm e. Vawiina kan Bill sawiho ah hian memberte kan tui tlang hlawm niin a lang a, kan budget-a sawihona tur pawh awm lek lovin kan han khel chho zel chu a ni a. Thusawi te a ngaihnaawmin, bengvarthlak tak tak a awm a. Vawiin chu kan tang hlawm a ni ang e, ‘i veilama thute’ tih leh ‘i dinglama thute’ tih pawh kan sawi pawh nuai a, kan buai ve deuh te pawh a ni ang e. Kan rui deuh te pawh a ni mahna.

‘Zu’ leh ‘Wine’ hrihfhiah talh kan han tum a, han inhnial dawn chuan a tawp theiin ka ring lo a. A then pheichuan, ‘Zu chu thil a ni’ an ti a, kan pawm mai; a thenin, ‘Wine chu ‘Wine’ a ni’ an ti a, kan pawm mai. ‘Wine-shop ah Zu lo an zuar hlei nem’ te kan ti a, a lehlam zawnga thlir chuan a dik ve thei tho. Chutih rualin, Wine phalna Dan 2008 leh 2022 khan tute nge pe? Kha kha, ‘Zu-zawrh phalna’ a ni em, tih kha ka rilru-a zawhna chu a ni a.

Thusawitu hmasate khan vawiina kan bill rawn puluttu Minister hi ‘kan bialah chuan a tla na tawh lo khawp ang’ tia sawi te pawh kha an awm a; a tawngkam chiah kha chu ka sawi dik lo mai thei a. Amaherawhchu, an veng leh kan veng a dang a nih ka ring deuh a, a bial chhungah kan awm ve ve a. Kan veng lamah chuan inthlan lehah pawh a la tling zar zar dawn ni hian ka hmu a. Pu Speaker, kan boruak han thlir hian, i vei lama thute hian word-play game an rawn play mai mai ni hian ka hria. ‘Lemchan; a phenah chutiang khatiing an zep a’ an ti a; ‘a phen’ a awm lo reng reng vawinah hian. A bill copy hi kan nei a, a leak-out hial kan tih kha. Hei hi ‘a phen’ a ni lo tih kha han tarlan leh hram ka duh a.

Pu Speaker, kohhran ang zawng chuan he bill hi sawi ve awm pawh ka ni lo a. Amaherawhchu, Horticulture Department changtu Minister ka nihna zawnah ‘he bill hi a ngai takzet a ni’ tiin ka rawn dinpui a ni a. Kan kut-hnathawktute nawrna avangin he bill hi kan Minister-in vawinah hian huai takin a rawn move a ni.

Kan production chungchang kha a bill rawn puluttu kan Minister khan a rawn sawi a, horticulture crop production hrang hrang kha a rawn tarlang tawh a. Chutah chuan, kan

thar tam ve viau tawha kan inngaih lai hian, kan la intodelh lo a ni. Tunah hian horticulture ang zawng pawhin area expansion kan ti a, chin belh zel kan tum a ni. Chutih rualin, kan thlaite hi seasonal a nih avangin, a season laia kan thar teuh khan a tawih-chhia a, kan loss a tam thei hle a ni. Kum thum kal ta vel khan dragon-fruits ringawt pawh Serchhip atangin kan nauvin a rawn thawn pheii a, an lakna kha 160/- an ti a. Aizawl a thleng a, a rihna a tlahniam a, ‘a rate in tlawm leh thei deuh em; 10/- in min tlawm rawh u an ti’ a an ti a; ‘chutiang chu a va dik awm lo ve’ ka ti a, keimahin ka test ve ngat a ni. Dragon fruits lo thleng kha tlaitin a rawn thlen ni ah ka buk a, a tukah ka buk leh a, a tuk lehah pawh ka buk a. Ni 3-4 vel khatia ka buk khan, a rihna a lo tlahniam tak tak a. Tiang deuh khan, kan thlaite hi kan dah mai mai pawh hian a chhe zel a; a rate a tlahniam zel a ni, tih lai kha sawilang hram ka duh a.

Chutah chuan, NABCONS, NABARD Consultancy & Services Limited hian India ram puma post-harvest loss, kan thlaitharte kan thar ni atanga kan hralh thleng, a ni tela kan loss hi chhinchhiaha a awm a. Pu Speaker, i phalnain NABCONS Study, 2022 data hi han present lawk ka duh a. Fruits (Thei), 6.02% - 15.05% loss; Kan thlaithar tawihral avanga loss - 15%; Vegetables (Thlai), 4.87% - 11.61% loss; Plantation Crops & Spices, 1.29% - 7.33% loss a awm a ni. Chutianga loss tam tak a awm lai chuan, keini a horticulture lampang kan mangang chho viau a ni. Horticulture Department ka chan hlim atang khan, ‘Wine Rules te hi nei ila aw’ ka ti a. Pu Speaker, Wine hi ka in pawh a ni chuang lo. Amaherawh chu, Wine Rules kan neih hi kan amend-a, thlai tam zawk kan cover hi a pawimawh zia hetah hian a lang chiang reng a ni.

Member thenkhat te khan ‘food processing ah hian kal tam deuh ila a tha lawm ni’ an ti a, Wine bak baka food-processing a awm em ni? Hengah hian processing chu kan kalpui reng ang. Amaherawhchu, wine bikah chuan a man hi a sang talh a ni. International Agri & Horti Expo Delhi-ah kan grapes wine kan keng thla a, a ni hmasa berah wine lei duhte khan kan dawr an rawn hual laih laih mai a. Amaherawhchu, a tawp thleng kan tih loh chuan a ral mai ang a, a tawpni a hralh ang u, kan ti a. A tawpni a rawn thleng a, wavi leh khatah a ral vek mai a ni. Khatiang kha a ni.

Khatah pheii kha chuan, ‘Aw..., an ministry hmasa te kha an lo van lo ti tha em; kan grape chingtute tana market tha deuh an lo zawn sak hi a va tha em’ ka ti a ni. Amarawhchu, Pu Speaker, a lehlam zawnga an tang leh tlat hi; kha baka lemchanna a awm zawk em ni, tih ka zawt a ni. Kan kut-hnathawktute tan hian, ‘hawh u i pen ho ang u’ tiin kan insawm a ni. Tuna kan grape-wine chauh ni lo, thei hrang hrang leh kan thlaitharte atang hian wine siam ila, a man man zawka kan hralh theih chuan, kan kut-hnathawktute ta tho a ni; kut-hnathawktute chauh pawh a nilo, kan entrepreneur-ten winery te an siam ang a, quality the deuhin; tichuan, kan hralhchhuak mai dawn hi a lo ni a.

Tichuan, thlai grading kan kalpui ang kan ti a, tute nge rawn sawisel mipuiin an hria, Pu Speaker; a grading-a kan kalpui loh a pawizia ka hmu chho mek a ni. Amaherawhchu, tunah chuan grading te pawhin kan kal ang a. A thlai a thar tha-tha, a hmelmawia kha fresh-in kan zuar ang a, a hmelmawi lo (hmelhem) deuh a lo awm a nih pawhin, kha kha wine atan kan process mai dawn a lawm.

Tichuan, hetah kan Act, tuna bill kan sawiho meka hi Pu Speaker, hemi kan neih chuan quality-control a awm nghal dawn a. Kan department chanpual a ni bawka a, tunah hian

SARAS Fair-ah te pawh khan tam takin kan self-help group member-te pawhin an rawn siam a, an tharchhuahte kha an rawn pho chhuak a. Hengah te pawh hian quality regulate a awm miah lo; kan zep lo. Squash an rawn siam te kan han in khan ka khuh deuh khek khek a, KMS an telh hnem lutuk nge, a preservative a tam lutuk zawk, tih te a awm a. Chutiang chuan, a quality hi kan control ngei ngei a ngai a ni.

Tichuan, kan wine-te hi quality taka kan tih chuan state dangah te pawh kan thawnchhuak thei dawn a lawm. Hmanni Reliance nena MoU kan sign tum khan an stall min fanpui a, Reliance Fresh-ah khan wine stall min fanpui a. Ram hrang hrang leh state hrang hranga wine an lakkhawm kha min entir a ni. Chutah chuan, wine bottle pakhat kha a man a to fal bik riau a, Europe atanga an lak luh a ni a. Engzat man nge ka ti a, cheng 305,000/- an ti a, bottle 1 kha. Khatiang quality em kha chu kan pha lo a nih pawhin, Mizoram-a kan thei leh thlaitharte atanga wine kan process thei ngat anih chuan, a market hi a tha dawnin ka hria. ‘Wine kan siam dawn; grapes kan nei sa a; a dangah kan zauh dawn’ kan tih rual hian, kan state chhunga zawrh tur chauh kan aim anih chuan a fuh chuang lo, Pu Speaker. Kan zuar tho ang a; kan aim ber tur chu a state pawn te pawh a ni dawn lawm ni?

Entirman - kan thenawm state-a tu ber emaw nen, eng state ber emaw nen pawh agreement sign ta ila, phalna min pek chuan, kan wine zawng zawng hi an state ah pawh kan supply seng dawn lo ni hian ka zu hmu a. Chutiang chuan, wine hi tha deuha kan tih chuan, Reliance Smart Stall-ah khan (kan sawhthing hmanna kan chai laih laiha kha) ‘mizo-ginger’ tih kha a intar kuau mai a, rin aiin rilru a hneh a ni. ‘Mizo-wine’ tih han awm phei se chuan rilru a nuam leh zual dawn a. Mizoram hian brand kan siam a ngai a ni. Ginger-ah brand kan siam ang a, wine-ah brand kan siam ang a; khang Mizoram thlaitharte kha a brand tha deuh nen kan thawnchhuak thei dawn a ni.

Chutih rualin Pu Speaker, hei message ka dawng a, (i phalnain) – ‘Thlai chingtute chauh in ti a, buh chingtute pawh kan awm ve tho alawm. Buh pawh hi telh ula’ tih te pawh hi a awm a ni. Amaherawhchu, tun tumah chuan kan Minister a changtuin a rawn sawi ang khan, a buh lampang thil kha chu tunah hian a la tel thei dawn lova, remchang dang kan nghah te pawh a ngai ang a. Ni e; ka hmaa thusawitu khan, ‘morally, very wrong’ a tih kha, a sawitu te zawk kha an-morally wrong zawk em aw ka ti deuh a. Kut-hnathawktute tana hamthatna tur kan zawn kha ‘engnge morally wrong a nih theihna’ tih kha ka zawhna a ni. Pu Speaker, hun a ral chak hle mai. Engpawh ni se, ka duhtawk ang a.

A tawp atan chuan, ‘A in duh paw’n, in duhlo paw’n he bill hi i thlawp tlat teh ang u’ tih hi Pu Speaker, ka rawn din chhan a ni a. Kan Minister pawhin huai takin kan inhmukhawmnaah pawh a sawi a, “He bill-ah hian mipui lung ka ti awi lova tawrh ngai a nih chuan, keimahin a mawh ka phur ang” a ti; chuti khawpa ding ngam chu a ni. Chuvang chuan, he Bill ‘The Mizoram Liquor (Prohibition) Amendment Bill, 2025’ hi, hawh u, kan in duh emaw, in duh lo emaw, i thlawp vek ang u. Ka lawm e.

**SPEAKER** : Awle, member pahnih vel atangin kan la leh ang a. Hei, dar 3 a lo pel ta a, budget discussion kan la nei a. Pu H. Lalzirliana leh Lt. Col. Lalhmingthanga hnen atangin kan la leh ang a. Tichuan, Opp. Leader kan sawm ang.

**PU LALCHHANDAMA RALTE, OPP. LEADER:** Pu Speaker, vawiina kan sawiho hi ram hnuk khawih tak tak a ni a; general discussion kha chu duh leh zanah pawh kan ti mai

ang chu maw le. Hei, kan member te hi an la phar deuh sap sap a, la sawi an tum dawn chauh si a. Fan deuh thei ila tha lo maw?

**SPEAKER** : Enge kan ngaihdan le? Aw, kan House Leader.

**PU LALDUHOMA, CHIEF MINISTER:** Aw, hei hi membrete'n kan ngai pawimawh zawk anih chuan a pawina a awm hran hlei nem. Amaherawhchu, budget discussion kha a ei-hek dawn a ni mai a.

**SPEAKER** : Awle. A nih chuan, sawi leh turin Er. H. Lalzirliana ilo sawm ang.

**PU H. LALZIRLIANA:** Pu Speaker, vawiin kan bill hi sawi chakawm vak lo, sawi loh theih si loh, Barh-luih Bill kan han sawiho a ni a. He House zahawm taka rawn puluttu kan Minister zahawm tak tan pawh a thiltih chak loh tak, a hnial hleih theih si loh put-luh ngai si a rawn pharh niin ka hria a, tlanchhe chung a bill putlulh te pawh ang deuhin a lang a. Hei, ka hmaah hian literature pathum - 'The Mizoram Liquor Prohibition Act, 2019' leh 'The Liquor Prohibition Rules, 2020-2022' inkawp leh Assembly Bill No. 20 – 'The Mizoram Liquor Prohibition (Amendment) Bill, 2025' leh Bill No. 26 – 'The Mizoram Liquor Prohibition (Amendment) Bill, 2025' tihte a awm a. Hei hi kan sawiho hnuah hian, 'kehme' kan tih hi a lo inang lo a ni lo maw, ding lam leh vei lam hi, tih mai tur angin a lang a.

Tin, a bill chhunga thu ah pawh hian han sawi uar duh lai, han stress nat duh lai leh duh loh lai deuh lai te pawh awm niin a hriat a, zoram-mipuite hi kan play lutuk deuh em aw, tih te rilru ah a awm a ni. Kei ka duh dan chuan, kalphung-thar style-in ri thak law lawin kal ila a that ka ring a.

Tuna kan amend tur Bill No. 20 kha kan inchhiar fe tawh hnu zan dar 9 hma kan bill sawi dawnah a rawn thleng leh chauh a. Chutiang chuan siam that ngai a lo awm nual hmel a. Chuta tih tel loh tam tak a awm ta chu 'non-distilled country liquor' tih kha delete vek a ni a. Tin, he bill tharah hian terms leh words thar a tam khawp mai a. He bill hi amendment ni lo hian nidanga bill, MYC Bill kan han pass ang tho khan bill thar ang hlakin kal ta se, 'liquor' tih tel lo hian wine leh beer bill ang te hian rawn kal hlawk sela a sawi a nuam zawk ang em tih ka ngaihtuah a ni.

Heng - distributor, fortification, license fee, local fruits beer, non-distilled, alcoholic, liquor, possession, producer, stock point, wine, winery tih te hi a hmaa definition kan hmuh tam taka la tel lo, telh thar anni a. Chuvang chuan, thil thar tam tak a lo awm bawh leh chapter thar hlawk hlawk han belh te a awm avang hian, bil thar hlak ang hian rawn chhuak ta sela duhthusam a va han ni zawk awm ve aw, tih te rilruah ka nei a ni.

A bill hi han keu neuh neuhin han chhiar Chiang tulh tulh ila, a thil tum leh a suk thlek hi a Chiang tulh tulh mai a. Kan sawi ang khan, a 'motive behind the Bill' hi a fiah viau a ni. Tuna kan sawi bill ah hian chapter 4, section 4 (a) leh (b) hi a rawn dah a. Section 4 (a)-ah hian 'dry day' tih a ni a. Zu-khuahkhirhna awm lo ah chuan dry-day puan a ngai dawn em ni, tih hi rilruah a awm a. Tin, 'departmental store' tih 4 (b)-ah a rawn dah a, "The government established a departmental store" tih, 'Sorkarin departmental store a siam ang a, chuta tang chuan hemi hnuai permit holder te hi a supply thin dawn a ni' a ti a ni. Hei hi clause thar insert a ni a, hmun hrang hrangah hian a awm nual bawh a.

Tin, chapter 5 (a) hi athar hlak a ni a, hetah hian ‘red card’ tih te, permit leh license pek dan tur te kha a awm a ni. Chuvang chuan, food processing kha nichin kha a-tui zawng te khan kan sawi a, a then chuan a-seha seh zawng tea sawi a nih ka han ring a. Ka chhunga lut, a then chu a chawma chawm chi te pawh anih ka ring a, ‘food processing’ tih khan a tui zawnga tih te pawh a ni ang a. Kha kha chu eng pawh nise, a-thiala thial ngai te pawh a ni ang chu.

Hei ‘zu’ hi, sawi angin kan Sorkar thar hian kalphung-thar a nihna ang hian, a-black and white hian han ti pawp ngam sela a tha zawk awm mang e, a terms leh literature-a inhnial buai inhnial buai lo hian; chu chuan ti-ti a titam a. Dan thar hlak te hi rawn introduce zawk law law sela, tih kha ka han support deuh a ni.

Tin, section 32(a) leh (b) hi a thar hlak a ni bawk a. A pawimawh lai ber chu, chapter 5 (a) rawn insert a hi a ni a. Chutah chuan he chapter hi a chahbi lai tak pawh niin a lang a. License dil dan leh pek dan, permit dil dan leh issue dan, price control, sum leh pai accounts vawn dan, registration leh labelling chungchangah, ‘Liquor is injurious to health’ tih te, ‘maximum retail price’ tih te, ‘Not for sale in Mizoram’ tih te, ‘sacramental wine’ tih te tar tur a ti a ni. Tin, whole sale leh retail price fix dan tur te, local fruits beer siam dan tur te, hralh leh supply dilna leh license issue dan te, zu leina ‘red card’ issue dan chungchang te a rawn tel bawk a ni. Kan sawi ang khan, tourist te, domestic tourist leh foreigners te tana special permit pek dan te a nib awk a. Pu Speaker, he bill hian thatna leh that lohna te tam tak a neih ka ring a, chutah chuan a famkim tawh lohna pawh a awm ang.

Tin, mipui mar han deh chungchangah pawh, ‘zu thalo kan in a, zu tha hi in ve ila, kan thalaite leh a zu in mi tan pawh a tha ang a’ tih te. Tin, eng ang pawhin khuahkhirh ila, kan khuah khirh rem dawn tak tak chuang lova. Hei, Mizote hi zu in thiam lo mi tak kan ni a, a free deuh helh hawl ah pheih chuan in thiam lo tak kan ni. State danga kan han chhuah thlak te hian force te, kan officials thenkhat te pawh, (tute nge chu kan hre lova) zu a zalenna hmuna kan kal hi chuan insum harsa kan ti tlang a. Kan IR police te pawh Mongol dai, Assam Guwahati vela kan awmlai te pawhin, Guwahati lama an rawn refer tam tak hi chu, zu tlan sual an ni duh khawp mai a. A tam a, a free hulh hian kan hmang thiam lo tlangpui a. Hetia control-na hnuaia an awm hi a la tawh viau ang te pawhin a lang a.

Enga pawh ni sela, vawiina ka rawn din chhuahna chhan ber chu, Pu Speaker - ri thek thawkin zu zawrhna phal kan duh chuan ti ila. Chutiang chuan wine leh beer pawh hi a hranpa rules, act, bill kan siam duh a nih pawhin, ti law law ta ila a fuh ber lo ang maw, tih te ka rilruah awm a. Chuvang chuan, tuna kan bill hi chu a dazy deuh a, lehlam lehlam tana interpret theih dan kawng a awm zau riau mai a. Chuvangin, a ngai ang anga han pawm hi chu ka thlawp ve lo a ni e. Pu Speaker, ka lawm e.

**SPEAKER** : A lawmawm e. Tunah chuan member zahawm tak, Dr. Vanlalhlana ilo sawm ang.

**DR. VANLALTHLANA, MINISTER:** Pu Speaker, i vei lama thute hian zu an rawn sawi nasa khawp mai a, ‘wine hi zu a ni’ an rawn ti ngat ngat bawk a. Wine hi ‘zu’ a lo ni ngai a nih chuan, “The Mizoram Excise & Narcotics Wine Rule, 2008” hmangin 2007 chho atang khan zu an lo zuar daih tawh a; an flagship programme NEP hmang khan zu an lo zuar tawh a. Engatinge heti lampanga an awm lai a an sawi loh aw, tih kha ka rilru a

lo lang a ni a. Pu Speaker, term hmasa an sorkar lai khan G20 meeting Mizoram-ah khan kan thleng ve hlauh mai a, MZU-ah neih a ni a. Khatih lai khan khawiah nge an awm zawh aw, ka ti a. Kan member hmasate an awm a; zupui chhawp a ni a, a duh duh tan in theih tura chhawp chhuah a ni. Heti khawpa zu haw si, 'zu' tih ringawt pawh, a hmaa wine an lo tih chhuah tawh pawh zua chan tir leh, ka chauha zu hawtu an ni em aw, tih ka rilruah a awm a. Khatih lai khan khawiah nge an awm, engahnge an sawi chhuak ngam lova kil khatah an lo awm mai, an sorkar lai khan? SARAS Fair a awm a, Anthurium Festival a awm a, chi hrang hrangah khati khawpa zufang, zupui leh thil dangte pawh chhawp chhuah a nih lai khan khawiah nge an awm tak? Bible-te an lo la chhiar tlem deuh nge ni, hetia opposition-a an awm tawh hnu hian Habaka te kha kan nei chho ta a.

Zu hi sawi dan chi hrang hrang a awm a, FSSAI hi chuan wine hi food category-ah a rawn dah tawh a, ka tan hi chuan sawi hi a hreawm khawp mai a. Keini chhungkuaah hian damdawi-ina dah ngai reng hi kan nei ve a, chu chu a tuartute zinga awm ka ni a. Kolkata ka zir ve lai 1998-1999 chho khan chhungte damlo buaipui reng rengin Kolkata damdawi-in ah zu vanga chhungte buaipuiin ka kal kual thin a. Zu hian mi a tihchhiat zia te, mi chhungkua a tihbuai zia te hi a taka hmutu ka ni a, a hreawm khawp mai a.

Mizoram Liquor Prohibition Bill, 2019 pawh kha a tha ti tute zinga mi ka ni a, ka thusawite kan en let leh a. Khami chungchangah khan inchhirna pawh ka nei lovin ka hria a. Sorkar hmasain 'wine hralh ni se' tiin hma an han la chho a, 14%-a tih an tum a, ZPM ngei pawhin 'a sang lutuk e' tiin lehkha kan thelut a ni a, tichuan 10 (-2) ah khan dah a ni ta a. Hemi chungchangah hian tunah bill rawn luta hi Amendment Bill a ni a, a hmasaa mi kha tam tak la chhawm (la hman) a ni a. He thilah hian ZPM ten au hla kan neih 'kut-hnathawktute tan' tia kan au thina chu a takin a lo lang ta zawk a ni.

Kan member zahawmtak Tuichawng bialtu khan Zu a rawn haw em em a, a haw leh hun chu a huphurh awm ngawt ang ka ti a, homework a insiam hnem khawpin ka hria. Helai hmunah hian kan thusawite kha tihian a in ziaak vek a, Kum 2019-a kan thusawite a inziaak vek a ni. Engtin nge a haw hunah khan a va sawi tak ang? Homework a ngah khawp mai. Hruihruah nen a phei ang a, an va invaw fai dawn nge ni, tih te.

Pu Speaker, Dan hi siamthat ngai thin a ni a; a involve a, kan siam tha leh thin a. Eng emaw hun lai chuan a awm vek a, hun a lo kal a, 'heti hian i siam tha ang' tih rilru ah a lo awm thin vang a amendment pawh awm thin a ni. A chang chuan, 'thlak danglam burh a ngai tawh e' tih a nih vangin thlak danglam te a lo ni tawh thin a.

Pu Speaker, i veilama thute an rawn sorkar tirh, opposition group lian ber an rawn sorkar tirha kohhranin a chief minister ber an va kawmna kha, Ph. D thesis MZU ami ka hai chhuak nawlh mai a, an inkawmna chungchang chiang takin a inziaak a. Chhiar chhuah ka chak viau na a, amaherawhchu hun kal tawh thil te a ni a. Khatiang te kha engtin nge a la kalpui zel dawn? Khatiang te kha thalaite chuan kan la hre reng mai a. Thil tam tak an sawi, an buaipuia kha media leh internet atanga haichhuah theih thil tam tak a awm a. Keini chuan fruit beer te, wine te, an hun lai pawha an tih chhuah tawh, an lo zawrhpuin ngeia kha, 'siam that a ngai e' tiin kan siam thatpui a, kan tihzau sak a ni mai a. A duh lo ber angin a-zu zawngin an rawn pawt vak a, a-zu zawngin mipui rilru pawh her tumin an rawn bei a ni a. Heti lo zawng hian sawi ila ka duh khawp mai a. Pu Speaker, politics a ni a, an tih tur te pawh a ni ang e.

Tin, ‘Competition Act, 2002’ tih kha kan chhiar chian a ngai khawp mai a. Tun hnaiah All India Limited chungchangah Supreme Court pawhin order a rawn siam a ni. He Act hmang hian dan hrang hrang court pawhin judgement a rawn siam nual tawh a, chutah chuan State-sorkar emaw, Central sorkar emaw hian tute emaw bik tan hian Dan hmangin tute emaw hauh bikna, tute emaw chet theihna, monopoly neih theihna, midang chung a an len theihna dan hi a siam thianga lova. Tuna Wine Rules leh Prohibition Rules kan neih te hian Hnahlan leh Champhai a mi chauh hi a rawn ti bik a, hei hi ‘Dan kalh a ni’ tih kan hriat a ngai. Competition Act, 2002 kalh a ni a, he amendment bill hian a rawn phelh ta a ni. Tute emaw tih bik, tute emaw tan bik sumdawnaa dan lo siam bik kha phal a nih loh avangin, hetiang hian ZPM sorkara kan Excise & Narcotics- changtu kan Minister in amendment a rawn pulut ta a ni.

He amendment bill hmang hian keini i dinglama thute chuan kut-hnathawktute thlavang kan rawn hauh ngat ngat a. ‘Zu bill’ tia sawiin, i veilama mite’n theihtawp an rawn chhuah a, a lungchhiat thlak ka ti khawp mai a. Kan kut-hnathawktute hi rei tak lo bet tawh; Pu Speaker, inthlan dawn lai pheih chuan an mangan zia kan hria a, an la bet leh ang tih kan hlau a, inthlan dawnah pawisa umin emaw, an harsatna hmanga inthlan chuh tih te a awm tawh loh nan ZPM chuan kut-hnathawktute chawikan kan tum a, chu chu he bill in a tum chu a ni. Rah-beh an nihna atanga chawi-chhuah kan tum a, a ni lo zawng leh a pass thei lo zawnga mipuite hnena ngaihdan dang, inthlan rilru nei rana he bill chungchang sawi a lo awma hi a lungchhiat thlak ka ti a ni. ZPM te hi kut-hnathawktute nat ruala na kan ni a, kut-hnathawktute beh ruala bet kan ni a, kut-hnathawktute tan hian kan ding zel dawn a; kut-hnathawktute bill hi tunah hian theihtawpin ka rawn au-chhuahpui a ni.

Pu Speaker, “The Mizoram Liquor Prohibition Amendment Bill, 2025” hi a tha ka ti a, pass ngei turin ka rawn thlawp e. Ka lawm e.

**SPEAKER** : A lawmawm e. Tunah Pu Robert Romawia Royte ilo sawm ang.

**PU ROBERT ROMAWIA ROYTE:** Pu Speaker, ka lawm e. Vawiinah hian bill pawimawh tak mai, ram roelna nghawng a ni mai lova, chhungkaw mal mal nilo tleirawl duhawm tak takte, KTP/TKP memberte, kohhran dang thalai member-te nghawng phak bill kan sawi ho a. A pawimawh a, kan serious tlangin ka hria a, a lawmawm hle a.

A hmasaa kan sawi duh chu, ‘Zu’ lai leh a hrihfhahna lai velah kha kan sawi kan sawi a. Khawvel hian kalphung a nei a, khawvel kalphung piah lam te pawh a ni mai thei e, Bible-in ‘Zu’ a sawi dan chu kan hria a, engte nge ‘Zu’ a tih, tih chu sawinawn a ngai lo turah ngai ila. Sorkar zawnga ngaihtuahin Excise Act, 1973-in eng hi nge ‘Zu’ a tih? Mizoram Liquor Total Prohibition Act, 1995 te, Mizoram Liquor Prohibition Act, 2019 te leh a hnuaiia dan-te-sep te’n ‘Zu’ an tih chu - beer te, wine te, thlai atanga kan siam te, buh atanga kan siam te emaw, khang zawng zawng kha Bible tiamin, ‘Zu’ a ti vek a ni. Kan House Leader-in ‘Zu kan zuar dawn lo; Beer leh Wine kan regulate dawn a ni’ tih a sawi kha a fuh lo deuh hret em aw, tih te ka ngaihtuah a. Chuvangin, vawiin a kan sawi ho hi zu tih zalen lehzualna tur bill a ni tih kha, thuhma ah kan sawi duh a.

A pahnihaah chuan, zu khap chungchang hi. Kei pawh hi hmun hrang hrang - zu zalenna hmunah te, zu zalen lohna hmun ah te pawh hian ka kal ka kal ve a, zu zawrh hi kan ram kan hnam tan a tha lo tih hmu chiangtu ni hian ka inhre ve a; case-study te neia chutianga

ti chu ka ni hauh lo a, research base-a sawi tur pawh ka nei ve lo a. Amaherawhchu, hetia zu khapna dan a awm hnu hian zu avanga thi te hi nasa takin an tlahniam niin a lang a. Heng te pawh hi thil lawmawm, a tha zawnga zu-khapna nghawng a ni tih kan sawi lang duh bawk a.

Tin, tunah hian sawi dan chi hrang hrang a awm a, ti-ti hrang hrang leh political party inbeihnaah te pawh hian zu chungchang hi a lang fo mai a. Kan economy nen te kan sawiri thin a, sum leh pai nen te kan sawi-zawm nasa a. Pu Speaker, i phalnain, ‘zu-zawrh hi sorkar sum hmuh belh nan a hlawk em’ tih hi ka research chhuak vein ka hria a, he, sorkar lehkha copy hi ka pe duh bawk che a.

Kum 2015-2016 zu-zawrh chhoh tan tirha tax atanga sorkar sum laklul kha crore 249.76 a ni a. Hei hi taxation department chhinchhiah dan a ni a, tax hrim hrim, chhiah chi hrang hrang atanga sorkar sum laklul dan kha a ni a. Chumi kum chuan zu atanga laklul chhiah chu crore 41.11 a ni. Chutiang chuan, zu-chhiah hi a sang fu mai a. A kum leh ah crore 21.90 niin, a kum leh ah crore 25.29 a ni a. Zu-zawrh tawp kum 2018-2019 khan zu avanga sum laklul kha crore 42.14 a ni a, chu chu kan information atan tarlan ka duh a.

Ka sawi tum zawk chu - khati khawpa zu avanga sum kan laklul tam lai khan kan tax lam hi a pung vak chuang reng reng lo. Hei hi, kan mithiamte pawhin hria se ka duh khawp mai. ‘Zu zawrh a nih loh chuan, kan ram a rethei si a, zu kan zawrh ve tawh hi a ngai a ni’, ti zawnga ngaihtuahna kal awm tlat mai hi a pawh hlein ka hria a ni. Zu zawrh laia tax kan laklul teuh teuh khan, kan tax dang nasa takin a tlahniam tih chiang takin a lang reng a. Zu zawrh tawp hnu, kum 2018-2019, 2019-2020 leh 2020-2021 khan covid hripui leng chung chungin zu zawrh lai ai khan kan tax (chhiah) atanga kan laklul hi nasa takin a pung a ni. Chuvang chuan, ‘zu zawrh avang hian sorkar income hi a pung reng reng lo’ tih hi kum 4 chhung khan kan hmu a ni.

Chumi awmzia chu, zu avanga crore 42, crore 43 leh crore 25 te sorkarin chhiah kan la lut kan tih lai khan, khami zah sum lalut tur chuan mipui sum, zu man – capital atan state pawnah a chhuak nasa hle tihna a ni. Hmun dang atanga tax laklul tur kha nasa takin a titem a. Chuvangin, a economy leh a sum zawnga sawi hian zu zawrh hi sorkar tan hlawkna a ni reng reng lo. Zu zawrh avanga sum hmu teuh tura kan inngaih lai hian, zu lo lam, tax kha a tlahniam ve leh thung a ni. Tin, zu zawrh avanga damlohna leh hrisel lohna avanga kan insen belh kha chu a figure tak ka hriat bik loh avangin ka sawi lo mai ang a. Chuvangin, a tawi zawnga he point ka conclude duh chu, zu kan zawrh avang hian sum hmu teuh tura inngaihna Mizo thinlunga awm hi a dik miah lo a. Zu zuar ila, tun ai hian overall tax kan hmu tlem zawk mai thei, tih kan figure neih lai atang hian a chiang a, chu chu kan sawifiah duh hmasa a ni. House property leh kan information atan pawh a thain ka hria a, a copy hi kan pe ang e.

Tichuan, zu kha kan budget tihpun nan emaw, sum hman tur tam zawk kan neihna atan chuan a tlat loh tih chu, tikhan a chiang khawp mai a, statistical leh figure support kan nei a. Chutiang a ni chung chuan, ‘engatinge zu hi kan awn tlat; engatinge zu hi kan zawrh chak tlat’ tih lai hi a point dawt leha ka sawi duh chu a ni a.

Kan sawi tak ang khan, Mizote, thalai leh thalai kher lote pawh hi zu ah hian kan insum thei lo thin bik tih tur hian phaiah kan kal nikhua leh eng emaw ah pawh hian a awm fo mai.

Khatianga zu ka sawi khan, beer leh wine te pawh ka sawi tel vek a. Ka lo hriat ve ngai chiah lo, ka hriat thar leh vawiina MLA rualte kan han ti-tinaa ka hriat chu, “restaurant-ah te pawh hian beer te pawh an zuar a lawm; zu siam chawp ang chi phe chu leina tur a tam a lawm” tih a ni a. Restaurant-ah hian beer leh a senchi angte an lo zuar hial tawh a nih chuan, Dan pawh kan la nei si lova, kan society atan hian a va paw em, tih ka rilruah a lian hle a. Sorkar lai te rilru hi hriain, khalam zawnga rilru pu ve tho chi te kha an lo phur hma deuh a. Restaurant-ah te, thingpui dawr thleng hian zawrh loh tur hi an lo zuar der tawh a. Tuna Dan hmang hian kan regularize chho mai dawn em ni? Chutiang zawng chuan kan sorkar hian rilru a pu em, tih thleng khan chawhma lama thil thar - bottle pahnih inang lo deuh deuh kan hmuh atang te khan ngaihtuahna a kal a. A tak takah chuan serious taka kan ngaihtuah a ngai niin ka hria a.

Kan thlathar atang te hian zu hi siamchhuak teuh teuh ila, thingtlang leh thingtlang lote, hmun tin hmun tangah zuarin intihhmuh chho zel ta ila, kan society hi engtin nge a kal zel ang aw, tih hi ka ngaihtuah a ni. He bill hmang hian Zoliani te, Muanpuia te zu in kan phalsak dawn niin a lang a. An nu leh pate’n an phal miah loh hi kan phalsak dawn em ni he House hian, tih hi ka rilruah a lian khawp mai. An nu leh pa ten an duat em em an fate, zu pawh la in ngai lo kha he bill kan pass chuan zu in phalna kan pe dawn chu a ni der mai a. Chu mai ni loin, a-strong chi, (a-sencha) phalna te pawh a awm leh thei zel a. Khangte kha kan kohhran te ngaihda a ni tak tak chiah ang em? Tin, keimahniho pawh hian kan fate in atan hian kan duh chiah emaw ni le, beer leh wine-te hi le, tih te rilruah ngaihtuah ta ila. Mahni fate mitthla chungin, kan KTP duhawm tak tak te, kan YMA duhawm tak tak te, kan YLA te leh MTP te, pawl anga zu lo duh lo mektute mitthla chungin he bill hi ..

*(Hon. Dy. Speaker-in Chair a la a.)*

Pu Deputy Speaker, he Bill kan sawiho lai hian mahni fate hi i ngaihtuah ang u; Mahni tu leh fate i ngaihtuah ang u; mahni kohhran i ngaihtuah ang u; kan Pastor-te pawh i mitthla ang u. A tak takah chuan kan fate in atan kan duh em; kan chhungte siam atan kan duh em; kan chhungte eizawna atan kan duh em tih hi inngaihtuah Chiang ila a thain ka hria a. Kan hnam hi ruihhlo avangin kan buai mek a ni a, kan sorkar hi ruihhlo bawkah heti zawng hian na deuh maia a kal leh a nih chuan a dik lo ang.

Tin, Excise Department atanga zu direct-a an han hralh tur te, red-card hi a lar khawp mai a. Kan bill puluttu te nen hian football lamah chuan red-card hi kan hre lar khawp mai a. Food and Civil Supplies lamah pawh hian red-card kha a thar deuh a awm niin ka hria a. Hetah, Excise lamah red-card an awm leh dawn a; red-card hrim hrim hi a fuh lo dawn niin ka hria. Chuvang chuan, he zu bill hi kan chhungkhat lainate, kan kohhran leh kan society te ruihhloa kan buai lai mek hian pass lul lo ang u.

Tin, zu ni lo, thlai atanga siam theih hi tam tak a awm a. A nihna takah chuan Pu Dy. Speaker, Govt. of India funding pawh hi food processing atan hian a tam a. Industries Minister zahawm tak pawh kan zingah a awm a, tih tur tam tak a hriain ka ring. Kan thlai-thar chhuahte zu lama a kal duak chuan tuna food-processing policy ropui tak tak leh central sorkar in 50% mimal te pawh a pek theihna UNNATI pawh ministry hrang hrangah central sorkar a inhawng em em a, mimal ten tanpuina an dawn theih ang chi kha; kan sawi tak ang khan a hralhna te pawh a tam zawk ang a. Khatianga zawng te khan kan sorkar hi kal zawk ta sela, zu zawrh leh zu siam leh zu in inphal saka promote hi chu, kan thalaite rilru hrim

hrimin zu kan hman thiam loh thin zia te ngaihtuah hian, ‘a la hun lo e’ tiin he bill hi ka support lo a ni e. Pu Speaker, ka lawm e.

**DEPUTY SPEAKER:** Aizawl West i bialtu Pu TBC Lalvenchhunga ilo sawm ang.

**PU TBC LALVENCHHUNGA:** Pu Dy. Speaker, vawiinah ‘The Mizoram Liquor (Prohibition) Amendment Bill, 2025’ sawi thei tura hun min pek avangin lawmthu ka sawi a. Vawiina kan ngaihtlak tawh china lang chu - a prohibition amendment bill ai mahin ‘zu-zawrhna’ tih tlatna rilru nena mipui kaihhruai kan tum tih a lang a. Chutiang karah chuan ngaihtuahna zau tak rilru puin, i vei lama thute pawhin ngaihdan pawmna awm tak tak te pawh an rawn chhawp chhuak a. Amaherawhchu, Zu hi engnge a nih tih han inhrilhfiah siakin, wine hi zu a ni/a nilo han tih ang chi te han ngaihtlak, kan thuthmuna zirin kan ngaihdan a dang thin tih chu a lang Chiang hlein ka hria a. A hmasain vawiin, ‘The Mizoram Liquor (Prohibition) Amendment Bill, 2025’ hi a nihna ang anga pass-pui turin ka thlawp thu ka rawn sawi duh a.

A bill-body leh engkim an rawn sawi lang tawh a. Amaherawhchu, political game kan khelhna lai bera hi vawiinah chuan sawi ka duh a. Mizote hi hnam-dawihzep kan ni a, kan hruaitute leh i vei lama tangte pawhin an rawn sawi tawh a, ‘tlanche chung a bill put luh’ tih te kha ka lo hria a. A mak khawp mai; mahni ngaihdan sawi ngamlo patling kan lo tam zia hi. He bill leh a kaihhnawiha kan buaipui laia hi mak ka ti a, vawiinah hian rawn dinchhuahpui ka duh a.

Zoram thalai tam tak vawiina House zahawm tak i kaihhruaina hnuaiia ngaithla mek kan awm pawh ka ring a, chung mite ina ram-roreltu kan thlanchehuah te hian an ngaihdan dik tak hi an pun ngam chiah em, tih hi an lo thlir atan ka awt em em mai a. Kan ngaihdan ai mahin kohhran ngaihdan te, NGO ngaihdan te leh pawl behchhanin khawilai emawa an sawi dan te leh Bible behchhan tein ro kan han rel a, kan han pulut ta hlawm a. Mihring ve riang ruan chuan ngaihdan kan nei vekin ka ring a, vawiin nia bill kan put luh phena thil awm kan sawi te kha frank deuh taka han sawi ka duh a ni.

Vawiinah hian zu that lohna te, zu dik lohna te kan sawi rual hian, sawi hrehawm tak a ni a, a sawi lo tur takte pawh ka ni mai thei a. Sipai-bang ka ni a, quota nei ka ni a; an khap emaw, khap lo emaw duh ila in thei ka ni a, la thei ka ni a, kan in lo a ni. Chutiang bawkin, harsatna hi tawh ve tawh ka ni a, ka ute pahnih zu avangin an boral tawh a, tunah pakhat kan la buaipui bawh a. Mahni inchhung ngeia buaipui ngaite kan awm ve tawh thin. Khawvel ram dang dang kan kal a, kan hmuh dan ka hriata chu, ‘milem awm hlang’ tih hi a ni; a duh loin kan in lo. Eden huan lai taka theipui kha Pathianin a lak sawnsak lo; duhthlanna thianghlim min peka kha in control sak phetna rilru kan neiha hi a farisai a ni; a tak ram hi kan face ngam a ngai tawh a ni zoram thalaite hian.

Vawiinnia kohhran hruaitu, nu leh pa, ‘zu ka duh lo’ tia au au te hi ngaihtuah teh u. Zu-khapna rama fate lehkha zirtir duh lo, zu-khapna rama mahni fate hnathawh tir duh lo Covid a lo thlen khan kan hria ti rawh u; thalai a sing chuang kan thawn chhuak a nih kha. Mahse kan ramah chuan kan phal sak miah lo. Zu tha emaw, zu chhia emaw lam kha ka sawi lova. Khawvel hian pian-ken, nih phung a nei a, chu a nih phunga nun ho tura kan inzirtirna kawngah hian, pulpit tlanga kan thusawi leh khawilai veng kil-kara politics kan campaign na ah te, intlan ni ah te, result puan ni ah te chuan kan chet duhdan chu a dang hlak a; milem

awmkhawm kan ni. Chu chu vawiina thalai lo ngaithla ten lo hria se ka duh a ni. Rorelna hi a taka kalpui turin nge min duha, heng Dan awm sa tlem han siam danglama anih tak avanga a chhe thei ang bera han inchhuah te, bible chang hmang ten kan han inkhak ang fek fawk a. Bible chang hi ka sawi ngai lem lova, ka tih ngai loh thil a ni a; zu chungchang phe chu ka sawi ngai lova.

Amaherawhchu, vawiina kan sawina hrang hrang atanga ka ngaihtuahnaa lang ta chu, vawiina rawn kal khawmte hi ‘kan van dawihzep em em ve’ tih lai hi a ni. Engatinge a nihna anga kan lan ngam loh? Mizoram-in healthcare society a pe a, sorkar tih tur chu, a khua leh tuite enkawla hnathawh turte dap sak bakah an hriselna enkawl te, zirna tha pek te a ni. Chu zirna tha pe tur chuan engnge kan tih? Vawiinnia state healthcare te, Govt. medical re-imbursment bill te hi en mah teh u - medical cases top 3 ah alcohol syndrome a tel a ni. Vawiinnia sorkar hnathawk mek kan rin em emte zingah hian zu-buaina nei mi 700 chuang kan enkawl an awm a ni, private hospital-ah ringawt. Sorkar hospital nen chuan sorkar hian a nuai eng emaw zat kan seng; chu chu khap rengna hnuaiyah a ni. Thil nihna hi kan tawng ngam miah lova, a tak ram hi engah nge kan hmachhawn ngam miah loh, tih hi vawiin niah hian ka sawi duh a ni. Thil control/restrict, a nihna tur ang ni lova awmte hrem ngam sorkar a ni lawm ni, kan mamawh tawh zawk? Engatinge a chhehvel kan invuak kual kan invuak kual? ‘Chumi chuan ngaihdan a nei ang a’, tia mahni ngaihdan pawh sawi ngam lo ten politics kan khel tawh a ni.

Kohhran leh eng pawl emawte ‘an pawl ka sawi palh ang em’ tih hlir kan ngaihtuah a; pindan chhungrilah kan lut a, a zu man to deuh vek thli thei kan ni. Sorkar thil tih pawimawh awmkhawmnaah a man to ber ber an rawn keng thei vek; vawiinah chuah ni lova, chu chu thil nihphung dik tak a ni. Amaherawh chu, a langa mawia lan kan tum avangin zu kha sual ta ngawih ngawihah kan zuk chhuah a. Vawiin nia thangtharte nuna kan tuh meka hi en teh u; vawiin niah kan fate sorkar sikula kal tir duh pawh kan awm tawh lova, a thei-fa leh vawiin nia zu haw ber berte hian kan hmuh phak loh vairam zu-zalenna ah fate kan dah a ni. Hei hi ennge a chhan? ‘Lemchanna Khawvel’ tih sawi a awm thin; nimah sela keimahni hi chuan i ban san ang u. Hetiang hmanga kan inchirhthehna thin te hi ching tawh lo ang u. Zial zu mi awm natna avanga harsatna tuar tam tak kan awm; hriselnain a nghawng lian tak tak nei kan awm. Amaherawhchu, khawvel pianken hi khap theih loh tam tak a awm a, chungho nena nunpui kan zir ngam loh chhung chuan, keimahni leh keimahni hi misualah kan inchhuah ang a, dan-bawhchhia kan insiam tam tawlh tawlh ang a, a dera nun dan kan zir hnem tawlh tawlh dawn, tih hi ka hmuh dan a ni a.

Vawiina kan sawi zawng zawngah khan a bill-a kha chu ve-lek chauhin a ni kan sawi ni; a phena mi vek a ni kan sawi. Kan rilruin a hmuh tlang reng tlang taka ka sawi duh miah loh, ‘heti zawnga ka sawi hian kohhran miin min ei deuh ang; heti zawng hian sawi ila kan vanga kan upa ten min ei deuh ang a’ tih vel mai mai a ni. Kan rilru zawng zawng hian do ni ila chu chhun-zanin ruihhlo tite an thatna turin kan vahpui ang a, kan eiru hek loving. Vawiinnia he rorelna sanga thu thin thinte hian engvangin nge kan eiruk, an chan ai engvangin nge kan eiruk thin? An hnen a thlen thin loh avangin anni chuan an phak tawh an eizawna an dap mai a ni. Chung mite eizawna leh zel chu khapsak kan la tum tihna em ni? Hei zawka hi a ni he ram hian kalphung thar a mamawh chhan chu. Thlir dan thar a mamawh tawh, ngaihdan thar a mamawh tawh. Thangtharte hian beisei ram kan nei ve. Hna an han thawk tak tak a, an awl ni (inrinni) angah te chuan bar-a thut te an duh ve. Khang mite kha ‘sual’ in ti ngai em? kum 15 kan awmve chhungin kan hmu hnem lutuk; rui-buai hi kan hmu ngai em? Mahni ngei inchan ta ila, chawlhni-inkhawm banah bar ah

kan thu lut a, kan thu ve reng; EPL kan en a, zan dar 1 vela kan bengchhenna awm ve chhun a ni; kan in chuang hleinem, a duh loh chuan.

Vawiinnia intheihna-permit nei reng vawikhat mah kan la lak chhuah loh chhan hi eng vang nge? Thangtharte moral siam tha tur chuan vawiinni rorelnaa thute hian keimahni moral hi kan siam that a ngai a ni. Midang tana roreltu ni lovin, keimahni tan ro kan rel tel tih hi kan ngaihtuah a ngai takzet tawh a. khawvelah sual leh tha hi a insual reng dawn, chumi laka inzirtir theih tur chuan vawiin niah ram hruaitu thutkhawmte hian rethei leh hausa zawkte'n an chanvo an chan ve theihna turin mahni inphata, an ei ai ei lo ngama, mi diklote hrem ngama, dan bawhchhiate jail-a khung ngam kan nih hunah chauh he ram hian vanram a kai ang. A bak te chu, sawi mah ila tuman vanram an kai ka ring vak bik chuang lo.

A tawng chu kan ngam huai, pulpit ah pawh huai tak takin an sawi a, 'a va sawi tha em' kan ti a, mahse political platform-ah chuan kan ngam ve lo reng reng. Pulpit tlang atangin kan politician-te tawp zia kan sawi a, sorkar-hnathawk tawp tawh zia min sawi khum a, vawiina sorkar politician-te hian chu chu kan sawi let ve ngam dawn lo em ni? He ram hi kan siam tha duh a nih chuan, helai politic circle-a kan hmuhte hi tute nge annih kan hriat a ngai. Chung mite chuan min pawm a nih si chuan, vawiinah hian engah nge kan rorelna hi an pawm loh ang? Pathian duh dan chu - hausa leh rethei inkar tih zima, nuamsa taka kan chen ho hi a ni. Chumi ti tura economic prospective te, harsa leh nuam zawka danglam te, nuamsaa kan chen ho theihna tur te, kan inpuih tawn theihna tur te, chumi atana Dan siamtu tur tena khawvel thil leh kohhran thil kan kaihkawp fona thilah hian kan thliarhran ngam a hun tawh viauin ka hria, Pu Dy. Speaker.

Tichuan, vawiina "The Mizoram Liquor Prohibition Bill, 2025" lo lut hi ka rilru takin ka thlawp e. Ka lawm e.

**DEPUTY SPEAKER:** Kan sawi rei viau tawh a, pakhat kan la leh ang a. Dr. K. Beichhua ilo sawm ang u.

**DR. K. BEICHHUA:** Pu Dy. Speaker, vawiina "The Mizoram Liquor Prohibition, 2019" amendment bill lo lut hi lawmawm ka ti a. He bill hi term hmasa ka minister ve laia keimah ngeiina ka put luh, March Ni 28-a passed a ni a. Act a lo chang ta a, chutah chuan a dikhlel leh fel hlel deuh lai pawh tam tak a awm ka ring a ni. Chuti chung chuan kan han kal ve tang tang a, Rules hi kan siam har ang reng a, August Ni 23, 2022 ah kan siam thei chauh a ni.

Vawiinniah Excise minister tha tak ni tur chuan political-ball nih a ngai a ni. Political party tinte hian kan mawngah min chhir thin a ni. Achangin Congress lamin MNF lamah min pet phei a, MNF lamin ZPM lamah; Excise minister ni tur chuan chutiang chu nih a ngai a. Ka lo experience tawhna atang chuan, hmingthat tum tan chuan Excise minister nih loh a tha zawk ka ti thin a ni. Chuvang chuan, hming chhiat pawh huamna, tawrh ngamna, chu chu challenge-a la ngamtu chuan, "E, khawnge ram tan chuan..' tia lak chi niin ka hria. 'Ka lar ang a, ka hming a tha ang a..' tih chi a ni lo hrim hrim a. Chu chu thu hmasaah ka rawn sawi duh a ni. Pu Dy. Speaker, he bill amend rawn lut hi a awm ka ti a; repeal pawh ni se, awm ka ti tho a; chu chu vawiinah hian kan sawiho thei a, lawmawm ka ti a.

He bill hi a kawng a thui hlein ka hria a. A bill-bu hi Ni 22.2.2025 ah memberte min pe vek a, kan lo chhiar vek a ni. A kal chho zel a; March thla tir lam, a tukah discuss tur a ni, tih ah chauh a thlakna hi kan hmu a. Ka rilrua ngaihtuahna lo lut chu, Pakhatnaah chuan - He bill hi tlanche chung a amend a ni em aw, ka ti a. Section 40E hi an tlanchehiatna lamah an thlah a, an paih bo a. Chu bill section chu tel ta lovin, discussiona kan sawi tur 1.3.2025 ah khan legislature party thukhawm khan, “I thlak mai ang u, tiin ro kan rel a”, a ti a ni, a changtu Minister khan. A lehlama ngaihtuahna lo lut leh chu, he bill section 40 thlah-thlak hi kohhran ho mar deh nana an thlah-thlak luih nge, tih leakout luih nge, tih te rilruah a awm a ni. Thil ni thei pakhat chu - tlanchehiat paha thil tih a nih avangin, Section 40(E) kha thlah palh a ni em, tih leh, a pakhat leh ah chuan, kohhran ho mar deh nana thlah luih a ni em, tih te rilruah a awm a ni.

Chutiang chuan, chawpchilh taka sawiho turin, dar 9 hnuah a tuka sawiho turin a rawn lut chauh a, khatiang kha Assembly history ah a awm ngai lo reng reng a ni. A danah chuan ni-li hma ngeia memberte chhiar theih tura chhawpchuah tur, tih a ni a. Conventional-a kan neihah chuan ni-thum tih a ni a, a vanduai thlak hlein ka hria a. Khatiang thil kha kan hma hunah chuan thleng tawh lo se, tih hi Pu Speaker, memberte kan in ngenna leh nangmah ngei pawh, hengah hian bengvar min chhuah sak turin ka ngen bawk che a ni.

He bill hi nichina ka sawi tawh ang khan, repeal pawh ni se a awm ka a. He bill a lo luha ka rilrua awm leh chu, ‘i lum leh lum la, i vawh leh vawt law law rawh’ tih hi a ni. Engatinge, a hmaa kan tih pawh kha a tha thawkhat viau a sin maw le; eng chu nge maw kan hlauha kan thlah thlak le; eng chu nge maw kan hlauha kan tih leak-out le, tih ngaihtuahna ka nei a. Engnge kan venthawn em em? Tuna thu sawitu te han ngaihtlak pheih kha chuan, huai viau turah ka lo ngai che u a, in lo huai lutuk lem lo a ni, tih kha kalphung-thar ka hmuh dan che u a ni.

Tin, statement of object and reasons ah khan Mizoram Liquor (Prohibition) Amendment Bill, 2025 hian a tum chu - sorkar revenue generate a ni a, chu chu ziak ngeiin a rawn lang a ni. Hetiang atanga revenue generate-a sum leh pai kan hmuh hian, State Day of Prayer ah khan ‘rorelna sang bera Pathian ram a thlen theih nan’, tiin kan tawngtai a ni lawm ni? Hei hi Pathian ram a thlen theihna kawng a ni ang em, tih hi zawhna lian tak a ni.

Tin, section 1 hi, kan Act hmasa ah kha chuan Autonomous District Council a huam tir lova, kan hunah pawh kan huam tir lo a ni. 6<sup>th</sup> Schedule Constitution of India hnuah a awm an nihna kan zah sak a. Chutiang chuan, tun ami ah pawh hian a nihna dik tak chuan 12B clause (a) leh (b) kha en ta ila, clause (b) behchhana Governor thuneihna nena barh luih ang deuh a ni. Chuvang chuan, an kan va inrawlh loh hian a felfai. Anmahni chhia leh tha hriatna te hmang ve se; an lo kal tawhna chinah chuan, an chhiatna turin an lo ti hran lem lo. Chuvang chuan, kalphung-thar tih tak avanga District Council Autonomous District Council thlenga va kal kha a tih chi vakin ka ring lo, Pu Dy. Speaker.

Section 1, (ha)-a ‘distributor’ tih hrilhfiyahna kha en ila, ‘wine’ chiah a sawi a ni; local-beer definition a awm lo. Khalai ka hriatthiam loh lai kha Pu Dy. Speaker, kan Minister-in nakinah min hrilhfiyah thei se. A thu hrimin, khang te kha ‘zu’ kan tih si loh chuan, engatinge agriculture leh horticulture hnuah hian khap khap lovin kan siam tir hle hle mai loh? Nichinah a changtu minister ngeiin, ‘restaurant leh puipunna hmunah te a tam a tam zia’ tih kha a sawi a ni. Engatinge a Dan enkawltu, a Dan vawngtu Excise and Narcotics minister berin chung Dan bawhchhia a hriatte chu a man tir mai loh? Kan hriat

loh chu hriat loh ni se, man ngaihna a awm lova; thil diklo ti hriat reng si action lak loh kha chu soal a ni tlat. Kan hun lai, rules kan siam hma khan heng Hnahlan grape-wine te pawh hi phal a ni lo. Millenium ah an zuar tih ka hriat ve leh ka man tir mai. Pu Nguna te pawlin nilengin, ‘bang rawh se’ tiin khawlaiah min lo au a nih kha. Chutiang vel chu a ni.

Pu Dy. Speaker, Section 4 A leh B ah hian insertion thar a awm a. Section 4B clause (a) ah khan, ‘establish departmental store for stock of confiscated foreign liquor or beer for supply to permit all those under this Act’ a ti a ni. Vawiinah hian thil dang hi ka against lutuk lo, kan thei leh thlaite beer ah emaw, wine ah emaw chan tir ta ila, MNF minister ka nih lai pawh khan ka ti ve tlat; thil dik hi sawi mai tur - Grape-wine siam chhuaktu ka ni tlat. Chuvangin, hei hi sawisel thei ka ni bik lo. Ka sawisel chu, Excise and Narcotics tling lo taka, hmangaih taka ka lo enkawl department zu kan zawrh tir tur hi ka phal lo a ni.

Court-a confiscate tawh helai Excise departmental store-a daha, permit nei Abdula leh tu tute emaw, Bagha, Silchar leh Lailapur amite lo lei tir kha a phal a ni lo. Khang ho kha tourists an la ni dawn. Chuvang chuan, helai hi Pu Dy. Speaker, he bill ka pawm theih lohna chhan a ni. A thei kha chuan eng anga an lo tih pawhin a tha e; revenue generate nan kan tih pawhin a tha; Pathian ram lo thlen theih nan kan tih pawhin a tha e. Mahse, sorkarin confiscate tawh zu Excise & Narcotics Deptt. a zawrh tir tur hi a dik ka ti lo a ni. **(Dy. Speaker:** I zo thei dawn tawh dawn em?) Ka zo dawn e, Pu Dy. Speaker.

Section 45D ah hian manufacture te, local fruits beer sale leh supply te, thil chi hrang hrang atanga siam dan tur te a rawn sawi a. Pu Dy. Speaker a nihna takah chuan tun dinhmunah pawh hian he Dan hi thlah-zalen emaw tih mai turin restaurant hrang hranga zawrh a minister ngeiin a rawn sawi kha. Hei hi chu, inbih chiang deuh teh ang u. Tunah pawh hian rules kan la siam leh dawn. Rules siam hma tal hian chuan engpawh nise a minister hian theih tawp lo chhuah se tih kha ka chah duh bawk a ni.

Section 20, Chapter A ah khan dignitaries te leh tourism, tourist ho ah khan permit neia pek phal an ni dawn a ni. Hei hi ka’n en chiang a, rethei leh hausa inthliarna chikhath niin ka hria a. **(Dy. Speaker:** Zawh fel tum tawh la.) second hnih-khat lek, Pu Dy. Speaker.

Tin, ‘tourist’ kan tih hi, World Tourism Organisation definition ah chuan - mi a chenna environment atanga hmun danga ni 100 aia tamlo awm tur kha ‘tourist’ a ni e, a ti. Chutiang a nih chuan, kan unau kan thian, kan border hnaia awm Lailapur te, Bagha te, Silchar te, heng Tripura leh Hailakandi lama mite pawh khu Vairengte ah zan khat rawn riak se ‘tourist’ anni tho tihna a ni. Chungho chuan ni khatah cheng 500-1000 hlawh nan chuan an lo thlawk chho teuh mai lo ang maw; permit te online hian an lo dil teuh mai lo maw, tih ngaihtuahna te min siam a ni. Khang ka sawite avang khan Pu Dy. Speaker, he bill hi ka pawm theilo a ni e.

**DEPUTY SPEAKER:** Hun vawng dik hram hram ila. Tunah Pu Muanpuia, Hrangturzo bialtu ilo sawm ang

**PU LALMUANPUIA PUNTE:** Pu Dy. Speaker, hei vawiina ka diar khim hi Paite hnam diar a ni, tih kha a hmasain ka sawi duh a.

**DEPUTY SPEAKER:** Ngawi lawk rawh aw. Dar 4:00 PM a ri a, kan lo en pel deuh mah tawh a. Engtingge kan la kalpui ang? Kan la sawi chhunzawm zel dawn em? (House-in sawi chhunzawm a remti a.) A nih aw. Sawi chhunzawm rawh le.

**PU LALMUANPUIA PUNTE:** Ka hmaa sawitu thenkhatte an sawi ang khan, word-play lam a tam mah mah zawk a. Heng ‘dignitaries te, tourist te chuan permit neiin an lei thei ang,’ tih te hi chu, MLTP Act, 1995 ah khan a awm daih tawh a. 1998 - 2008 chhung MNF sorkar pawh khan a kalpui reng a ni. Kha tih lai khan kan thiante foreign tourist tam tak an lo kal, permit kan lo siam sak thin a, an rawn lei haw thin; chumi pual te pawh chuan a hranpa tein kan thawn thin bawk. Tam tak MNF sorkar lai pawh khan an lo ti.

Tin, 2019 ah khan hnawhsarum deuhin Congress sorkara zuzawrh tihtawp an tuma an amend-naah khan an lo tel lo palh mai mai a nih hmel a. Thorang Bialtu Pu Rohmingliana kha “Bible Society in Bible min rawn present hnuin ka chhiar tam ta deuh a” a ti chauh mai a. Bible kha a lo chhiar khat viau em maw ni le? Zu chungchang ziahna te kha a rawn mark eng fer fur mai a, a lo la chhiar tlem deuh a ni ang ka ti. Kha laiah khan ‘MLA ten kan kawl tawh hnua kha document kha leak-out a ni em, tih lai kha, MLA ten kan kawl hmaa leak-out zawk niin ka hria a ni.

Tin, Pu RM Chakma khan, ‘Food processing te ti zawk se’ a tih leh Pu Robert Romawia pawhin a sawi te kha, kan ti lovang tihna a ni lo; kha kha kan ti dawn tho. Kan bialah te pawh entrepreneur tha tak tak ZPM ni lo, Bana-kaih policy ah pawh keiman la tura ka recommend ngat te pawhin juice leh khatiang lam hawi kha ti an tam ve tho a, a party zawnga han sawi chi niin ka hre lova. Wine hi ‘zu’ a ni kan tih si chuan, wine siam leh zawrh phalna ti hmasa ber te chu MNF an ni tlat a ni. Minister Dr Vanlalhlana sawi ang khan, grape ah pawh Hnahlan leh Champhai chauh ni lo, Mizo kut-hnathawktu ten thlai thar dang atang hian siam ve ang u, tihna mai a ni. Foreign dignitaries leh medical prescription card neih tih te kha chu a vantlang dawn lo, a tlem dawn lutuk. Chutah pawh an man khawm sa, tih ral ngawt aia man neia lo siam vena chauh a kha a ni. Khatiang kha khel tham a ni reng reng lo tih kha ka sawi duh a ni.

Tin, Pu Beichhua’an, “ADC-te tel lo se”, a rawn ti pheii kha chu, zu khap duh viau anga insawi si kha; keiniin tunhmaa an khap tel ngai loah Dân hmangin khap tel kan tum a ni a, kan point a valid tâwk a ni tih kan hriat avânga va khap tel tum kan nia. Khalaiia khap tel duh miah bawk si loh kha, lehlam lehlamah a ãng tawn mai mai niin a lang a. Tin, ‘zu in phalna pek’ tih kha, tunah hian zu quality chhe em em miin an in reng tho si a, kum tlemtein mi an thi zut zut a, kohhran tan pawh lungngaihna tham a ni; kohhran mission ber chu thlarau bo chhandam a ni si a. Miin zu an in reng; an thlarau chandam hman loha thi an tam lutuk. Chuvang chuan, hetiang zu, distilled ni si lo, local fruit, kan thlai thar ațanga kan tih ve theih te hi an in chuan an dam rei deuh ang a. Chumi chhung chuan Kohhran pawhin chhandamna thu kan hrilh anga, kan chhandam hman ang kan ti a ni.

Chuvâng chuan, hei hi do chi vak pawh a ni lo. ‘A phêna thil awm’ te an ti; anmahni hian a phên ah thuhruk an nei ngah lutuk zâwkin ka hria, Pu Dy. Speaker, i bula mite hi. Tin, “tu kohhran nge; tunge a phal tu” tih kha chu, Minister leh kan House Leader-in ãul an tih chuan sawi mai sela. Kohhran ho in Inrinni, March ni 1-ah CM leh Excise Minister an kâwm a. Chuta inbiakremna thlapa helaia thil rawn chhuak a ni, tih kha ka’n tarlang ve duh hrim hrim a.

Chutah pawh chuan an lo la hriatthiam loh, nichina an sawi tuitling leh zupui te bakah zufang pawh kan sawi khâwmna aţangin kan paih a ni. Pu Lalchhandama Ralte bialah khian tunah an la ti em ka hre lo; tun hmaa ka han in candidate ve laia an tiha chu, Sâw leng ah khian hmeithai rethei-harsa tân khawtlângin zufâng siam an phal sak a. A  a em em a, keini pawhin kal pahin ka lei ve  hin a, ch ng te pawh chu tih kan tum a, amaherawhchu, kohhran ho mitmei venna av ngin kan paih leh ta a ni. Chuv ng chuan, khalai ‘kohhran’ tih, opposition lam aţanga demand rawn awm nasa kha chu a Minister-te emaw kan House Leader in  ul an tih chuan rawn sawifiah mai sela. Tin, ‘kohhran te engtin nge an ngaihd n’ tih lai pawh hi an hrefiah law law chuan ka ring. Chuv ng chuan, kohhran laka tl k luh tumna politics deuh mai hi ni hian a lang a. Keini te pawh kohhran ah te chuan mipui bek chhawn z wng a  u ve ph k kan ni a l wm. Hengah te chuan chuti takin kohhran duh loh zawng kan ti lo ang tih ka sawi duh a. Chuv ngin, “The Mizoram Liquor (Prohibition) Amendment Bill, 2025” hi tlang ngei se tih hi ka rawn thlawp a ni e.

**DEPUTY SPEAKER:** Tuirial Bialtu MLA Pu K. Laldawngliana ilo sawm ang.

**PU K. LALDAWNGLIANA:** Pu Speaker, ka lawm e. Vawiinah, “The Mizoram Liquor (Prohibition) Amendment Bill, 2025” lo pu l t tuin side nei r nin thiam takin a rawn sawi a. Pu Speaker, he bill kan sawiho tur avang hian zan thum v l ka mu mumal tawh lova. Kan Nu pheichuan, “I sawi na lutuk ang e”, a ti a, na lutuk chuan ka sawi lo ang a.

Vawiinni ah hian ‘Pathian leh kan ram t n’ titu MNF Party chuan stance kan nei a, ‘Zu kan zuar lo ang’, kan ti a ni. Amaherawhchu, Central leh State project kaltlang leh mipui demand av ngin Champhai leh Hnahlan Grapes wine erawh chu Sorkar hmasain a lo siam pawh tih tawh mah naka laiin, a aia nasain thlai dang zawng zawng atanga wine leh beer siamna tur, hetiang a zu zuar tura ngaihtuahna kan s ng hi pawh ka ti takzet zet a ni.

Pathian ram lo thlenna tur at n hian he zu - beer leh wine zal n taka zawrh tur hi kohhran hrang hrangte pawhin  a kan ti lova, YMA, MUP, MHIP leh pawl thenkhat te pawhin  a an ti lova. Zu zawrh  a ti hi an tam ka ring lo khawp mai a. Vawiinah pawh hian nil ngin kan sawi a, zu hi, ‘mimal ngaihd n tlang deuha sawi tur’ in ti a, zu hi kei chu engti kawng mahin a  atna ka hre lo reng reng a ni; beer leh wine hi a  atna ka hre thei lo kei chuan. Kan ram hmelma ruihhlo ‘zu’, wine leh beer te hi zal n taka zawrh hi kei chu  a ka ti thei lo a ni.

Pu Dy. Speaker, vawiina bill kan ngaihtuah m k hi a nihna takah chuan zu lam kaihhnawih thlah zal nna leh chumi ruala zu leh a kaihhnawih aţanga chhiah tam l k duh v ng a ni tih hi Chiang takin kan hmu a ni.

Mizo society naupang em em t n hian vawiina kan sawi kan sawi hi ngun taka kan ngaihtuah a ngai a. Chapter 5 hi kan sawi  a duh lo khawp mai a. A nihna takah chuan Pu Speaker, a lo sawi hawngtu kan Minister zahawm tak khan bill a rawn put luh chuan a nihna ang rawt rawt khan min rawn hrilhfiah tur a ni a, amendment-a chuan. A  a lai pawm awm tak, Zoram-mipuite hmin tur z wngin thiam tak maiin a rawn sawi a ni. Mahse, a bak sawi belh ngai, amend tur sia kha sawi fiah Chiang mang lovin chapter 5 (4), 45A kha a thar hlak a ni a. 45B-ah pawh a awm a. Kan sawi ang khan, ram pawn t n, zu-permit a ngaih d n tur te, Excise & Narcotics Department ten zu an lo zawrh d n tur te Chiang deuhin a sawi a, Khang te kha sawifiah ve kelh kawlh se a  a tur a ni a.

Dik tak chuan, Excise Department din chhana hi zu zuarte mana tirêm tura din a niin ka hre si a; tunah zu zuar turin kan buatsaih a nih si hi. Fiamthu thawh nan ‘Zu-zuar Department’ an ti ringawt tawh a nih hi. Inthlan dâwn khan kan House Leader zahawm tak khan interview-a a thusawi ka la hre reng a. Zu chungchâng kha an zâwt a, ani chuan “ZPM rorêlna sâng zâwkah kan lo sawiho tawh a, keini chuan zu kan zuar ve dâwn lo”, tiin a sawi a nih kha. Kalphung-thar ah hian ‘thudik hi engnge ni ta’ ka ti a ni. Thu dik hi sawi ngam ang u, kalphung thar ah hian. Pathian ram dinna turin State Day of Prayer nikumah namên lovin Zoram-mipuute, ram pawn Mizo fate zawng zawngin thupha chawiin kan tawngtai a nih kha. Kumin State Day-ah kan tawngtai leh baw k a. Vawiiinah hian engnge kan nilên zakna chhan hi?

Grape wine pakhat an lo zuar tur zalen pawh tih tawh mak nak laiin, a aia nasa a zalen takin food items zawng zawng zuar tura sawihona nileng kan nei hi, kan tih loh tur kan ti em aw, ka ti a ni. Pu Dy. Speaker, House Leader pawh kohhran Upa ordained, Opposition Leader pawh kohhran Upa ordained, Speaker pawh ordained, ordained Minister dang pawh kan nei nual a ni. Kan MLA pangngai te pawh a tam zawk hi pulpit tlanga rawngbawltute deuh vek kan nih hi.

Vawiinniah hetiang kan ram tana tha miah loh tur, zu zawrh tur chungchangah, ‘beer leh wine hi zu a ni lo ve’ kan han ti vel a, kan thiam ang tawkin kan insawifiah siak vel a, dinglam leh veilamin; heti lam tur hi a niin ka hrelo kei chuan. Ram rorelna sang berah hian rawngbawl tura lo kal khawm kan ni lawm ni? Pathian ram dinna tur hian kan tang tlang dawn lawm ni? Zu hi kan zuar ang maw, Pathian-ram dinna turah hian?

Bible kan chhiar a, sawi tur tam tak a awm a ni, kan chhiar thin. ‘Wine hi nuihza bura min siamtu a ni’ tih te kan hmu a. “Wine ruiin awm suh u, chumi ah chuan insum lohna a awm a ni,” tih te pawh kan hmu a ni. Nizan dar 1:30 AM-a ka rilru a awm chu ka ziaakchhuak kher a ni. Galatia 5:21: “Itsikna te, zu ruihna te, zu hmun hlimna te, chutiang thil tih hmangte chuan Pathian ram an chang lovang,” a ti a ni. A rapthlak ka ti a ni kei chu. Chi pawh hi e, a hmanna tur dik taka hman loh chuan, a al lai chuan a al mai. A nihna tura hman tawh loh chuan eng atan mah a hman tlak loh. Chuvang chuan, kan sorkar kalphung-thar duhawm leh chak tak te u, in duha hi a chiang tawh. Zu zawrh in duh a, zuar law law rawh u, in nihna ang hian lang rawh u. A chiang lutuk tawh, al mai rawh u, chi ang hian.

Amaherawhchu, hei hi ka sawi duh a ni Pu Dy. Speaker, he zu kan zawrh hian kan ram leh hnam hi Pathian kan rinna kawngah hian kan hnufual phah ngei ngei dawn. Sum harsatna avanga zu zawrh, tih hi e, kei chu tha ka ti thei thlawt lo a ni. Pu Dy. Speaker, vawiiin nia kan bill leh engkim mai hi sum leh paia kan teh ta vek mai te pawh hi a him ka ti tawh lo kei chu. Tun dinhmunah nasa taka kan veng chung leh kan khuahkhirh chung pawhin, hei kan vel Vanapa Hall leh a chhehvel te, kan vengah leh veng dang dangte pawh han thlir ila, heti chung pawh hian hetiang hi kan ni a. Pu Dy. Speaker, thlah zalen taka kan awm phei chuanin e, kan ram hi engtiangin nge kan awm dawn?

Vawiina he wine leh beer zalen taka zawrh duhte hian kan nupui-fanaute nen kan chaw eina hmunah te, kan thil tih khawmna ah kan chhawp ngam dawn em? Zu a nih si loh chuan a tha kan ti em? Chu chu a ni ka sawi duh chu. Dan leh thupek kenkawhna ah lah hian hei kan sawi kan sawi a, kan Minister hovin a awm tih hriat sa reng pawh kan man mumal lo a nih kha, tunah a tam zia in sawi a. Chuvang chuan, hetih laia kan dinhmun dik

tak hi e, tun dinhmunah hi chuan kut-hnathawktute kan hmangaih a, a dik alawm. Mahse, zu hmang khera chhandam tum hi a fuh em ni? A la hun lo. A hunin a hril mai ang. Mimal ngaihnan hi sawi vek ula tunah hian e, a hun in tih ka ring lo reng reng. Engatinge kalphung-thar hi in hmanhmawh em em mai le? Zir chiang rawh u, kan ram tan a tha em tih hi, Pu Dy. Speaker.

A tawp bera ka sawi duh chu, he kan bill kan rawn put hi ngaihtuah nawn leh hram teh ang u. ‘Pathian duhloh zawng a ni’ tih hi ka sawi duh a ni. Isua hovin rorel ila, kan pass ka ring lo a ni. Pu Dy. Speaker, ka lawm e.

**DEPUTY SPEAKER:** Kan sawi tam tawh a engtin nge ni ang? Pakhat ve ve kan sawm ila kan wind-up thei tawh mai ang em?

**PU K. SAPDANGA, MINISTER:** Pu Dy. Speaker, ka’n rawt ang e. A ngaihnawm viau nain thu ngai hlir kan ngaihlathawh a, a tawn tawn in. Leader-te pahnhin an la sawi dawn a, a puluttu in a la sawi dawn bawh a. Chung chu ngaihlathawh ila a tawh thei tawh mai lawm ni?

**DEPUTY SPEAKER:** A nih leh, rei vak lo, pakhat ve ve in aw. Pu C. Ngunlianchnunga, Lawngtlai West Bialtu ilo sawm ang.

**PU C. NGUNLIANCHUNGA:** Pu Dy. Speaker, Congress group aiawh maw kha? Ka’n theihngilh palh alawm le. Ka lawm e.

“The Mizoram Liquor (Prohibition) Amendment Bill, 2025” tih hi kan ngaihlathawh nasa tawh a. A chhung thu te pawh a bung leh chang nen, a tum nen kan sawi a lehlam lehlam atangin, a tha khawp mai a. Chutih rualin, ‘pawnlanga sawi mai mai a ni’ ti pawl kan awm a. Chungte pawh chuan pawnlang deuh tho chu an rawn sawi ve leh tho chu a ni a.

Engpawh nise vawiina he bill lo lut hian thil pakhatna ka sawi duh chu, Amendment 2, Section 1 ah Autonomous Councils te huam tira hi, hei Mizoram ah hian he zu chungchangah hian, zu hi Congress hunah leh, a hmain MNF hunah te pawh lo zuar tawh thinin, an khap thin bawh a, Autonomous Councils te min huam tir ngai lova. Hei hi tun sorkar thar lo piangah, kan Minister zahawm takina a rawn sawina ah khan, ‘zu khapna dan pawh a awm lova, a zawrhna dan pawh a awm lova’, a lo tih kha, a nihna chin pawh a awm a. Tin, keini hi 6<sup>th</sup> Schedule to the Constitution of India hnuaiah awm kan nih angin, keimahni ina kan zu, local te chu siam phalna kan nei teh meuh mai a.

Pu Dy. Speaker, kha leh chen a lo kal tawh a, vawiinah hian he Liquor Prohibition Bill a ni emaw, zu chungchang Mizoram in a lo kalpui tawhna ah hian Autonomous Council-te a zuar zawng a ni emaw ,a zuar lo zawng a ni emaw pawhin an lo huam tel tir ngai lova. Amaherawhchu, vawiin a kalphung-thar sorkar ah chuan huam tir tum a lo ni ta a. ‘Zu kan khap zawk dawn alawm Autonomous Council ah’ tih te kha a ni a.

Chutih mek lai chuan, vawiina Excise Department kan enkawl dan te, Lawngtlai district ah sawn tunah ‘Excise sipai’ kan tih hoa hi an vaiin 6 an awm a ni. Chu chuan Sangau te, Bualpui te, Bungtlang te, Diltlang te, Chawngte P te, Lawngpui Guard te mihring nuai khat chuang awmna ah parukin an enkawl a ni a. Chutah chuan, he dan a hi lo pass-in, zui prohibition hi na takin kan kalpui dawn a ni tih kha kan Minister zahawm tak khan a sawi a. Kan tan chuan

a vanduaithlak hle in ka ring a. Achhan chu, he laiah hian ka sawi thin a, District Headquarters a ni ve a, LESDE Department staff pakhat chu pawh MR employee a ni. Chu chu sorkar hmasa ah a ni emaw, tun sawrkar tharah pawh nise, session a awm apiangin zawhna ka lo zawt ve thin a; chutianga enkawl chu a ni a.

Chuvangin Autonomous Council te chuan he Dan a hi tha an tia an duh a nih chuan, adopt ve mai sela, insiam ve mai sela, anmahni in zuar ve mai sela. Nichina kan hmaa thusawitu sawi ang khan, Dan ah inziak chiah lo mah sela, lo kalpui tawh thin dan conventional a awm a, he lai Mizoram, vawiinah pawh 9<sup>th</sup> Mizoram Legislative Assembly a niha, State kan nih hnuah pawh. Chu mai chu nilo, Union Territory kan nih lai atang pawhin he dan hian Autonomous Councils a huam ngai lo a ni. Chu mai piah lamah chuan Tipa bialtu in a rawn sawi tak ang khan thil inkawkalh deuh mai awm tura chu, 6<sup>th</sup> Schedule para 10, sub-clause 2(d)-ah khan Trade License te kha District Council pek tur, District Council thuneihna liau liau a ni a, kha kha inzen pawlh theih chi pawh a ni lo a. Tunah hian, ‘zu’ kan tih wine emaw, beer emaw pawh a dawr an siam a lo ngai dawn a. Kha mite dawr siam tur khan District Council te kan va enforce mai dawn em ni? Heta tangin permit kan pe ang a, chu kan permit hmang chuan District Councils-ah zuar dawn ta ila, ‘hetiang beer te, wine te zawrh em chu kan District Council Area-ah kan remti lo e’ lo ti ta sela, harsatna kha a awm thei dawn a ni.

Tin, para 10, (sub-para 3) clause 2(j) ah khan Social Custom chungchangah kan hmu a, Tipa bialtu pawh khan a sawi a. Tin, hei, Pu Rasik-a kan zingah a awm a, kan Chakma unaute chuan anmahni local product ‘Duichuani’ kan tih ang chi te pawh zalen takin an hmang mai a. Eng emaw lai khan Chawngte-ah tute emaw inti eng emaw deuh ho khan khang kha anmahni social-custom ngaihtuahna nei lovin a then an man a, a then man sak loa ti kual vel khan harsatna an siam sak a. Tin, April ni 13-14 hi an kutpui ‘Biju’ a ni a, keiniin ‘Christmas’ an tih anga an kut ropui a ni. Chungah chuan, sa leh ei tur, zu nen khatiang khan intihhlim nan hun an hmang ve thin a ni. Kha kha anmahni social custom-a bet flat thil a ni ve a. He zu--khapna dan a hi Autonomous Council-ah lo rin lut ta ang ni ila, khangah te khan harsatna tam tak a awm thei ang a.

Tin, tam takin (ka tawng an huatthu ni lo sela,) eizawna a tan, chhungkaw din nan, in leh lo sak nan, an fate school kal nana hmang te pawh an awm ve a ni. Anni hi Buddhist sakhaw bia anni a, kristian anni lo va. Chuvangin, Pu Dy. Speaker, he amendment section 1, sub-section 2-a Autonomous Council huam tir loh hi a tha zawk ang em le? District Councils te hei leh chen an lo kal tawh a. Hei hi political platform-ah pawh ka sawi tho a, Mizoram-a awm kan ni a; chutah chuan, Mizoram sorkar lo piang tawhah hian kan aiawh a ADC Area atang hian MLA kan thlan tlin ten office, Minister office emaw, i thutna Speaker thutphah emaw pawh kha an luah tawh thin a ni. Amaherawhchu, vawiin niah hian minister-nihna pawh min pe phal lovin wine leh beer hi min rawn barh lui dawn em ni? Hei hi kan tan chuan a vanduaithlak khawpin ka hria. Chumi avang chuan, Pu Dy. Speaker, helai amendment section 1, sub-section 2-a ‘provided that power of provision...’ tih, hemi chapter hi chu tih telh loh hram ni sela a tha lawm maw ni le?

A pahnihna ah chuan, nichin khan Hrangturzo bialtu khan dignitaries leh foreigner ho te kha ‘2019 dana awm tawh sa’ a ti a ni. Chuvang chuan, vawiinniah hian amendment portion-ah a rawn lut a, 45(a)-ah khan amendment turin rawn dah chhuah a ni. 2019 ah a thar an siamah khan tuna total prohibition-a kan luhna, Pu Beia, Siaha bialtu in a sawi, dan thar an siamnaah khan a awm tawh lo a ni. Engpawh ni sela, khalai kha kan sawi duh a ni a.

Pu Dy. Speaker, a sawitu apiangin, i dinglam a thuho pawhin Mizoram-a zu zalen zia, a changtu minister ngei pawhin a hria a. He kalphung-thar sorkar, Pathian Lal ram din tura insawite bulah hian zu a zalen zia te, hotel-ah te, restaurant-ah te, lammual thleng pawhin, vawiin ni a dan hmasaa kan telh tawh, tuna kan rawn telh leh tak loh ‘zufang’ a zalen zia te leh, Dampa bialtu ngei pawhin helai House property atan a rawn dah luh tak, zalen tak maia a awm thu te pawh kan ngaithla a. He sorkar fail lutuk, Excise & Narcotic Department fail lutuka hi, Total prohibition hnuaiyah ni si, duh zah zah helaiyah pawh ken luh theih mai, 35% alcohol content a la ni zui leh nghal a; whisky hi 45% a ni an ti a. Chutiang zalen taka awmna inthuhruk nan chuan, ‘kan ti ta mai dawn em ni’ tih laia hi Pu Dy. Speaker, ka’n sawi duh a ni.

A tawpna a tan chuan, kan Minister zahawm tak khan ‘saltangte zalenna tur a ni’, a ti a; sal tanna nasa zawk min pe dawn a ni lo maw? Wine 10% alcohol-a kha zalen taka miin a in chuan a rui ang, lu a hai ang. Tin, beer 5% emaw, 4% emaw a ti a, beer definition chu ka hriat dan chuan, 5 - 25% alcohol a awm a ni; chutiang chu a ni a. Tin, thenkhat ‘Kana khuaah pawh Lal Isuan a tipung alawm maw le’ tite pawh kan awm a, kha kha chu dawidim telh lo a ni. Vawiinnia kan siam tur hi chu dawidim telh a ni tlat mai a.

Pu Dy. Speaker, khawngaih takin, he Dan hi no. 1 ah chuan - Autonomous Council hei leh chen Mizoram 9<sup>th</sup> Legislative Assembly kan lo kal tawhnaah PC pawh a lo sorkar tawh, MNF pawh a lo sorkar tawh, Congress pawh a lo sorkar tawh; helai House-ah hian hetiang thilah hian MADC huam tir a ni lo a. Vawiinnia kan sawi nawn leh duh chu – Minister nihna pawh min pe phal si lovin a beer leh wine zawrhna min barh luih a tum hi chu a fuh lovin ka hria a, ti lo hram se kan duh a. Tin, he bill hi kei pawhin pass lo ila tha ka ti a ni, Pu Dy. Speaker. Ka lawm e.

**DEPUTY SPEAKER:** Pakhat ve ve kan ti a. tunah Pu B. Lalchhanzova, Minister zahawm tak ilo sawm ang u.

**PU B. LALCHHANZOVA, MINISTER:** Pu Dy. Speaker, ka lawm e. Vawiina “The Mizoram Liquor Prohibition (Amendment) Bill, 2025” sawihonaa ka tel ve hi ka lawm khawp mai a. Excise Minister Pu Lalnghinglova Hmar hi ram vei avanga bulbal taka inhria, 2007 vela atanga ram vei avanga lo inzui tawh kan ni a. Vawiinnia Assembly House-a kan thu ve ve thei pawh hi ram vei thu kan lo aupui thin rah te pawh kha a nihna chen a awmin ka ring a. Amah ngei, zu lamah pawh sawi kai lo ber maiina kan ram awm mek dan leh Mizoram kal zelna tur thlir chung a huaisen tak leh amah demna pawh a tam dawn tih chhungkua ang pawhin a ngaihtuah viauin ka ring. A nu leh pa, nupui fanaute thleng pawhin a ngaihtuahin ka ring a. Kan ram kal zelna tur atana thil pawimawh bul tanna bill a rawn pu lut hi fakawm ka ti a. Kan ram tan thil tha kan ti dawn a nih chuan fai pial bik nih hi a theih bik lo a. Mi sawisel hlauh lutuk te pawh hi a theih loh. I veilama mite thusawi tam tak hi ka lo record a, ka react vek lo mai ang a.

Pu Dy. Speaker, amaherawh chu, ka hma lawka thusawi Pu Nguna, Lawngtlai West bialtu MLA-in ‘ADC ten tuan leh mang atangin zu khapna dan rimra hrim hrim hi kan hre lo’, ti ang zawng khan a sawi a. A zalen tihna a ni mai a, eng emaw zawng tak chuan. In hnam nunphung han ti ila, ADC lama kan unaute’n zu an enliam mai mai theih avangin an thalaite nun pawh ruihtheih thilah an ngaihtuahawm lo zawk daih. Saw lama in tihthat te he lamah au ve zawk ta che u, tih kha ka ngaihdan a ni.

Vawiinah hian, ‘The Mizoram Liquor (Prohibition) Amendment Bill, 2025’-a ‘prohibition’ tih hi, ‘Phalrai’ tihna a ni reng reng em maw ni le, Pu Dy. Speaker. Engatinge zu-zalenna tur anga kan han translate tlat le; dictionary te hi an enfiah thiam lo nge ni. Mizoram-a zu a zalen viau te, a ruite hrem dan mumal awm lo te pawh hi ‘awmze nei zawkin i kalpui teh ang u’, tih lam hi kan Excise Minister-ina a rawn ngaih pawimawh kha niin ka hria a.

Tin, Bible thute pawh a thenin an han quote a, tumah inkhap theih chu a ni miah lova. Pu Rintluanga, Dampa bialtu pawhin kan Leader hi a ngam viau thin a. Chapchar Kut ni ah kan Chief Minister-in Bible a quote te, ‘a chang a lo pe sual palh deuh’ tih te, eng emaw zawngin a rawn sawi a. Bible-a la awm ngai reng reng lo, Habaka te pawh a rawn refer ve tho a, kan hriat dan hi a ril vak lo hlawm a ni. A Bible tih leh Mizote Bible hi a inang lo nge ni, te ka’n ti deuh a. Midang kan sawisel hian mahni lam pawh hi kan lo chuti teh lua lo ve fo a nia.

Vawiina kan sawi dan uluk deuhin ka lo ngaithla a, sawi ve ngei pawh ka duh a; hetiang bill pawimawh han sawi ve hrim hrim kha record ah pawh ka duh a. A sawitu, he bill oppose tute khan a thluk lam an buaipui hlein ka hria a. Thil nihna dik tak pehhelin, keini ZPM Legislature party ten he bill kan review hian, ‘zu’ tih hi kan sawi ri ngai lo. Vawiina kan rawn dinpui hi zu-kaihhnawih ni ah kan ngai lo a ni. Zoram kuthnathawktute’n an thlathar awmze nei zawk, tha zawka dan hnuai a an dehral theih dan tur hi kan thil lung min luahtu ber a ni. Kan thlai zawng zawng kha zu ah, bear ah, wine-ah kan ti ang, kan ti lo. Thil tam takah tha takin a siam theih a ni.

Tin, party-a kan unaute congress-in zu an thlah zalen a, ‘congress-in zu a zuar’ tih pawh hi kei chu ka sawi duh ngai lo a ni. Tute’n emaw congress an beih vak vak lai pawh khan, ‘congress-in zu a zuar ti kher suh u; an hun laia tha ber turin kan ram tan ro an rel a ni mai’, ti hian ka sawi lui ngar ngar thin. Amaherawhchu, khalai a pawi ta chu, an tih lai thil kal tawha experience ka’n share duh mai mai chu, khata tanga tax lo lut tur it lutuk avang khan quarter-bottle te, half-bottle te awm mang lovin, full-bottle te’n an zuar pawp pawp a, khatah khan zu in lo thei lote an buai phah a ni; chu chu he House zahawm takah hian ka’n tarlang duh hrim hrim.

Chuvang chuan, vawiina ‘The Mizoram Liquor (Prohibition) amendment Bill, 2025’ Excise Minister ina a rawn putluh hi in-principle chuan sorkarah cheng khat mah lo lut lo mahse, he sorkar hian chutiawng zawng chuan a ngaihtuah lo. Kan kut-hnathawktute’n zahawm zawkin an thlatharte an hralh theihna kawng khat a nih beiseina avanga he thil hi ti mai kan ni. Chu chu min lo thlirtu zoram-mipuite hriatah leh he House zahawm takah hian ka sawi duh a. He Bill hi kut-hnathawktute lam hawi a ni tih ngaihtuah miah loin pulut miah lo ta ila, opposition te tan sawisawp tur a awm miah lo ang. Amaherawhchu, kut-hnathawktute tan chuan a beidawnthlak khawp ang.

Pu Dy. Speaker, House ah hetiang hian kan han sawisawp viau tak na a, kar hnih-khat a liam ang a, thil chik mi zoram-mipuite hian he bill hi an support chhoh nasat ka ring tlat a ni. Tin, Pu Dy. Speaker, i veilama mite thusawi ka lo ngaihthlakah khan, in phawk chhah tawk lo a ni; phawk chhah law law ula, ‘state pawn leh ram dang atanga an zu siamte pawh hi phal law law ula’ tih tiat khan. Min nawrna angreng khawp mai, an duh zawk tihna em ni. Keini

chuan kan ram dinhmun awmdan mek leh kan thlen chin te kan ngaihtuahin, kan kut-hnathawktute lam hawi bill hi a tha tawk kan ti a, hei bak hi chu pelh a tul kan ti rih lo a ni.

Tin, ‘wine leh beer’ tih te a dan amendment ah pawh a lo lang a. Zalen taka zuar nuai nuai tur tih lam kha a ni lo hrim hrim a, awmze nei taka kalpui tur a ni a. Kan duh dan takah phei chuan, state-pawna thawn chhuaha, foreign thleng pawh zau zawka thawn chhuah kha kan rilruin a tinzawn chu a ni.

Tin, thil kan sawi danah mipuite kaihruai sual thei pakhat a awmin ka hria a, chu chu ka’n sawilang leh lawk duh a. Zin mite ‘tourist’ kan tih, definition ah pawh Mizoram state-a an rawn kal, an cham rei zawng lam kha a ni vek bik lo. An rawn kal chhan, an behaviour kha ‘tourist’ definition hian a ngaipawimawh khawp mai. Cement work vela rawn inhlawh tur kha ‘tourist’ an nih kher ka ring lo, an behaviour, an rawn kal chhan lam kha a pawimawh zawk. Chung te pawh chu thudik mipuite hian hria se ka duh a ni.

Pu Dy. Speaker, a tawp lamah chuan, Mizo thalaite ka chah duh chu - He hnam hi, engatinge zu sawi hleka tluchhe mai tur, vawn ban pawh nei lo, insum thei lo anga kan inchhuah reng mai hi le. Kan member zahawm tak Pu TBC-a khan a sawi tawh a, vawiina member eng emaw zatte hi an fate zu tamna hmuna dah an nih ka ring; wine shop an kal pel khan an nghing nghal dup ka ring lo. Zu dawr lo inhawng tiar tuar a lo awm a nih pawhin Mizo thalaite chuan rilru fim kan pu tur a ni. Khawvel hnam dang zawkte’n an nun ulukin hmalam an pan a, keini chu thil reality (thil tak tak) hmachhawn thei lo turin kan inzirtir nasa lutuk a. Keimahni ah confidence level a bo zo a, he House zahawm taka memberte paw’n mizo thalaite chu zu leh saa insum thei lo hmuhin min hmu a. Hman niah Lawngtlai West, Pu Nguna bialah programme neiin ka va kal ve a, Pu Dy. Speaker, a pawilo turah ngai ila. Khaw pakhat kan kalnaah chuan, ‘Mizoram-a Duichuani that berna kan ni’ an ti a. Amaherawhchu, an thalaite ruihhlo ah an buai ve miah lo.

Chuvang chuan, vawiina he House zahawm taka “The Mizoram Liquor (Prohibition) Amendment Bill, 2025,” kan Excise Minister-in huaisen taka kan hnam kal zelna tur ngaihtuaha, (Pathian rawngbawltu a ni a, fim tak leh tawngtai chungin a inhlam nasa ngawtin ka ring) kan hnam tan tha zawk dawna a hriat avanga a rawn put luh bill hi ka thlawp e. Ka lawm e.

**DEPUTY SPEAKER:** Kan Opp. Leader-in sawi duh a nei em? A neih chuan, sawi turin lo sawm ila.

**PU LALCHHANDAMA RALTE, OPP. LEADER:** Pu Dy. Speaker, ka lawm e. Vawiinah “The Mizoram Liquor (Prohibition) Amendment Bill, 2025,” sawiho a nih leh, a bul tan tirh atanga presentation, a changtu Minister-in a siam lai khan uluk takin ka’n ngaithla a. Kan uar duh lam, ‘kut-hnathawktute hamthatna tur lam hawi a ni’ tih kha, kut-hnathawktute chhuanlama kan duhna lamah chuan hmathehah kan hmang a, a phena ‘department-in zu an zuar dawn’ tih kha a sawi leh duh si lova.

Chuvang chuan, bul tan tirh, a presentation atanga bias sa niin ka hria a. He House-ah hian information dik tawk lo hmangin Zoram-mipui te hnenah he zu-zawrhna bill kan pass tura an rawn chhawpah hian, an hmaiphah fai an tumna lai kha Chiang taka hlim lan hi i veilama mite hian kan tih ngei ngei a ngai a ni. A dik tak chuan he bill hi tum

hnih House-ah a lo luhna a ni a; tlanche pahin a hmasa-ah bill an rawn submit a. Dt. 4.3.2025-a sawiho tura list thlap tawh kha bawhchhiain kalphung pangngai lova ruahmanna awm avangin, vawiiina kan House kalphung tur BAC in a rel ang pawha kal thei lova kan awmna chhan hi, tlanche paha he bill hi kan House-ah rawn luhpui anih vang a ni... (*Speaker at the Chair*)

A tira an han ziah hmasakah chuan zu chi hrang hrang - tuitling te, zupui te nen lam, zu-zawrhna tur tak tak kha a rawn awm a. Amaherawhchu, khawi atangin emaw a lo leak-out avangin kohhran hruaitute'n kan CM leh Excise Minister pawh an hmuh thu an rawn sawi a. Chuvang chuan, a bill bak lengin an siam tha a. Chutih laiin kan House-a Member, Pu Speaker, i dinglama mite'n, 'Hetiangah hian ram hruaitute'n tumah rawn an ngai lo; kohhran emaw, khawtlang emaw pawh rawn an ngai lo, ram tana tha chu kan ti mai ang,' an tih lai hian, an va inthural si lo ve? Keini i veilama mite hi chuan ram tan, hnam tan hna kan thawhnaah hian kohhran te, NGO te thurawn hi a pawimawh kan ti a ni.

A dawta kan sawi leh duh chu, kan unaute, a bik takin ADC area a awmte'n, Pu Speaker, 'he Section 2(2)-a District Council te min huam hi chu a fuh lo mang e' an tih kha, Sixth Scheduled to the Constitution of India kan House-a kan lo practice rei tak tawh, kum 50 chuangah hian kan District council-te kan zahderna te, an zahawmna humna atan kan tih thina kha an sawina a ni. Chu chu vawiiinah hian kan han pawngsual sak hi, inhmuhsitna chi khat niin ka hria a, a paw ka ti khawp mai a. State kan ni a, kan ti thei a ni mai thei. Amaherawhchu, an aiawh a rawn thute'n, "Hei hi chu min paih sak hram teh u," an tih chu thutaka lak hi a tha ka tihpui khawp mai.

Tin, kan Minister hian nakinah min han chhhang ang a; zawh duh kan neih chu, tuna kan amendment section thenkhata zu kan zawrhna tur hian 'social impact engnge a neih dawn' tih te hi kan zir chiang lawk em? Tin, mihring hriselna a nghawng theih dan tur leh kan ram thalaite leh chhengkaw tam takah, ruihhlo zalen avanga chhengkaw buai turte, nunna pawh tawi awm thei tur te hi an ngaihtuah lawk em?

Tin, nichinah khan Member thenkhat khan an rawn sawi a, he danah hian hmuh kan leh hmuh kan loh kan nei a ni. A dik tak chuan, kut-hnathawktute hamthatna tur chu kan duhpui vek. Memberte'n an sawi ang khan, "a zu zawnga siamsak ni lo hian a dry form te, a slice, a chips te, a powder te, a theitui ang te pawh hian a tih theih lawm ni? Engatinge beer-ah hian in tih hmasak" an tih pawh kha, thahnem ngaihna avanga an sawi a ni. 'Kan do e; kan do lo e' kan tihna lam a ni lo. Helaiyah hian 'zu zawrh thlah zalen duhna lian tak a awm' tih hi section 4(4b) ah khan zu zawrhna tur departmental store siam tur chungchang a rawn lang a. Section 20(45a) ah khan 'Grant of special permit to dignitaries of foreign and domestic and tourist' tih a lo inziak a, "to allow them to bring liquor into Mizoram or purchase liquor from Excise & Narcotics Department during their stay in Mizoram," tih a ni. Foreign dignitaries te India ram chhung emaw hmun danga mi domestic a mite, khualzinte'n zalen takin an duhtawka zu an rawn ken luh theih laia, 'Excise & Narcotics Department-ah an lei thei ang' tih awm hi, hei tluka zu zuar tih hi a awm chuang em ni? Department-in a zuar dawn tih chiang takin a awm a, engatinge inhmuh loh theih? Dry-day te inpuan kha chuan, 'zu in zuar a ni' tih in admit zia inti lang a ni lawm ni?

A dawt lehah chuan, 'tourist' kan tih kha, hei kan Tourism Minister pawh a awm a. 'Tourist' kan tih pawh hi, 'eng chen nge' tih hriat a ngai a ni. Hrilhfiahna thenkhatah phei chuan Aizawl-

pa hi Lawngtlai-ah zan hnih-thum va riak se, ‘tourist’ a ni; Phawngpui tlanga a kal dawn paw’n ‘tourist’ a ni thei tlat. Chuvang chuan, Excise Department hian district zawng zawngah an zuar ang a, a duh duhin kan lei hut hut dawn em mi? Zu chak deuh apiangin khaw thenawmah va riak chhuak ila, tourist kan ni mai dawn em? Helai definition hi chiang takin kan Minister hian min hrilh thei se ka duh a ni.

A dawt lehah chuan, ‘Special permit to Form D-MLPA 1 shall be issued to the applicant after payment of fees as may be notified by the Government from time to time’ tih hi, special permit an pek tur, chumi hnuaiyah chuan damloh thil te pawh a awm ang, red-card an pe dawn a. Kha red-card dam rei zawng emaw, red-card holder khan um a lei theih zat tur pawh a awm reng reng lova. Khalai te kha engtin nge an tih dawn? Red card hi rin aia hrisel pui-pui hian kan nei leh teuh mai lo ang maw? Kan sorkar hian zu in zuar dawn chiang tih hi pawm rawh u. Ram rorelnaa Pathian lal ram thlen tir tum, din tumtute hian zu lei theiha in siam hian Pathian lal ram in thlen tir in inring em?

A dawt lehah chuan, Sub Section 45B, 1&2 ah khan, “A holder of permit red card shall not drink liquor at public place” – public place-ah in phal loh an ti a, chumi piahah chuan hotel-ah te, tunlaiyah chuan home-stay a tam tawh a. Mikhual mi inah tamtak an thleng a, room an la a, chungah chuan an in dawn em, tih kha kan Minister hian min hrilhfiah tel ka beisei bawk a. Tin, Section 2, clause (q)-a ah khan, wine leh local beer purchase leh consume te chu ‘permit a ngai’ an ti a. Engatinge, ‘zu a ni lo’ kan tih na na na chuan, theitui te pawh permit a ngai hlei nem maw le; zalen takin a duh apiangin zuar mai rawh se. Zu ni lo na na na chu phal zalen ang u; kut-hnathawktute’n an hralh tam kha in duh a ni lawm ni? ‘Zu a ni lo’ in ti si a, khalai kha kan zawt tel pah duh a.

Section 2 clause Q(b)-ah khan, local fruit beer siam dan turah theirah/fruit, stem or grain product te kha an han siam a, chungho atan tho chuan a um-tawihna yeast (chawl) hman an phal a. Chu chang ni lovin, liquid B, E, D, C kan tih ‘bi-i’ kan tih te pawh hi vawiina khawi khawi lai emawa zu-umna tho, khawchhak lam atanga lo kal tam tak te pawh hi ‘an phal vek’ tih a lang ta a ni. Henghoin kan fruit beer etc. te uma duh ang tawka an tih hian, kan hriselna hian engang takin nge a nghawng dawn? Chu chu ni nichina ka sawi - kan Minister hian social impact tur ngaihtuahin he bill hi a rawn pulut em, tih ka sawina a ni.

A dawt lehah chuan, (Pu Speaker, ka zo tep tawh a nia) Section 45(i) sub section 1-ah khan, ‘any wine or local fruit beer produced in Mizoram shall used approved label which shall be registered by the Commissioner’ a ti a. An beer siam tur reng reng kawrah khan “Drinking of liquor is injurious to health” – “Zu in hi hriselna atan a thalo” tih kha ziaha tar tur an ti a. “Cigarette smoking is injurious to health” kan tih chu, tobacco-sikret a hrisel lo tih hre chung siin khatiang tar tura tih kan tar kulh kha chuan, zu kan zuar dawn a ni; ‘Mahni mawng kan hlim sang kung-kung a ni lo maw?’ ka ti a ni.

A dawt lehah chuan, ‘zu kan zuar dawn lo’ ti sia, chi hrang hrang Mizoram economy siam thatna atan te; ‘a tax kan beisei lo’ te kan ti a, Pu Speaker, kan sorkar hian a stance dik tak hi sawi ngam se. Vawiinah hian Thupuan 3:15 leh 16 kha Pu Speaker, tawite han chhiar ka duh a - “I thil tihte ka hria, i vawh hek lova, i lum hek loh hi, i vawh emaw, i lum emaw ka duh a ni. Chutichuan, lum si lova, vawt si lova i lum chang chang avangin, ka ka ata ka chhak chhuak dawn che” a ti. He sorkar, a thinlung chiang tak lang theiah chuan, zu zawrh duh sorkar a ni. Mahse, a ngam chiah lova, an thawm thang kohhranin an hria a, kohhran

hotu thenkhat kan Chief Minister inah an leng a, chumi avang chuan tam tak an paih leh a. Nichinah member thenkhat khan an sawi - kohhran hruaitu thenkhat leng an tiha ka rinte kha ka lo be ve a ni. In hrilh dan hi in hrilh famkim lo; chu chu engnge, kan tih chuan, ‘helaiah zu-tuitling tih leh eng emaw te kan paih ang a, chuti khati’ in tih piah lamah khan, section 4, sub-section 4 (b) vela zu zawrhna ang, Excise Department atanga lak tur ang chi te kha 2019-a kan hmanlai zu-khap burna Dan-ah hian a awm sa angin kohhran in hrilh niin ka hria a ni. Kan kohhran hruaitute hian dana awmsa angah an lo ngai deuh khawpin in hrilh; thudik lo in hrilh a ni.

Pu Speaker, kan kohhran hruaitute hian engtik lai mahin zu zawrh hi an phal lo; zalen taka department-in zu a zuar tur hi na an ti ngawih-ngawih a ni. Vawiin hian kan kohhran te (**Speaker:** minute 3-in i pel ta a, i zo dawn hnai theih chuan...) Aw, ka zo tep e, Pu Speaker. Kan kohhran te kawra hmanga, ‘kohhran pawmpui’ tih anga kan sawi te hi a zahthlak ka ti. Ka rilrua lian deuha lo awm chu, nakin lawkah hian, ‘beer leh wine te hi zu a ni lo; kohhrante nen pawh kan sawi tlang tawh tih hi, ka sawi a ni lo, Opp. Leader sawi a ni’ an tih leh ka hlau a ni. Chuti tak chuan kan thusawi tawhah kan ding lo a, inthlan hmaah ‘zu kan zuar dawn lo’ tia mipui hnena tiamtute khan zu in zawrhna tur he Dan tharah hian inbelh bawksi a, kohhran hnenah, ‘kan zuar dawn lo’ in ti bawksi a. Vawiinah hian, ‘I lum leh lum la, i vawh leh vawt rawh’ kan ti mai a ni. (**Pu Lalmuanpuia Punte:** Pu Speaker, inthlan hmaah tuin nge ‘zu kan zuar dawn lo’ ti?) House Leader hian a ti; a record, a video clip pawh kan nei e. (**Pu Lalmuanpuia Punte:** Engtik kum inthlan dawnah nge? Sawi Chiang rawh se.) A kum ka sawi lo; inthlan hmian kan ti. (**Pu Lalmuanpuia Punte:** Tun inthlan dawnah an sawi lo ang) Inthlan dawnah kan ti. (**Pu Lalmuanpuia Punte:** Dawta in puh hi chin loh tur.) Dawt kan sawi lo a, a document pawh kan nei.

**PU LALMUANPUIA PUNTE:** Pu Speaker, dawt an sawi.

**SPEAKER** : Khai le; i sawi zawh tir ang le.

**PU LALCHHANDAMA RALTE, OPP. LEADER:** ‘Inthlan hmian a sawi’ tih hi ka sawi duh a ni.

**PU ROBERT ROMAWIA ROYTE:** Play chhuah phal la, a video kan nei a; play ang u hmiang maw le?

**PU LALMUANPUIA PUNTE:** Engtik kum nge? A background-ah te khan ‘engtik kuma election nge’ tih te kha en rawh u.

**PU LALCHHANDAMA RALTE, OPP. LEADER:** A kum kan sawi lo e; ‘inthlan hmian House Leader-in a sawi e’ kan tih mai kha. (**Speaker:** Ngawi rawh u. khalam kha chu, Opp. Leader khan sawi zo rawh se.)

A tawpna atan chuan, Pu Speaker, Habakuka 2:15 ah (nichin khan kan hotupa khan a lam sual a, ka’n lam that sak ngat tawh ang e) “A thenawm hnena zu in tur petu chu a chung a pik e” tih te, Daniela 5:25-ah, “Mene mene tekkel upharsin; bukin i awm a, i tling zo ta lo” tih te kha, he sorkar hian reiloteah a hmachhawn ngei ka ring. Eng vang nge? Zu a zawrh

avang hian. Kan ram, kan hnam, kan sakhuana khawih-buai thei zu zawrh a nih avangin, Pu Speaker, keini ho chuan pass-pui chi ah kan ngai lo a ni.

**PU LALMUANPUIA PUNTE:** Pu Speaker, ‘zu-khaptu pawh kum 5-ah chuan an tla tawp mai a nih hi’, tih ka’n sawi ve a ni e. Pu Speaker, ka lawm e.

**SPEAKER** : A lawmawm e. Dar 5:00 PM a lo kawh ta a, Budget discussion kha kan la hmabak a ni a; kan House Leader leh a bill neitute pawh kan la sawm dawn a. Hetah zanriah ei ta ila, zanriah ei zawhah chhonzawm leh tha kan ti em? Budget discussion kha kan la hmabak a. Dar 6:00 PM vela ei turin kan ti mai dawn em ni ang?

**DR. K. BEICHHUA:** Pu Speaker, naktukah lamah sawi zawm mai ta ila, rilru fresh deuhin. Tuna bill kan sawi zawh hi chuan duhtawk mai ila kan dam tlang ber ang a.

**SPEAKER** : Engnge kan ngaihndan le?

**PU VANLALHLANA, MINISTER:** I thu ber a, practice-ah chuan, Pu Speaker. Ka hriat danah chuan dar 4:00 PM hnu hian agenda dang hi kan la ngai vak lova. Tichuan, tunah discussion kan nei a, dar 4:00 PM a pel tawh a, practise-ah chuan agenda thar la lo tur chu kan ni mai thei.

**SPEAKER** : LOB-ah khan a awm si avang khan member te han rawn a tul a. Vawiin atan chuan hei hi duh tawk ila kan ti anih pawhin, House-in tha kan tih tlan kha a pawimawh a. Anih le; he liquor prohibition amendment bill hi kan sawi zo ang a, chuan Budget General Discussion chu naktuk lamah kan ti mai a ni ang chu maw? Awle, a lawmawm e. Tunah kan House Leader ilo sawm ang.

**PU LALDUHOMA, CHIEF MINISTER:** Pu Speaker, thil han sawifiah ngai deuh te pawh kha awm nualin a lang a. Tun tum inthlan dawn khan ZPM party hian kan manifesto turte kan duang a, a duangtu - drafting committee te pawh kan din a, zu chungchang hi kan sawi a. ‘Zu chungchangah hi chuan i silent ang u’ kan ti a ni; chu chu kan rel dan a ni a. Miin min zawh pawhin, “helaiah hi chuan thutlukna kan nei lo; nakinah study team te la dina, mipui ngaihndan te lak khawma, kan zavaia ngaihtuah tlan chiah kan ngai a. Party malin decision lo siamna chi ah kan ngailo, tiin kan chhang zel dawn nia” tih kha kan inzirtir dan a ni a. Tuna kan han sawi vel kha, engtik lai kum nge tih kha hriatchian te pawh a tha viauin ka hria.

Dampa Sanctuary bialtu member zahawm tak khan. (Sanctuary kha a tel a ni lawm ni, a bialah khan?) Dan loa siam zu bur 2 ngawt mai House chhunga a rawn pai lut te kha a va tha lo em ve aw, ka ti a. House chhungah khawilaia mi nge a rawn pai luh kha; Dan loa siam lehngal. MLA te tih atan chuan a tha lem lo mang e kan ti deuh a.

**PU LALRINTLUANGA SAILO:** Pu Speaker, *Point of Order* - khatiang kha, nichina ka sawi ang khan departmental store tinah hian hmuh tur a awm a, kan House Leader zahawm tak an chenna veng Chawlhmun-ah pawh lei tur a awm a; hmun tinah a awm a, a zalen em em a. Tun ni 7, Chapchar Kut Lammual-a kan hmanna ah pawh an zuar ngei a; ‘Lammual ah a awm’ an tih avangin ka lei tir a, vawiinah House-ah information atan ka rawn hawn hi a ni. Tin, Dan lo a nih chuan, kohhran ho pawh hian zufang pawh kha an

phal lo a, kan House Leader hian tui ti tak khan a in niin ka hria. Khang te kha Dan zel em ni dawn; tunah hian prohibition kan la hlip si lo a?

**SPEAKER** : Aw le, i ngaithla chhonzawm ang u aw.

**PU LALDUHOMA, CHIEF MINISTER:** Pu Speaker, video call chungchang pawh kha a han sawi a, kha kha sawifiah lawk ngai ka ti a. Kan ram tan kan phak tawkin theih ang angin hma kan la ve a, kan ramah remna leh muanna a awm theih nan te kawng dik zawk nia kan hriat kan zawh a. Tute'n emaw Parliament-ah Petition Committee-ah min hek a, MP ka nihna atanga paih ka ni a; ZPM Party atangin thlan tlin ka ni a, MLA 12 rualin min hek leh a, 'a-ZPM lutuk em mai; a kalnaah te ZPM tan a campaign a', tih kha min hekna chu a ni a; tichuan, paih ka ni leh a, mahse Pathian leh kan bial mipuite zarah wawiin thleng hian kan ram politic ah kan la tel thei ve a.

Tichuan, sorkarna te kan lo form ve ta hial a, sorkarna kan form tirh khan a mimal taka min tihchhiat tum tute hian min bei zui nghal a, organised plan a awm a ni. Zan reiah video call a lo kal a; zan reiah chuan chhiat tawh thil te pawh a nih hlauin kan la lo thei lova. Mahse, khatiang video call kha a lo ni thin a, ka block nghal zel a. A dang a lo kal leh a, zankhatah pawh phone number hrang hrangin min rawn ti a ni. Chu chuan eng emaw chen kha min tibuai a ni. A tirah chuan ka'n block zel ang a, a tawp mai ang chu ka ti a; khawilam number zozai nge an neih pawh ka hre lo. Kha kha tute emaw nula mal pahnih-khat ringawt tih a ni thei lo reng reng; a phenah khan phiar-rutute an awm a, chumite chuan hmanrua ah an hmang tih ka chiang em em a ni. Chutiang chuan pre-plan fel tak neiin mi tihchhiat tumin min bei a, mipui hmaa ka sawichhuah hnuah a reh chauh a ni.

Vawiina ka han sawi duh chu, kan rorel lai te hi Hnahtial atangin Upa Rohnuna'n a lo thlir ve a, he Pathian thu hi min rawn thawn a ni - Genesis 49:23-24: "Thal kap ho chuan a ni chu nasa takin an ti rethei a, an kap a, an ti duhdah a. Nimahsela, a ni thal ngul chu khauh takin a awm reng a" tih hi. ZPM party leh a sorkar hi kan tlinglo chung chung a Pathianin a hmanruaa min hman duh chhung chuan, a nghing ngai lovang.

Aw le, kan subject-ah lut ila. 2008-ah MNF sorkarin Wine Rules a siam tih kan hria a. Sawiselna awm lem lovin sacramental-wine ah te hial hman a lo ni chho a, wawiin hi a kum 17-na a ni tawh a ni. Kum 17 chhung lo awm tawh, MNF sorkarin wine a lo zawrh kha, wawiinah hian a siamtute ngei leh a sorkarna chelh thin tu party te ngei khan an rawn duhlo thar thut ta mai hi, hei baka lem channa hi a awm chuang dawn a maw ni le. 'Zan thum lai ka mu lo' ti tawh lah bo lo; chuti chung a MNF party-a la awm tlat si kha a ngaihna ka hre lo a ni. Wine zawrhna dan kum 17 zet liam tawha lo siamtute ngei khan 'wine hi zu a ni' an ti dawn anih chuan, Pu Speaker, i vei lama mite khan zu an lo zuar ngar-ngar tihna a ni. Kha leh chen lo zuar tawh khan mi sawisel theihna right an nei lo ang. Chuvang chuan, tunhma zawng zawng inhnialna atana kan hman loh, dan pawh lo awm tawh, a chingtu an awm a, a siamtu an awm a, keini pawhin kan sawisel bik lova. Engatinge kum kha leh chena lo awm tawh wine kha heti teh chiama thil sual lo awm thar ta anga kan sawi tak? Hei hi hriat thiam a har a, mipui kan play mah mah ka ti a ni.....

**PU LALCHHANDAMA RALTE, OPP. LEADER:** Pu Speaker, *Point of clarification* - MNF sorkarin grape wine a siamtir khan chawl emaw, bi-i etc emaw pawlh kha kan ti lo a ni,

ama grape tui ringawt kha kan ti a; kha kha a ni a. Tuna mi kan duh lohna chhan hi chu – chawl te leh bi-i ang chi phalna a awm avang khan kan duhlo a ni.

**PU LALDUHOMA, CHIEF MINISTER:** Pu Speaker, kha wine rules ah khan alcohol content tur a awm sa a, prescribe a ni. A zat tur chiah chu ka hre lova, a Minister concern-in a rawn sawi fiah thei turah ka ngai a. Hemi ‘fruit beer’ kan tih pheih hi chu khami aia tlem leh zual tur kha a ni a, Kohhran hian 10% aia sanglo kha nise an duh a, chu chu pelh kan tum lo a ni.

Tichuan, 2019-ah MLP Act MNF sorkar bawkin a siam leh a, a tir takah chuan kha Act ah khan Mizo zu pawh an telh a ni, ‘zupui’ kan tih ang chi kha, ve tho a na. Tichuan ti tak tak tha ngam si lovin, kum 4 chhung rules awm lovin min kalpui a. Heti chen chen Act ringawt mai ringa han kal chu thil mak tak a ni a. Tichuan, chumi kal zelah chuan ZPM kan lo sorkar a, tunah hian kan chhonzawm ve a ni mai a. Wine kha a hranpain kan siamthar dawn a ni lova, kan zuar thar dawn a ni bawk lova, a awm sa kha kan chhun zawm dawn a ni. Chu mai chu a ni a, han inpuh teh chiam tur pawh kan awm lo. Amaherawh chu, a tirah chuan ‘zupui, zutuitling leh zufang i telh ang’ kan ti a ni; kan zep lo. Kan tihna chhan chu, damdawi-in khuma tam ber hi zu thalo in avangin damlo ten tunah hian an luah mek a ni.

Tin, kan medical re-imburement hi a tam ber hi zu case avanga natna veitute tana kan sen a ni a. tin, thihna tam ber a lo ni chho bawk a. He zu chhia avanga fahrah leh hmeithai kan tam ta lutuk te hi, in lo thei lo an ni si a, zep nak emaw, tu sorkar mahin kan khap hneh bawk si lova. Mizo zu kan pi-pu chena an lo in thin, zufang te, zupui te, zutuitling te kha heng ai-ah hian a lo awm chuan, an nunna kan chhan chhuak thei deuh zawk ang a, ‘kristian chhungkua hi a din theih deuh zawk ang a’, kan ti a ni. Zu in a tihbuai chhungkua, zu chhia-in a tihbuai chhungkua te hian.

A dik tak chuan tun hmaa kan pi-pute hun lai chuan hmeichhiain chhul natna pawh an vei ngai lo tih khawpin an lo fak a. Tin, Mizoram pawnah te kan zin a, Mizoram House-ah te kan thalaite an riak a. Zu tamna hmunah a tlanin an tlan a. Zahthlak khawpin an khawsa a, an in-am a ni, ‘Mizoram ah chuan a vang leh dawn si a’ an ti a. Khangte kha a ni a, a tha lo zawng khan thil tam tak a thlen a.

Tahan-ah ka han kal ve tum chuan an zu dawr ka tlawh ve ngat a ni. Kawng sir lun laiah khian a awm mai a. Nula, tlangval, pitar, putar nilengin inkawm nan an hmang a, Mizo tho anni. An lo tihthanna a rei tawh a, an buaipui lo angreng khawp mai a; chutiangte chu kan hmuh a ni a. Chuvang chuan, a sap zu hi chu la khap zui zel ila, Mizo zu tha – zu fang te, zu tuitling te, zu pui te hi siam ve ta sela. Tin, a quality te pawh amah leh amah a in control chho ve zel ang a, supervise-na hnuaiah tha takin ti ila, zu chhe in avanga thihna leh chhungkaw buai tam lutuk hi a nep phah ang a, kan pumpel deuh mahna tih kha kan hotute rilru chu a ni a. Amaherawhchu, kohhran hruaitute nen kan han sawi tlang a, anni chuan ‘zu’ tih hming tel hrim hrim hi chu ti lo hram teh u tiin min ngen a. Chuvang chuan, kohhran ngenna kan ngai pawimawh a, kha kha kan han paih leh ta a ni.

Tichuan, kan Excise Department Commissioner te, Joint Commissioner te pawh hi kan Kohhran-Upa te vek tho anni a. Heng hi rilru fim taka kan ram tana tha ber zawk tur, mi nunna leh an hriselna te kan venhim sak zawk theihna beiseia ngaihtuahna lo kal chho a ni a. Tichuan, tunah chuan, ‘zu’ tih hrim hrim kha a tel ta lo vek a ni.

Tichuan, zawhna ka'n zawh duh chu - Zu zawrh tumah kan inpuh lui tlat a. Pu Speaker, hei hi kan bill hming a ni a, hei hi hian zu zawrh tumna bill a ni em maw ni le? 'Liquor (Prohibition) Amendment Bill' tih a nih hi maw le. A khapna bill a ni; a zawrhna bill a ni lo. Chuvang chuan, a khawi lai section ah hian nge 'in zuar dawn' kan intihlaih tlatna chu a awm, tih hi ka zawhna a ni a. 'In inphal sak dawn a' in ti a, khawilai provision ah hian nge in kan phal sakna chu a awm? He laia kan sawi, tourism te, foreigner teho erawh hi chu tunhma 1995 - Total Prohibition Dan hnuaiyah meuh pawh khan kha special provision kha an lo pe a ni. A chhan chu, tunah pawh '5 Star - 3 Star Hotel kan siam duh' ti te pawhin minrawn dawr ve a, 'zu a tel dawn loh chuan, kan thei lo' an ti zel a ni. Chuvang chuan, tourism te, hotel leh industries lamah te pawh kan lo kal ve dawn chuan, kha mi a huang chhungah khan, 'anmahni room chhungah phalsak ni se' tih hi 1995 ah khan an lo ti daih tawh a ni. A rei tawh.

Tin, in lo thei lo, doctor in certificate a pekte pawh an lo awm a; khatih lai khan kan sawisel reng reng lo. He laiah, 'zu man sa a deh ral dan pawh awm lo ringawt mai pawh hi a tha lo e, a dehral dan te pawh awm se la' kan ti a. Sorkar khan zu a va lei ang a, a zuar chhawng dawn tihna a ni lo. He laia an man sa han tihkeh leh paih emaw ringawt ni lova, khang loh theih loha permit nei ho bik mi-tlemte, chu mite chuan anrawn lei duh a nih chuan, 'chuta tang chuan lei rawh se' tih chauh a ni a. Kha kha zu-zuara han inpuh chiam tur a ni lo. Chuti a nih te chuan, engatinge hmanahthe khan kan chiauhiar loh? 1995-ah te khan khapburna hnuaiyah pawh kha kha chu phalsak an lo ni tawh a, kan sawisel lawi si lo a. Vawiina taka sawi pawr tur kan zawng ta chiam hi, engnge ni kan rilru aw, tih kha a ni.

**PU LALCHHANDAMA RALTE, OPP. LEADER:** Pu Speaker, tuna kan Dan amend hi, "The Mizoram Liquor (Prohibition) Amendment Bill, 2019" kha a ni a, kha amendment bill ah khan tuna department-in zu a zawrhna ang chi reng reng kha a awm miah lo a. Chu chu a ni a; tunhma a hlui ni lovin, kan Dan hman laia a awm lo, department-in a zawrhna rawn awm ta hi kan duh lo a ni, tih hi a ni kan sawi.

**PU LALDUHOMA, CHIEF MINISTER:** 1995 Dan a khirh ber lai, 'Total Prohibition' a nih lai pawha khang kha chu a bika an lo dah a ni a, miin damdawi atan te an lo mamawh a, doctor-in phalna an lo pe a; mi tlemte an ni. Khatiang permit nei tura Mutia thlenga kan ngaihtuah kha chu, a dik lo hrim hrim. Kha kha chu Dan a khauh lai ber pawha lo awm tawh kha a nih avangin, 'hei hi chu dah leh a tha e' kan ti a ni mai. Hei hi chu loh theih loh angah kan ngai ve a ni.

Tin, 'Zu' tih tawngkam hrim hrim hi helaiah hian khawilayah nge a awm? A awmna lai hi han la chhuak vek teh u. A khapna lampang sawina vek a ni ang.

**PU LALRINTLUANGA SAILO:** Pu Speaker, phok number 7-na, 45(c) ah te khan canteen-a zawrh phalna te a lan kha.

**PU LALCHHANDAMA RALTE, OPP. LEADER:** Pu Speaker, kan House Leader khan a hre duh a. Section 20, Sub Section 45(a) ah khan 'Grant of special permit to dignitaries of Foreign and Tourists to allow them to bring liquor into Mizoram or purchase liquor from Excise & Narcotics Department during their stay' tih baka zu-zuar, zu-in phalna leh zu-lakluh phalna dang kan la mamawh belh a nih chuan, ka'n zawng leh ang.

**PU LALDUHOMA, CHIEF MINISTER:** Kha kha, 1995-a lo awm tawh, an sawisel phal miah loh tuna an sawisel thar a ni.

**PU LALRINTLUANGA SAILO:** Pu Speaker, khang kha chu 2019 ah kan paih vek tawh alawm.

**PU LALMUANPUIA PUNTE:** Pu Speaker, an paih tawh kha kan amend avangin kan thun leh a ni reng a ni.

**PU LALCHHANDAMA RALTE, OPP. LEADER:** Pu Speaker, Ni e, chutiang chuan sawi mai se. Dan kan amend tur hi 2019 a ni a, amend turah khan a tel lo a. Chuvang chuan, ‘kan ti thar a ni’ ti mai rawh se.

**PU LALDUHOMA, CHIEF MINISTER:** Pu Speaker, thu thar deuh te chu rawn sawi se kan hrethiam, a ngai leh ngai dinpui reng mai hi chu, a hnialhrat thlak deuh mah mah a ni. Heng hotel a rawn thleng tur tourists te, foreign dignitaries kan tih ang chi te, doctor-in certificate a pekte hi kan hnam tibuai tham khawp anni lo reng reng. Chuvang chuan, heng hi chu hmun dangah pawh kal ula, an ti vek ang. India ramah State 6-in kan khap, State 30-in an khap lo. An khapnaah hian kal rawh u; hetiang special provision hi an nei vek ang. Chu chu anih avangin, hei hi 1995-a khap bur lai pawha provision an lo siam a ni a, ‘hei hi chu a tul a ni e’ kan ti a, kan thun leh a ni mai, khalai kha chu. Sawinawn sawinawn ngai tawh lo sela.

Tin, ka sawi tawh ang khan, ‘zu’ tih tawngkam reng reng awma hi he Dan ami hi a khapna leh a hremna lam sawina kaihhnawih a rawn lang ve mai anni hlawm; special provision lai te ah lo kha chuan hmun dangah chutianga in-phalna emaw, a zawrh-phalna emaw a awmlo hrim hrim. Tichuan, keiniina kan han belhchhah taka hi chu, fruit-beer hi a ni mai a, ‘hei hi i belh teh ang u’ kan ti a. Chutah pawh chuan, ‘tualchhunga thar atangin’ tih kher a ni. Tichuan, pawnlam atanga sap-zu rawn lakluh te, pawnlam atanga wine rawn lut te, pawn lam atanga beer rawn lut te pawh he Dan hian a khap vek dawn a ni. A phala chu, tualchhung thei kan thar atanga siam chauh kha a phal tur a ni. Chuvang chuan, a khap-na leh zual dawn tihna a ni.

**PU LALCHHANDAMA RALTE, OPP. LEADER:** Pu Speaker, kan House Leader khan information diklo a dawng nge ni, nichina kan sawi sub-section-ah khan, pawnlama lokal te ken-luh phalna kha a awm a nia; ken-luh phalna kha a awm vek sia.

**PU LALDUHOMA, CHIEF MINISTER:** A va mak e aw! Special provision kan sawi laia a general clause baw a inhnial hi a diklo. Dan reng reng chuan special provision leh general provision a nei a, kan sawi hi general provision a ni. Special provision lai chu kan inhrilhfiah tawh tawh. Chuvangin, khang a special provision - hotel tih leh foreign dignitaries tih lovah kha chuan, pawnlam atanga sap-zu lakluh te a ngaiin kan khap dawn. Wine pawh, beer pawh, tuna an lakluh hi kan khap ang a, tualchhung siam chauh kan phal dawn tihna a ni. Khapna a nasa leh zual dawn.

A dawt lehah chuan, ‘zu’ hi helama tha kan tih loh laia Autonomous District Council-a kan khap tel ve lo hi chu a dik em ni, tih hi kan ngaihdan a ni a. Chuvangin, a rampum hi huap teh se kan ti a. Amarawhchu, ADC area-a kan MLA zahawm takte khan an area-a

zu-khap kha an hlau hle tih kha kan han hmu a. Tin, i veilama member dangte pawh khan an hlauhpu hle a.

**DR. K. BEICHHUA:** Pu Speaker, kan hlau ni lovin, ‘an thuneihna kha anmahnin kengkawh ve mai se’ kan tihna zawk a ni.

**PU LALDUHOMA, CHIEF MINISTER:** Sixth schedule hnuiaia District Council thuneihna hi chu, non-distilled liquor-ah a ni. Zupui ah te, zufang-ah te, zu tuitling ah te, chuta district council thuneihna chu kan chhuh dawn chuang lo; kan chhuh reng reng lo tunah hian. An duh phawt chuan an ti thei. Amarawhchu, sap-zu khap dan awmsa reng sawlaia khap loh area awm reng saw chu a dik bik em ni, tih kha a ni a. Amarawhchu, sawlam area MLA te leh kan opposition MLA tena, ‘anni saw chu exempt rawh u’ an ti viau a nih chuan, sorkar chuan a ngaihtuah tha thein ka ring, kha kha chu; chu chu a ni a. A changa zu haw viau si, khap dawna tau leh si kan ni a.

**PU C. NGUNLIANCHUNGA:** A khap ngawr ngawra kha kan haw lo; khap loh pawhin, zuar pawhin kan ramah saw chuan chutiang takin a zalen chuang lo, kha kha chu. A Dan tunhma leh chen lo kal tawha a huam loh kha chu, ‘min huam tir lo hram rawh u; keimahni tih tihin kan ti ve ang e’ kan ti deuh zawk a ni e.

**PU LALDUHOMA, CHIEF MINISTER:** Tin, sawlai kan han huaptirna chhan ber chu, kan farmer-te kan hmangaih vang a ni. ‘ADC area-a kan kut-hnathawktute sawn lo chhawr tangkai ve teh se, fruit processingte hi lo ti ve seng’ tiin. Kan kut-hnathawktu Autonomous District Council area amite hi kan duhsak em avangin kan huap a ni. Amaherawhchu, a bialtute khan kan kut-hnathawktu an biala mite kha an hmangaih lem loh zia te pawh an rawn tilangin ka hria a, inthlan leh chu a ngaihtuahawm viau mai thei a ni.

Tin, a minimum punishment kha awm miah lo a ni a, Dan hmasaah te khan. Tunah hi chuan zu-sa leh zu-rui thlengin a hremna nep ber tura kha prescribe a ni tawh dawn a. Pu Speaker, zu-rui ka huat zia hi chu tlang hriat a ni a, hremna dan tha deuh hi awm se ka duh ngawih ngawih a ni. ‘Vantlang hmaa ruih ching-hnam’ nih hi ka duh lo hrim hrim. Chuvang chuan, heng hremna dan minimum punishment kan han dah te hi a lawmawm hle a ni. Tichuan, India ramah State 30, UT nen kan awm a, 6-in kan khap a, 30-in an khap lo a; khawvelah hian mosolman ram 11-in an khap bawk a ni.

Tichuan, a tawpa kan sawi duh chu, thil buk tur pali kan neiin ka hria a. Pakhatnaah chuan, i veilama mite khan zu mi zawrh tir an tum ngar ngar a, keiniin ‘kan zuar dawn lo’ kan ti ngar ngar a. Tichuan, ‘zuar law law rawh u; huaisen deuhin ti law-law rawh u’ tiin min fuih mawlh mawlh bawk a; a chang leh min fuihpawrh bawk a. A changin zu an duhloh zia an sawi a, a changin, ‘zuar law-law rawh u, huai takin’ min ti leh lawi bawk a. A lum leh luma, a vawh leh vawh law law kha an ngai lehzuaw zawkin ka hria.

Chuvangin, vawiinah hian, ‘zu-zawrh duh leh duh lo tunge tam zawk’ kan inbuk dawn a ni. Keini chu a duhlo lam kan ni. A 2-na ah chuan, ‘pawnlam atanga zu, wine leh beer lakluh la ni zel rawh se; phal ni rawh se’ tih leh, ‘phal ni suh se’ tih kan inbuk leh dawn a ni. Khatah khan keini chuan khap kan duh, beer leh wine thleng khan lakluh kan khap dawn. Tin, ‘dan lova wine leh beer zawrh hi tihian awm zel rawh se’ an ti ang a ni a, i veilam amite khan; Pu Speaker, Dan hmangin a regulate-na siam an sawi-chhe tlat si a. Chuvang chuan, ‘Dan

mumal awm lovin tihian, a duh duhin ti reng mai rawh se' tih duhtute leh e, 'mumal takin i regulate zawk ang' tih duhtute, a tunge tam zawk kan buk dawn bawk a ni.

A tawp berah chuan, farmer-te lamtang leh farmer-te lam tanglo kan inbuk dawn a ni. 'Tute nge farmer lamah tanga, tute nge tang lo' tih kha kan inbuk tur a ni a. Chuvang chuan, kan ngaih dan a inang si lova, Pu Speaker, buk mai rawh.

**PU LALMUANPUIA PUNTE:** Pu Speaker, Opp. Leader-in 'Kohhran nena an inkawm khan in hrilh dik tawk lova' tih lai taka kha, 'license leh foreign dignitaries tih kha in hrilh lo; dawt in hrilh' a tih deuh kha, a hrilhfiah thei em?

**SPEAKER** : Aw sawi viau tawh e. Tunah chuan, kan Minister zahawm takin a bill-te han wind-up se la, House pass-pui tura rawn dil nghal turin ilo sawm ang.

**PU LALNGHINGLOVA HMAR, MINISTER:** Pu Speaker, ka lawm e. Ka chhinchhiah sual loh chuan kan House Leader tiamin mi 23-in kan sawi a. A bengvarthlak a, thahnem kan ngai tlang a, kan ram tana tha tur nia kan hriatah kan ding tlang niin ka hria a. Pu Speaker, he dan siam thatna tura kan put luhah hian a tir atang reng khan zu khapna dan a ni tih ka sawi Chiang Nghal a, chumi hnuai chuan a hma aia khauh zawkin zu kan khap dawn kan ti a. Chumi piah lamah chuan a hremna dan kan belh dawn kan ti a. Tin, a Dan hrang hrang a chhunga mite kha kut-hnathawktute lam tang a ni tih te pawh ka sawi a.

Pu Speaker, i vei lama mite khan 'sawi tel duh loh a i nei' min ti a, a vaiin sawi dawn ilang sawina hun pawh a awm lova. A document pawh kan kawl vek a, in rawn sawi chhuak a, ka sawi tel duh lo a ni reng reng lo, Pu Speaker. An rawn sawi chhuah te pawh kha helai atang hian ka inbuatsaih ang angin ka chhang dawn a. Engpawhnise, kan chhang fiah seng lo a nih chuan, a hranpa pawhin kan chawlh hnuah te kan inhrilhfiah leh ang a, theihtawp chhuaha inhrilhfiah te chu kan tum dawn a ni.

Pu K. Hrahmo khan ADC chungchang kha a sawi a. Pu Hrahmo-a kha thahnem a ngai hle mai a, a fakawm ka ti a. Chutih rual chuan, a bill chungchang kha Pu Speaker, hriat sual hlek hlek kha a neiin ka hria a. A insual a, a inbuan thial thial mai a, a bill lam tang leh lam tang lo ang khan a awm tawn a awm tawn mai a. Engpawhnise, a ngaimawh laia kha chu ADC huam kha a ni deuh ber a. ADC huam chungchang kha chu kan Chief Minister, kan House Leader khan a sawi Chiang tawh a. Kan tih chhana kha ram pum huap zu khap a nih chuan, zu i khap law law ang kan ti a. Tin, he bill-ah hian kut-hnathawktute lam tang thil tam tak kan bilh tel a, chu chu 'ADC a mite hian nei tel ve rawh se; a ham thatna hi tel ve rawh se' kan ti a ni.

Pu Speaker, kan sawi tawh ang khan, zu min zawrh tir a, min puh tal an tum lai khan, zu khap kan tum chuan an tang teh teuh bawk si a, khalai vela kha chu han chin fel chu a har hle mai. Engpawhnise, a huam chhunga mite'n an duh dan ang kha kan zah sak ang. Kan Chief Minsiter, kan House Leader-in a sawi kha kan inngahna tur chu a ni ang a. Vawiinah hian Pu Speaker, he bill kan put-luhna ah hian ADC thuneihna chhuhsak tumna pakhat mah kan nei lo a ni.

Tin, Pu Speaker, Sixth Schedule hnuai 12(b)-ah khan sawi tawh angin, 'non-distilled country liquor' ah chuan an thuneihna pum hlum a ni; chhuh sak tumna pawh kan nei

chuang lo. A bakah erawh chu, hemi ‘a-senchi’ kan tih te hi Mizoram chhung a ni ve tho a, Mizoram chhung ni sia a-senchi zawrh khapna awm lo kha tha kan ti lova. Tin, sawi ang khan a ken tel wine rules leh thil dang kan bilh tela kha, a hamthatna dawng ve se kan tih bawk avangin, ADC kha kan ti tel a ni a. Thuneihna inchhuhsak tum ang dawn dawna inpuh kha chu ngaihtuah that leh a thain ka hria Pu Speaker.

Tin, Pu Speaker, Pu Lalrinsanga Ralte khan thahnem ngai takin a sawi a, bial chhung chanchin te hial mimal tak khan a han sawi a. Pu Speaker, ka sawi tur chiah pawh a ni lova, amaherawhchu, Aizawl West-II biala Vaivakawn-Zohnuai khu eng emaw lai khan zu hmun ang a sawi a ni. Pu Speaker, zep thu a cheng lo, ‘a senchi-lane’ tih a ni. Khulaiiah khuan motor din loh a awm lo ang, a chhun a zanin. Pu Speaker, tunah khuan zuk kal rawh; zu zuar in hmu tawh lovang. Chuvang chuan, Pu Speaker, zu-khapna chungchangah te, zu-tihremna chungchangah te hian kan tling lo chung chungin theih tawp kan chhuah ve a,. Vaivakawn khawtlangin theihtawp an chhuah ve bawk a, chumi tangho chuan a senchalanane ti a Aizawl khawpui leh Mizoram-in an sawi, an rik hut-hutna khulai petrol pump bul pheih vel ah khuan tunah chuan zu zuar an awm tawh lovang. Chu chu Pu Speaker, khati zawng khan inngaih sak ila.

Helaia ‘grape-ah wine siam an phal tho si a, lakhuihtheiah i phal ang’ kan tih avanga kan bial chhung thleng thleng insawi sak chu tih loh atan a tha zawk ang em aw, ka ti a. Engpawhnise, thahnemngaihna thil a ni a, ka hriatthiam pui tho mai. Pu Lalrinsanga khan Chapter 5(a) leh thil dang kha a rawn sawi a, a tawpah a hu hovin ka rawn react mai ang a. Nichinah Pu Rinsanga leh midang pawhina an rawn sawi red-card chungchang te, khang ho zawng zawng a kha kan House Leader khan a rawn sawifiah thaw khatin ka hria a. Amaherawhchu, a puluttu nih ang chuan han sawi ve tho a thain ka hria a.

Section 45 (a) a mikhual pawimawh leh khualzinte – ‘domestic leh foreign tourist-te’ tih leh India ram chhunga tourist-te pawh kha a ni a. Pu Speaker, Mizoram a khua atanga khaw danga kala tourist anga inchhiar tih lam kha a ni chiah lova. Kan Act Act-ah khan Form MLP A1-ah khan tourist ho tan bikah kha a awm a; passport thlalak tar a ngai a, hming te, khawia mi nge tih te leh an validity - an stay chhung zawng-zawngte nen. Hemi issue tu tur hi Commissionerate of Excise & Narcotics a ni. Pu Speaker, a awmzia chu, he thil hi Muslim rama zu-khapna dan khauh ber an hmanna hmunah pawh foreign dignitaries te leh tourist te tan provision hi siam thin bawk a ni a.

Tin, tunah hian zu hi a confiscate a man theih dan a awm a, a disposal dan kha a awm lo a ni. Rangvamual truck terminal-ah khuan an dah khawm rui ringawt mai a, a chang leh kan han leih-bua a, kan tichhe leh ngawt thin a. Chuvang chuan, kan man tawh hnu kha ‘heti zawng hian i dek ral ang’ tihna mai a ni. ‘Mizoram ah zu kan zuar ang a, kan tizalen ang’ tihna a ni lo. Chumi lakchhuahna atan chuan hmun dang a rem loh avangin ‘Excise & Narcotics Commissionerate-in mawh a phur ang’ tih a ni a, danah hian Chiang takin a inziak tel a. Chuvang chuan, han ngaih-kawih tur leh eng emaw kha a awm hranpain ka hre lova.

He ‘The Mizoram Liquor Total Prohibition Act, 1995’ a hman hun tak chu 20<sup>th</sup> February, 1997 kha a ni nghe-nghe a. Khatah khan Chiang takin a inziak a, chu chu kum 17, 1998 - 2008 chhung khan Mizoram ah hian hman a ni a. Pu Speaker, i veilama thu tam zawkte hi roreltu zingah an tel chungin, chutih hun laia an ngaimawh miahloh, an sawisel loh chu a ni; chu thil tho chu a ni tuna kan rawn dah leh hi. ‘Sorkarin thil thar la lutin, zu zawrh a tum

chiang a ni' tia mut theih loh phah nan an hman kha an hriat chian loh vang a ni. Kha tih hun lai kha Pu Speaker, hei hi zu zuara kan inngai dawn anih chuan, an zuar reng tawh a ni.

Chuvang chuan, Pu Speaker, thil hi a nihna tak sawi ila. Politics-ah eng emaw kan play a; nakinah tute'n emaw, 'ka sawi that avangin hetiang hian engtin emaw min ngai se' tih tur dawn dawna intih te, mahni hamthatna tura Bible chang inchhiar khuma, a lehlama mite chu chhe der mahse pawh tih loh tur ang khawpa kan House kan cheibawl hi a tha ka ti lova. Tin, Pu Speaker, i dinglana mite pawh hian khati zawng khan a tu amah hi inti tawn lo ila a thain ka hria. Bible changte behchhana hmanga 'lam tangah tute emawte kan siam thei mahna; nakina tv leh youtube-a min entute hian kan lamah an tang thei mahna' tia, khati zawnga Pathian thuawih kha kan show dan tur niin ka hre lova.

Kan sorkara ro kan rel danah, 'ka department ka enkawl danah, a hnuaiia contract ka pek danah, tunge hnathawk, tunge a hlawkna tel, department ka enkawl ve chhung khan supply tunge ka pek zozai' tih te atang khan Pu Speaker, thil hi a langtlang dawn. Pathian thu kan awihna te hi Bible chang inchhiar khum lam ni lovah lang se a thain ka hria. He House kal zelah hian Pu Speaker, nakin zelah pawh he Mizo hnam hi a awm chhung chuan, chu chu kan intehna zawk tur niin ka hria. Chuti ni lova, tute emaw play-a khati zawnga kan tih kha chuan, helai hian a tum a thelh palh ang tih ka hlau deuh a ni.

Nichinah khan Pu Lalrintluanga Sailo, kan member rawn zawhna ho kha chu ka chhang tel nghal maiin ka hria a. Wine chungchang kha a sawi a, local-fruit beer hrilhfiahna pawh kha a Act-ah khan a awm avangin chhiar nawn tawh lo mai ila. 'Biakrinawma, New Chalrang' tih kha, department ang chuan Pu Speaker, kan hriatpui lova. Engpawh nise, a tira ka sawi tawh ang khan, Mizoram ah hian hmun hrang hrangah enterprenuer ten beer te, wine te, alcoholic content thil chi hrang hrang hi an siam a, ZPM sorkar thar hnuai siam a ni lovin, tun hma atanga siam tawh eng emaw zat kha a awm a ni. Chu chu man ngai a ni lova a, a chhan chu, Hnahlan leh Champhai grapes tih loh a bak zawng chu phal loh a ni a, man theih vek erawh chu a ni. Chutih lai chuan alcohol content a san thu te leh thil danga kha min hrilh hriatna angah ngai ila. Pu Speaker, Dan lo a ni a, dan lo anih chhung chuan man theih a ni a. Engpawh nise, kan lo enzui ang e.

Pu Speaker, Pu Ramthanmawia khan hmeithai-fahrah chungchangte kha an sawi a, Zu hi 'wine' a ni; wine hi 'zu' a ni ti zawng khan a sawi nasa hle mai a. Pu Speaker, nichina ka sawi ang khan, Mizoram-ah grape atanga wine siam phalna pe hmasa bertu chu tuna a awm mekna party hi a ni a, kum 2008-ah pek a ni. A pe hnukung ber tu pawh, hei hi 30<sup>th</sup> August, 2022 Council of Ministers meeting-in a pawm kha a ni a. Chuvang chuan, zu hi 'wine' a ni a, wine hi 'zu' ti zawnga kan sawi dawn anih chuan, tuna wine phalna pe mek tu hi MNF sorkar a ni a. Chu lai chu Pu Speaker, kan chhut chianglo em ni aw ka ti a. 'Mipui kan lamah an tang mahna' tia, 'anni chuan zu an zuar dawn' tia inpuhna ang hi kan ti lutuk deuh em aw ka ti a.

Ka sawi tum lai tak chu kan Minister Dr. Vanlalhlana khan a rawn sawi a. Foreign-dignitaries chungchangah khan zep tur a awm lo; G20 summit neiha kha kum 2023 March thla niin ka hria a, journalist ka nih lai a ni a. Report ka dawng a, a thlalak te pawh ka hmu a ni. Chu chu MNF sorkarna hnuaiia thleng mek a ni. Dan angin Diplomats te leh foreign tourist te khan emaw, tourist dangte emaw khan an lo nei thei tawh chuan, heng thil te hi

ngaimawh a ni lo tur a ni a. Video leh engkima kha a awm a ni. Amaherawhchu, sawinawn ngai tawh loah ka ngai a Pu Speaker.

A sawitu kha an thahnem a, kan react vek thei dawnin ka hre lova. Pu R. Rohmingliana khan Bible te kha ‘ka chhiar hnem phah e’ te kha a ti a, kha chu a lawmawm lamah ngai ta ila. MLA te pek a nih tawh chuan, public-property ni dawn lawm ni, tih laia kha. A hriatsual hret laia chu, a leak-out kha MLA pek hard-copy ni lovin, a PDF soft-copy zawk a ni a, kha kha kan ngaimawh laia chu a ni a. Chuvang chuan, a leak-out kan sawia kha a inanglo deuh niin ka hria a.

**PU R. ROHMINGLIANA:** Pu Speaker, point of clarification: Hard copy hi thla kan lak chuan PDF ah kan convert thei a ni.

**PU LALNGHINGLOVA HMAR, MINISTER:** Pu Speaker, ka lo ti tawh thin a ni a, khatiang kha kei pawhin ka hria a. Pu Speaker, ka’n sawi laia chu, hard copy leak-out nangmah ngeiin MLA zawng zawng awmna group-a i rawn dah kha chu, thlalaka dah chawp ni lovin, a original soft-copy kha a ni tlat a ni.

**SPEAKER :** In sawi lai chu ka’n pawt chat lawk ang a. Kha kha computer lama mithiamte ka rawn a, original soft-copy a ni an ti a ni. Hetia hard-copy a thlalak scan emaw, khatiang kha a ni lo an ti a, chulai zawk chu a ni. Tin, kan memberte hian in copy te kha a thla lain, in lo tidarh tur pawh a ni lova. Nangmahni copy a ni a, intidarh pawh a nih ka ring lova. Kan ti darh a nih chuan, inpuan a tha mah mah ang a. A hun lova viral, discuss hmaa social media-a chhuak uai-uaia kha, tih lai zawk kha a ni ta a. Tin, kan offical thenkhat he lama kut rang deuh an lo awm thin a, an tih tur a ni lo airing-official an awm thin avang hian, he thil hi tun sorkarah hi chuan kan thikthu a chhe khawp mai, tiha kha ka’n sawi nghal law-law teh ang.

**PU LALNGHINGLOVA HMAR, MINISTER:** Pu Speaker, Pu Rohmingliana bawk khan thahnem kha min ngaihpui a, ‘pineple wine-te pawh hi siam ve ni se’ a ti a, kan tum tak kha a ni a, kha kha. Tichuan, hmun dangah va kal se, ‘tourist ka ni’ va ti se, tiha kha, a Act a kha kan chhiar chuan, a duh duh khan tourist-ah an inchhiar ngawt theih loh a ni. Tichuan, engkim document nena tih tur kha a ni a, vantlang hmuha khatianga tih tur, an duh duha ban theih tur chi ang kha a ni chiah lo a.

Pu Speaker, Pu RM Chakma khan, ‘hypocracy a tam lutuk’ te a ti a, ‘a tam lo e’ tia han chhan ngawt chu a rem bik lova. Ama thlir dan kha a ni a, ‘corruption thlengin an ngaihtuah sak’ ti tein min puh-na khawp mai a. ‘Zu an zuar dawn’ a ti a, a duhlo em em mai a. Amaherawhchu, CADC lamah khan zu va khap kan tum a, a tang leh tauh bawk sia. Khalai kha chu Pu Speaker, a har ve bawk a ni, a tanna kha.

Pu Speaker, Pu H. Lalzirliana khan, ‘sawi-uar duh lai leh duhlo lai te pawh a awm em aw’ a ti a. A Act-a kha nichina ka sawi ang khan kan vai hmuh a ni a, a vai sawi dawn chuan a thahnem tham a, kan sawi lai te a awm a. A sawi dan hrim hrim kha a ngaihnawm ka ti a, Pu Speaker, lawmthu ka hrilh duh a. Tin, a thlir-zauin ka hria. Tha tak khanin ‘in kal dan turah pawh’ tih thleng khan rawtna te kha a nei a, a lawmawm hrim hrimin ka hria a, kha laia kha.

Pu Robert Romawia hrilhfiahna kha Pu Speaker, a tha hle bawkin ka hria a. Zu chungchanga zu-chhiah te leh chhiah dang a tlak hniam dan te, hospital bill lam te kha a la sawi tel lo zawk a. Engpawh nise Pu Speaker, a hlauh kha chu a-senchi zawrhna kha a ni a, tun tumah hi chuan kha lam kha a tel lo ve ta thung a. A thil duh loh thenkhat 'restaurant-ah te..' a tih kha, nichin khan ka sawi em ka hre lova. Term hmasa khan Congress member Pu Zodintluanga Ralte khan Aizawl restaurant pakhat an zawrhna kha a sawi a, mi hming a sawi te pawh kha ka repeat lo mai ang a, Pu Speaker. Chuvangin, tuna thil thar ni lo, a hmaa awm tawh tho kha a ni.

Pu Speaker, memberte sawi kha ka pawm em em a; 'Excise Department Minister a fail let der' te kha min ti a. Kan Member Pu C. Ngunlianbunga ni ta in ka hria, khati zawnga 'fail' min ti a nih chuan, ka pawm mai; Zu hi a awm miao a ni. Amaherawhchu, Pu Speaker, zu kan khap-nat pawh leh zu chhia a tam a. Rangvamual, Phunchhawng leh Tuikhurhlu te hi a siamna hmunpui a ni, tih kan hrechiang a, a khat tawh chuan kan bei. Amaherawhchu, duh ang thalin han beiin han tirem ila chuan, a aia hla ah a aia chhia an siam a. In lo thei lote hi hi kan naute, kan inluahna te, kan inluah te, kan thenawma mite, kan thiante leh kan fate anni. A aia chhia leh a aia man to an in lo thei si lova, an thihpui nasa zual a. Excise & Narcotics Department pawh hian ngun deuhin kan en ve bawh a ni, Pu Speaker. A pawnga puia han beiha han tihchiam dawn chuan, eng emaw chen chu a tih theih. Amaherawhchu, a result leh an experience atangin an sawi a, kan sawiho bawh thin a ni.

Chutih rual chuan, VC leh Local Council inthlan dawn kha chuan tum hnih-thum chu a bupui luhchhuahin kan bei a, inthlanin a ken tel te pawh a ni a. Tin, a bikin Aizawl West-I bialtu Pu TBC Lalvenchhunga te pawh kan rawn thlap a ni. Kan han sawiho a, Police leh Excise-te nen joint-operation te pawh kan han nei a. Pu Speaker, ka'n sawi duh chu - Zu hi tun aia nasa zawk pawh hian kan bei chiam thei a, amaherawhchu, a let leh a awm zel. Chu chu a kan fate leh kan naute, kan thiante ah bawh hian a let leh a ni.

Chu chu a ni, Pu Speaker, MLA-te hian kan bial theuh ngaihtuah ta ila. Tute nge kan vuiliam? Kum 60-70 ni lovin, kum 30-50 inkar mipate anni kan vuiliam ni. Zu-ngawlvei pawh anni hman tawh lo; zu in thin hi an thi tlat tawh a ni, tunah chuan. Chu chu kan ram dinhmun a nih avangin, a mawhphurtu Excise Department a changtu ka nih chuan, a a mawhphurtu pawh ka ni thui hlein ka hria. Amaherawhchu, ngun deuha ngaihtuah hi a ngai a, helai hi a har khawp mai.

A dawt lehah chuan, Pu Speaker, zu chungchanga kan ngaihnan te kha Pu TBC Lalvenchhunga khan a sawi a. Khalaiah khan tuna kan dinhmun hrim-hrim hi, medical reimbursement Private/Govt. hospital atanga kan bill bikah hian sorkar-hnathawk zingah chronic liver disease - zu kaihhnawih a ni deuh vek; mi 481 te bill hi crore 4 a tling a ni; alcohol dependent syndrom, zu kaihnanwiha sorkar-hnathawk mi 363 te bill hi lakh 82 a tling a ni; Mizoram Healthcare Scheme hnuai inziaklutte zingah chronic liver disease nei mi 452 te bill hi crore 2 a tling a ni. CLD-ah hian alcohol-related hi tam bera ngaih a ni a, ADS bikah mi 465 niin, lakh 95 an bill a ni. Chu chu healthcare scheme-a inziaklut leh sorkar-hnathawkte'n private hospital-a an bill-na chauh a ni a, sorkara an bill-na hi a la tel lo zawk a. Chu chu kan ram dinhmun dik tak a ni a. Darthlang hi kan hmaah hung ila, he ram rorelna insang berah hian zep nei lovin kan nihna hi puang ngam ila, a pawm pawh pawm mai ila a thain ka hria.

Tin, Dr. K. Beichhua, Excise & Narcotics Department changtu thin khan, “A va tlai ve; a dawnah tlanche chungin min han pe-lui,” a ti a. Pu Speaker, a tirah thil awmdan zawng zawng ka sawi tawh a, a tlai chhan zawng zawng pawh ka sawi tawh a ni. Tichuan, a dawnah kan han pe a. A tak takah chuan, insertion pakhat leh deletion bakah ‘local-fruit beer’ tia a hrilhfiahna thlak mai kha a ni. Buai em emna tur chu a awm lo nanging, Dan avang khan a lo tlai si a; ‘4 clear days’ tih kha, ‘3 clear days’ a ni a, a ziakah chuan ‘2 clear days’ tih niin ka hria a. Lok Sabha lamah ziakin a awm a, State-Assembly lamah chuan ziakin a awm lo nghe nghein ka hria, Pu Speaker, ka hriatsual loh chuan. Chuti chung chuan a tlin tak loh avangin... **(Dr. K. Beichhua:** Pu Speaker, hetah hian a awm; ka chhinchhiah.)

Tichuan, tunah ‘3 clear days’ angin kan lo sawiho leh ta a. Engpawh nise, ADC chungchang kha a ni khan an han sawi leh a. Nichina kan Chief Minister sawi tawh ang khan, ADC mipuite rawnin ‘hei hi chu ngaihtuah nawn theih loh pawh a ni lo e’ tih kha ka sawi duh a. Chutih rual chuan, ‘helaiah a awm reng a, an man tir lo; Millenium Centre-ah a awm tih ka hriat ve leh ka man tir’ a tih kha, Pu Speaker, kum 2018 December thlaah Minister a ni tawh a, kum 2022-ah a man tir chauh a ni. A karah khan a lo hre miah lo nge ni?

Tin, chumi piah lamah, kha lai boruak kal dan kha Pu Speaker, kum 2022-ah khan January thlaah rawtna a lo lut a. Chutah chuan ‘wine’ a tel lo a ni. Wine a tel loh takah chuan Hnahlan leh Champhai lam kha an lo so hle tawh a ni. Tichuan, March thla a lo ni a, Council of Ministers thutkhawmah khan ‘wine rules’ kha a tel ta si lo a, grape-wine a tel tak loha chuan an lungawi lo a ni. Khalai bawr vel inkarah khan Millenium Centre kha nasa taka beih a ni a. A hma zawngin a dawr free takin a awm reng tho a ni. Amaherawhchu, chumi hnu lama thil thleng chu kan hriat tak vek kha. Mi-vanduai, an man sak zingah mi nunna chan te an han awm bawk nen, a boruak a han arh chho zel a, March thlaa grape-wine chungchanga rules siam ngam lote khan August ni 30 ah chuan an rawn siam leh ta a.

Kum 2022 tho a la ni, Pu Speaker. Chutah chuan lawmthu sawina press release August ni 31-ah Mizo National Front General Hqrs. in a chhuah a ni. Tichuan, khami kum vek October ni 22-a Hnahlan leh Champhai-a a lawmnaah khan kan Excise Minister ngei pawh khan thu a sawi a. Tin, Pu K. Laldawngliana ngei pawhin thu a sawi a. Nichin khan Pu Speaker, ‘zu-zawrh tum’ tiin min puh an tum viau na a, ‘wine’ tho kha a ni tih ka sawi tawh a. Pu K. Laldawngliana khan, “wine thatna hi ka hre thei lo a ni,” tiin a sawi a. Amaherawhchu, October ni 22 ah kha chuan an kal zelna turah sorkarin theihtawp a chhuah zel dawn thu a sawi a, phurawm a tih thu te pawh kha a lo sawi a, lawmpuina pawisa pawh a pe a ni, kum 2022 ah khan. A document pawh Pu Speaker, a awm a ni.

Pu C. Ngunlianchnunga khan LESDE chungchang kha an sawi lut leh thin a. LESDE hian kan MLA senior Pu C. Ngunlianchnunga in hi kan luah a, tunah hian a tam zawk hi LESDE hnuaiah hian online-a inziah luh theih tawh tur a ni a. Staff lak belh bung-bung lam hian kan ti dawn lo a, amaherawhchu, district changtu officer te chu dah belh kan tum tih kha House-ah ka sawi tawh a.

Tichuan a zawrhna chungchang te, ‘heta an tih chuan, sawlaih a rem leh dawn si lo’ tih te bakah trade licence chung chang te thleng khan kan sawi a. Engpawh nise, Pu Speaker, khalai kha chu subject dang deuh kha a ni tawh a, a trade-licence chung chang kha chu; an pek loh chuan, an zuar dawn lo a ni mai a, khalai kha chu an mahni mi leh sa te tho kha an hrek tur an nih dawn avangin, ngun deuha ngaihtuaha balance zawn chu a ngai dawnin ka hria a.

Pu Lalthhandama Ralte, Opp. Leader-in a rawn sawia kha, Pu Speaker, hei hi kan amendment bill chu a ni mai. A phenah engmah a awm lo; a phen lo ah pawh engmah a awm chuang lo. A nihna angin kan lang tlang mai a ni. Sawi tan tir atangin ‘a phenah awm’ kan ti leh thin a. A Act, a chhungah khan a section zawng zawng a inziak vek a ni Pu Speaker. Nichina sawi ang khan, helaia sipai canteen te kha kan han ngaimawh a, Pu Speaker; sipai canteen kha Assam Rifles te, BSF te leh para-military dang te hi Army Act 1915 te, Air force Act te 1915 te, Naval Act 1957 te hmangin an mahni canteen ah theuh pensioners te tana zu pek-chhuah theihna an nei a. Hetiang hi a nih sa avangin MLP Rules, 2022, rules no. 15 hmang khan (a kawh chiah lo deuh nangin) kan han pe deuh nawk-nawk a. Tunah chuan a pangngaiin kan han dah tawh a; chumi tihna mai chu a ni a. Tunah hian Aizawl Dist. hmun 6 ah, Lunglei leh Kolosib Dist. hmun 1 ve ve ah pek-chhuah a ni a. Kha laia kha kan hriatsual palh ka hlau a.

Tin, Pu Speaker, a social impact chungchang kha min zawt a ni a. Wine rules ah khan grapes kha thei dangah kan han belh dawn a ni mai a. A bak chu nichin ah khan kan sawi tawh a, a social impact hi tun ai hian a nat chiam emaw, a nat loh chiam emaw a danglam tehchiam kan ring lova. Engpawh nise, Pu Speaker, a social impact hi he kan draft lai hi chuan a hranpaa inzirchianna kan nei lo, tih kha zep nei lovin leh a phenah awm nei miah lovin, tlang takin ka’n sawi duh a ni.

Tichuan Pu Speaker, dry-day kha kan ngaimawh niin a lang a, dry-day hi zu-khap burna hmunah pawh puan vek a ni. Inthlan ni te leh eng emaw ni ah te dry-day hi puan thin a ni a, chu chu state dangah pawh puan tho a ni. Dry-day puan theihna provision kan Act hman mekah khan a awm bawh si loh avanga telh mai kha a ni a. An han sawi, ‘ti hian ka han hmang ang a, district dang zawng zawngah an zuar dawn em ni’ tih kha, ‘dawn lo’ tih a ni.

Tin, mahni state-a tourist nih kha kan tum deuh tlat mai a. Thenawm khuaa va zina tourist va niha, eng emawa inziah luha zu te va lei tir mai kha, mizote kan puh chhe lutuk ve deuh bawh a. Khatiang chuan an tih duh kan ring lova, khati zawng khan ngaihtuahna kan lo nei lo reng reng a. Engpawh nise, a pe-chhuak theitu kha Commissioner, Excise & Narcotics Department a nih avangin, anni lam pawh kan lo chah ang a; mahni state-a tourist nih tir phal lo turin. ‘A rules lamah pawh kan lo umzui ang e’ tih kha, Pu Speaker, kan sawi duh a ni.

Tin red-card chung chang kha chu kan sawi tawh a, medical prescription hi chu zu-khapna dan an hmanna hmun dangah pawh telh thin tho a ni a, hrisel lohna nei ten kha kha an tih theih a ni a. Tin, ‘engtik hun chhung nge’ tih zawhna kha a awm a. A Act ah khan khang te kha telh vek theih a nih loh avangin notification hmangin kan la notified ang a. Mizoram-a zu a zalenna nuai nuai tur ang nilovin, a mamawh leh a tul te chauhvin an avail theihna turin notification-ah kan rawn dah dawn a ni.

Kan Opp. Leader khan ‘dawidim hman chungchang hi tuna kan wine rules hman mekah hian engtin nge’ a rawn ti a. A hlauhawm zawk, Extra-Neutral Alcohol (ENA) hman mek a ni a, import permit pek thin a ni a, chuta tang chuan an lalut a, hman mek a ni. ENA hi Pu Speaker, an sawifiah dan chuan, ‘primary raw-material for making alcoholic beverages’ tih a ni a, zu-siamna hmanruaa an hman tlanglawn ber tihna a ni. A alcoholic volume hi 95% a ni hial a ni. Kan rawn bilh tela kha ENA ai hian a chak lo zawk a, hlauhawm loh zawk a ni, tih kha Pu Speaker kan sawi duh a.

Nichina sawi ang khan muslim ram leh hmun dangah te pawh zu an khap burna dan an ken pawh hian a provision - foreign dignitaries leh midangte tan khan tih thin kha a ni a. Chungte chu kan han belh chhan a kha a ni a. Zalen taka zu zuar tur leh zu zuara han inpuhna tur ang chi kha chu a ni lem lo a ni.

Pu Speaker, nichinah khan New Chalrang a thil thleng kha kan han sawi a. New Chalrang ah tho khian New Chalrang - Pineapple Society an awm a. Nikum chhung khan lakhuihthei hi kg 43,000 an lei a. Aizawl lam leh vai hovin kg-ah cheng 7 – 10/- a an lei thin kha, cheng 15/- in an lei a. Juice-ah te jam-ah te leh a trial-run atan eng eng emawah te an han siam chhin a. Anni min hrilh dan chuan, Pu Speaker, ‘heti hian kal zel ta ila, nakinah wine rules te hi siam danglam a nih chuan, Mizoram-a lakhuihthei te hi chu keimahni ringawt pawh hian kan lei zawh theih kan ring’ an ti a ni. Chutih rual chuan, Pu Speaker, nichina kan member Pu Rintluanga Sailo sawi ‘Chepa’ tih kha chu, anni lam hi an ni lova, hei hi chu midang a ni. Kha kha chu kan lo enzui ang e.

Engpawh nise, Pu Speaker, khang te kha kan bill put luhin a ken tel thilte kha an ni a. Helaiiah hian a sawifiahna hrang hrang te pawh a awm a, kan sawi vek tawh lo mai ang a. Tunah hian Pu Speaker, Aizawl leh a chheh vela zu hi a chhiat avangin mipuiin an tuar nasa kan ti a, hei hi tunah hian kan endik mek a ni. ‘Eng ang chiaha thil hlauhawm nge a nih’ tih te tunah hian New Delhi lamah kan hotute’n an tlan thlakpui a, Agropharmaceuticals Pvt. Ltd., New Delhi ten an endik mek a. Tichuan, March Ni 1 khan an endik a, a result a lo la thleng lova. Hetah hian Aizawl leh a chhehvela an zu in chhe lutuk avanga thihna nasa lutuk hi kan inrin siak nasa a, ‘a nihna tak i hria ang u’ kan ti a. Tichuan, a hma deuh khan RIPANS ah endik a ni tawh a. Tunah chuan ‘a hmunpui law-law panpui teh ang’ tiin, a sample te kan la a, chu chu House hi ka han hriattir duh a ni.

Pu Speaker, kan sawi rei ta hle mai a. Vawiinah hian “The Mizoram Liquor Prohibition amendment Bill, 2025” thahnemngai taka min sawipui tute zawng zawng... (interruption)

**PU K. HRAHMO :** Pu Speaker, point of order - a concerned minister a thut hmian, ADC area ah khan he Amendment Bill, 2025 hi exempt kan dil a. House Leader Chief Minister zahawm takin kha, a thusawi atang khan a phal viau mai a, a pawm mai dawn emaw kan ti a. Mahse, a hnungah Excise Minister-in thu a sawi leh dawn avang khan, a kutah a hlanin ka hria a. Kan Excise Minister kha a rawn pawm ngei turah ka beisei lain, ‘ngaihtuah that leh theih alawm’ a ti leh si a. Vote la ila, hei hi a har viau tawh dawn si a. Engpawh nise, vote lak hma hian, ‘hei hi chu ADC lama extend loh tur a ni e’ tih zawngin min pawm sak theih chuan a va han lawmawm dawn em.

**PU LALNGHINGLOVA HMAR, MINISTER:** Pu Speaker, ‘A la ennawn leh theih ang’ tih kha kan Chief Minister tawng kam a ni a. Chuvang chuan, ennawn leh theih turin pawm rih phawt mai ila, tunah chuan. Engpawh ni se, kan sawina te, kan rilru te, kan tih chhan te pawh in hre tho a, Pu Speaker. Amaherawhchu, an pawmna rilruah khan a dam thei lo emaw, ADC te va hnuaichhiahna emaw, an thuneihna chhuh sak zawnga mipuiin an pawm dawn a nih chuan a tha pawh kan ti kherin ka ring lo. Amaherawhchu, keini duh danah erawh chuan, zu-khapna dan Mizoram-a an hman mek hian Mizoram pum hi huap se. Tin, chumi hnuaia amendment kan siam wine leh beer an siam theihnaa kut-hnathawktute tharchhuah khan an ni pawhin hlawkna tel ve se, tih kha kan duh dan a ni a.

Chutih rual chuan, Pu Speaker, kan Leader-in a sawi tawh a, ennawn leh thei loh a awm lova. Engpawh ni se, vawiinah hian ngaihndan hrang hrang kan sawi a, tawngkam hriam leh eng emaw kan lo hmang palh a nih chuan, thupha te kan chawi a. “The Mizoram Liquor Prohibition amendment Bill, 2025” hi Pu Speaker, kut-hnathawktute lam tang bill a nih tlat avangin min pawmpui turin House hi ka sawm e. Ka lawm e.

**SPEAKER:** A lawmawm e. Kha an sawi ta viau mai a. Ka record ah chuan kan House Leader nen, kan Minister nen, kan zavaiin mi 23 in kan sawi a ni. Chai hlawh ber pawlte zinga mi a la ni hial awm e. A lawmawm tak zet zet a ni.

Aw le, kan Minister zahawm takin ‘The Mizoram Liquor (Prohibition) Amendment Bill, 2025’ chu House pass pui turin a rawn dil ta a. Tunah kan buk ang.

**PU LALCHHANDAMA RALTE, OPP. LEADER:** Pu Speaker, buk hma lawk khan; keini i veilama mite hi chuan kan han sawilan MLP Act, 2019 amendment siam section 20, 45A-a Excise Department tan zu zawrhna tur bilh lut chung a passpui hi theiin kan inngai lova. Zu khap bur kan duh laia, zu zawrhna tur pass tel ai chuan, keini chu kan kal chhuak mai ang e. (**Speaker:** Lo lut leh hram rawh u.)

**DR. K. BEICHHUA:** Chapter 5A a thara Dan rawn zeh luhah hian Excise & Narcotics Department hian special permission neiho chungah zu a zuar dawn a, chu chu kan pawm thei lo a ni, keini BJP chuan. (**Speaker:** A pawl thin mang e aw!)

*(Opposition Memberte an chhuak a...)*

**PU LALDUHOMA, CHIEF MINISTER:** Hetiang thil a thleng leh hi a pawl ka ti khawp mai a, lungruah taka han pass theih te kan duh laiin. Tin, voting-ah te pawh an pawm thei lo a nih chuan, ‘Remti lo’ an ti mai tur a ni a, han chhuah kher hi chu a mawi lo khawp mai a, a pawl ka ti khawp mai a. Hetiang boruak hi awm nawn tawh lo se ka duh hle a.

Tuna an han chhuah chhan ber pawh - Mosolman ram, zu khap nasat berna ram pawhin hotel-ah te foreign dignitary leh tourist te tan special phalna an pe a, chung chu tlemte an ni; kha kha zu zawrh phalna ah min ngaihsak lui a, min puh sak lui tlat a ni. Kha kha a nih loh zia kan inhrilhfhah a ni a. Eng ang pawhin inhrilhfhah ila, an awi dawn chuang lo tih kha a Chiang a. Amaherawhchu, Zoram-mipuute erawh chuan min pawmpui theih ka beisei a ni.

**SPEAKER :** Awle, ‘The Mizoram Liquor (Prohibition) Amendment Bill, 2025’ chu pass rem ti apiangin, ‘remti’ ti ula; rem tilo kan awm chuan, ‘remti lo’ ti ula. *(House-in pass a remti a.)*

Aw le, ‘The Mizoram Liquor (Prohibition) Amendment Bill, 2025’ chu he House hian a pass ta a ni.

**PU LALNGHINGLOVA HMAR, MINISTER:** Pu Speaker, ka lawm e.

**SPEAKER :** Awle, vawiina business chu kan zo ta a. Naktuk, March Ni 11, 2025 (chawhma dar 10:30) ah kan thukhawm leh dawn nia.

*Sitting is adjourned. (06:06 PM)*